

【校園】【純愛】那天來了一位 交換生

作者: 阿古獸究極進化

Powered by [紙言](#)

序章

大家好

小弟今次第一次寫文 咁可能文筆方面唔係幾好

寫得差唔好屌

呢個故事係小弟無無聊聊諗到嘅

可能結構唔係幾完整

咁希望大家會鍾意啦

如果可以勾起你哋某啲回憶咁就最好啦

最緊要有人睇啦

第一章

媽：夠鐘起身喇，第一日返學就想遲到？話咗尋晚唔好打機打到咁夜架啦，你又唔聽，你唔係想第一日返學就比人扣分下話

我望一望個鐘

07:45

大撚鑊

要知道我喺屋企返學校要半個鐘，跟住我學校係返8:15

我望到個鐘咁就緊係拿拿林刷牙洗面換衫啦

我嗰刻終於明白點解D人會話係危急關頭人嘅潛能係會逼晒出嚟

我用咗一分鐘就將我平時十五分鐘嘅嘢做晒，唔好問我點做到，我都唔知

呀 係啲 唔好意思

我趕得滯 唔記得介紹自己添

我叫做陳子豪 不過啲人通常叫我毛哥 唔好問點解係哥 咁讀中學D人叫大家乜哥乜仔架啦

事源我中一嘅時候，唔知大家中一嘅時候會唔會係第一日返學嘅時候介紹自己啦，而我就係介紹自己嘅時候叫咗自己陳子毛，跟住D人就一直叫我毛哥

諗起都覺得柒到一個點

小弟而家係一間叫做傳統男校讀緊中五啦，就嚟要考DSE

我讀phy ICT 同 bafs 成績都叫一般般啦 起碼全部合格先

返返嚟先

我望一望錶 8:14

仆街

得返一分鐘

我啱啱落地鐵 仲有一段要行成5分鐘嘅路程

咁梗係諗到唔諗 即刻衝鋒21咁跑馬路番去啦 仲同你慢慢係行人路玩障礙賽咩

我都形容都咁 咁姐係代表 我好成功咁

遲到啦屌

我真係唔撚明 遲一分鐘姐 可唔可以唔好咁嚴先

一番到去 就俾人叫咗我去 遲到果班學生嗰度排隊罰企

行到埋去 就聽到有人係我後面講

：嘩毛哥 尋晚又掛住溝女丫 好少可遲到啫

我望一望係邊條仆街潤9我

原來係文哥

文哥係我中學裡面其中一個兄弟 條友係遲到果條隊裡面嘅常客

佢好似由中一開始就成日都遲到 一個禮拜裡面起碼有兩三日 cls

我：屌你啦 撚有咁多女咩 尋晚打機打到34點咪唔知醒囉

咁我講起兄弟 咁就唔爭在介紹埋我其他兄弟啦

首先就係頭先嘅文哥 叫幾靚仔啦 雖然成日遲到又成日上堂訓覺 但係佢係我咁多個兄弟裡面讀書最撚勁嗰個

跟住就係阿軒 幾撚有米 成身都係名牌 不過讀書就麻麻啦 叫做差過我少少咁啦

我由中一識到依家 所以我同佢都叫做幾了解對方（利申非gay）

我哋有好多嘢都會同對方講

之後有金仔 好鍾意玩beatbox 成日都拗人打機 但係成績就認真麻麻 但係佢都唔太理

咁仲有幾個啦 阿峰, 傑仔同強哥 咁大家淨係記住佢哋個名就得因為出場次數唔多

罰完企 返返班房 咁第一日返學咁都係派下簿揀下班會嗰D咁啦

但係對於我呢D 不問世事嘅毒撚嚟講 我都係訓覺算

搞掂晒呢啲之後就入禮堂 去果個開學典禮 咁開學禮都係校長講嘢 話咩新一個學年大家要比心機讀書之類啦

我都係繼續補眠

突然之間 我隔離嗰個金仔 叫醒我

金仔：喂 毛哥 頭先話今年中五會有exchange㗎

我：同邊間先 講明先呀 男校唔洗預我 無興趣同人玩棍撞棍

金仔：咁我唔知啦 果間學校好似係男女校 應該有男有女掛

我：咁幾時過嚟啊

金仔：好似話係下個禮拜㗎

我：咁到時先算啦

跟住果日返半晝 我就同佢哋 走咗去街場跟隊踢波

我之後完全冇再諗過exchange嘅事

但係我冇諗過呢個exchange 會影響到我之後嘅人生

第二章

渾渾噩噩咁就過咗一個禮拜

通常第一個禮拜都唔會有D咩事發生

都係放半晝跟住成班兄弟咁去踢波咁囉

話咁快就到第二個禮拜

星期一嘅時候

我終於搞掂返自己果個生理時鐘

可以準時起身慢慢返學

話說我不嬲都唔會係屋企食早餐

我通常都會去學校附近嘅一間麵包舖度買個包食

今日竟然比我好好彩咁搵到有我最鍾意食嘅菠蘿油

可能你哋見到呢度會問

菠蘿油咋喎有幾特別呀

但係呢間真係完全唔同

唔知點解佢啲牛油特別香 而且個包又鬆軟 唔係到到都食到架

可能就係因為佢特別好食 所以我唔係成日都買到

今日竟然俾我搵到

我feel到今日應該會幾好彩

買完包之後我梗係即刻攤出嚟食啦 唔係嘅話等發毛咩

當我諗住好好享受我嘅早餐嘅時候

哎吔

我比人係背脊到撞一撞

撞一撞事小

我屌你成舊牛油跌撚咗出嚟

嗰刻真係陶大宇

邊條蛋散阻撚住呀叔食早餐

我拎住頭望一望

咦 女仔嚟嘅

佢望住我係咁講

女仔：對唔住啊對唔住啊對唔住啊唔好意思呀

我望到佢個樣好似驚到就嚟喊咁 我都唔係幾好意思鬧佢

我：唔緊要啦 好小事姐 你小心D喇

我諗返起 佢果陣時驚到咁 乜原來我咁恐怖架咩

死啦 無啦啦嚇親人添

之後我都無理到繼續返學

不過好地地冇咗個菠蘿油 有D不爽咁啦

返到學校 咩都唔理

訓返陣先

訓咗無耐之後就俾人叫咗落去早會

唔知大家係咪同我一樣

落早會嘅時候 有九成時間都唔會留意係台上面講緊D咩 通常都係同人吹下水咁

早會完咗之後就返返課室

一番到課室 就見到班友仔係咁係度傾

同學A：唔知陣間係咩人嚟我哋班呢

同學B：希望係靚女啦

同學C：靚女又點 你咪一樣溝唔到

望到咁嘅情況 我就問下坐我隔離嘅文哥

我：文哥 乜我哋會有插班生咩

文哥：插乜撚嘢班生呀 今日開始會有exchange呀嘛 你唔知咩

係啲 認真 我完全無咗件事

交換生又點 我哋咪一樣要照常上堂

無耐之後 我哋嘅班主任Miss Chou 就入咗嚟

Miss Chou：好啦好啦 係出面都聽到你哋把聲喇 唔好再傾計喇

咁我哋班都會比下面靜下嘅

Miss Chou：咁就乖喇 好啦 而家就請跟住之後會陪我哋一齊上堂半年嘅交換生入黎啦 大家畀啲掌聲啦

係呀冇錯 真係半年

我都唔知點解呢個exchange會咁耐

跟住就有四個人行咗入嚟 兩男兩女

咦 咪住先

果個女仔咪就係今朝搞到我冇得食菠蘿油個個

原來佢係交換生

咁跟住果幾個交換生都係自我介紹 然之後就話咩請大家多多指教之類啦

嗰個女仔原來叫Cherry

佢比老師指咗去坐我左手邊個行

佢行過來一見到我就開始又喺度道歉

Cherry：sorry呀 我今朝真係無心架 掛住望個google map 無睇路 搞到你無咗份早餐

我：真係唔緊要呀 咪當減肥囉

Cherry：吓 你咁瘦都要減肥

我：咁係咪唔得吖

Cherry : 得嘅 不過我都係補償番比你好啲

我 : 咁你陣間請我食個三文治咪當無數囉

Cherry : ok

見到我同Cherry咁講嘢

文哥即刻鉗住我

文哥 : 仆街仔 咁快食咗條女呀

我 : 好心你就咪撚癩啦

跟住我將今朝嘅事講晒俾佢知

文哥 : 唔怪得知你今朝好似頹頹地咁啦 不過呢個會唔會係你哋嘅緣份呢 你又可以在追多一條女啦啲

我 : 你可唔可以唔好咁痴線呀 文哥 一個菠蘿油 又比你吹到 又緣份又盛咁

文哥 : 你又知唔會

咁你話我又點會估到文哥會咁準先得架

第三章

咁我哋就平平常常咁上咗頭三堂啦

之後就放小息

咁我見冇乜嘢做咁就梗係繼續訓下覺啦

鬼叫學校張枱咁舒服咩

訓訓下 有人叫醒我

係Cherry

佢擺咗包嘢比我

Cherry：拿 三文治呀 當補償番你個早餐啦

我：估唔到你真係會買啲 其實我都係講下姐

Cherry：梗係唔得啦 唔食嘢點會有精神呀 你睇下 無食早餐咋 你就已經係咁係度訓啦

其實我成日都係咁訓 不過我冇講出聲

淨係同佢講咗聲多謝

佢買咗個腿蛋治比我

咁小食部D質素都係咁上下架啦

唔係好食又唔係難食咁囉

跟住Cherry就過嚟

Cherry：點呀好唔好食呀

我：還好啦 正正常常咁囉

Cherry：乜真係咁唔掂咩 我聽到D人話小食部D嘢食麻麻 原來真係

我：都慣架喇 我冇乜所謂

Cherry：係啲 乜你唔會係屋企食早餐架咩

我：我老豆老母唔係成日係屋企 我又懶呀嘛 咁所以咪返學嘅時候順便買埋囉

Cherry : 哦 但係點解你早餐會係食菠蘿油嘅 好肥啲

我 : 乜你覺得我會怕肥架咩

Cherry : 好羨慕呀 點解你哋男仔會食極唔肥架

我 : 咁點解你哋女仔咁易肥架

Cherry : 哼 唔理你呀

我 : 唔好嬲啦 我唔喺啦 對唔住大佬

其實講真我都唔知點解我果陣時會道歉

佢又唔係我邊個

Cherry : 哈哈 玩下吓 你估本小姐真係咁易嬲咩

我 : 屌你啦 扮晒嘢咁

Cherry : 你吹咩

跟住兩堂Bafs

佢讀history, Bafs同Phy

所以我同佢會有兩科elective同會一齊上

而Bafs堂嘅時候 佢就坐我隔離

Cherry : 原來我哋撞兩科選修科架啲

我 : 乜咁啱呀 哈哈

其實我嗰時都唔知應該俾D咩反應佢好 所以求其答住先

跟住就上堂啦

認真講句其實我對Bafs真係無咩興趣

只係中三嗰年 諗唔到揀咩科

跟住又見Bafs D成績唔錯 咪試下囉

跟住就奶晒屎

而家我上堂都係盡下力唔好炒就心滿意足

不過個老師真係有D料到

竟然可以keep同一個聲線 講成堂書

仲要係double lesson

我最後頂唔順發下咩咩 訓下覺咁

突然之間

有條友係咁用支嘢篤我

Cherry: 上堂又係到發夢 跟住又要我借筆記俾你抄

冇錯係又

因為我頭三堂都係同周公作下棋咁

咁我隔離嗰個文哥都係到同周公捉棋 不過佢勁D 兩個勢均力敵

我輸得快 所以起身先

跟住我又好厚面皮咁問隔離個行嘅Cherry借筆記抄

真係唔係幾好意思 哈哈

我: 唔該丫唔好咁小器啦 你又靚又叻又大量 我知你唔會介意嘅

Cherry: 你講到咁我就唔介意啦

我: 咪又係死要面

Cherry: 係架 鬼叫你有求於我 咁叻你咪抄第二個囉

我: 咁又唔好

不過講開又講

Cherry手字真係幾靚

之後我抄第二啲人嗰陣 嘩我頂你個肺我真係睇唔明

問一句就抄一句

咁樣我不如自己做好過

咁好衰唔衰 我懶呀嘛

睇Cherry份野好好多

起碼一睇就知佢寫乜

我：你D字又真係幾撚靚嘅 呢個算係你唯一優點

Cherry：我仲有好多優點係你未知啫

我：又靚又叻又大量丫嘛 啱啱先讚完你

Cherry：雖然明知你唔係真心 不過都多謝啗

第四章

話咁快就上完個兩堂

跟住就放飯

咁我都係同我班兄弟食架啦

我哋去咗附近嘅一間茶記到食

一坐底 佢哋就係到傾今日個班交換生

強哥：喂 你哋班個D交換生點呀 我哋個班有一個女仔都唔錯架

傑仔：我個班個D就唔好提喇 個個都係珍禽異獸 不過我同其中一個男仔一齊坐 叫做幾啱傾

文哥：嘩 大佬 你連仔都食 咁撚癲

金仔：~讓那 彩虹長橋無限伸展~

傑仔：屌 你唔好再吹大啲 我不撚都係直嘅

阿軒：聽住先啦 係嗰 咁毛哥你個班又點呀

文哥：你唔好話呀 毛哥已經同其中一個女仔係咁傾計啦 人哋仲要請佢食三文治添呀

我：我屌你啦 咪話咗唔係咁囉

跟住我又將今朝嘅事話畀佢哋知

金仔：睇黎要叫個Cherry小心啲先得 毛哥又要發功溝女啦

我：收啦你 出少句聲冇人話你啲架

唔好睇佢哋講到我咁

我成世人一次拖都無拍過

最多都係暗戀過一個小學嘅女同學

跟住升咗中學之後冇再聯絡 自然就無咗件事啦

但係點解佢哋係咁講到我成個情聖咁

其實我都唔知

無啦啦就俾人講咗一段時間

咁中學lunchtime 同班friend食飯呀都係打下機吹吓水咁啦 無咩特別

咁食完飯就返學校啦

跟住上埋果兩堂就放學

咁聽到放學嘅鐘聲

我就即刻執書包 諗住快啲返屋企血戰召喚峽谷

係我準備走嘅時候 Cherry行咗埋嚟

Cherry : 阿豪 你住邊架

我 : 銅鑼灣囉 做咩呀

Cherry : 我陣間都要去銅鑼灣補習 不如一齊去呀

我 : 哦

於是我就同Cherry一齊行

搭地鐵個陣時 我哋都係吹下水 講下平時上堂D嘢咁啦

不過主要都係佢講

去到銅鑼灣 因為我同佢唔同出口 所以就講拜拜

Cherry突然之間問我

Cherry : 你聽日又去嗰間麵包舖買早餐呀

我 : 如果我無遲到嘅話就係啦

Cherry : 又係菠蘿油 ?

我 : 係呀

Cherry : 乜菠蘿油真係咁好食咩

我 : 我鍾意咁解姐

Cherry : 其實我覺得腿蛋治都唔錯㗎

我 : 還好啦 不過冇得買㗎 小食部個個又唔係咁好食

跟住Cherry好細聲咁講嘢

但係我聽唔到佢講咩

我：你話咩話

Cherry：無嘢啦咁 聽日見啦

我：聽日見啦 Bye

跟住我就返屋企同幾個朋友血洗召喚峽谷

打咗幾鋪之後

我望一望個鐘都成七點幾 有啲肚餓添

我換一換套衫 就落街諗住買嘢食

但係又諗唔到食咩 所以就周圍行下睇下有咩好食

行行下 咦 咁熟口面嘅

係Cherry

正當我想行過去打個招呼嘅時候

我見到有個男仔係Cherry面前同佢講D嘢 跟住再摸一摸佢個頭

Cherry笑到好甜

原來佢有男朋友

咁我都係唔過去阻住人啦

跟住快快手搵咗間三哥食碗米線就返屋企繼續打機

電腦：double kill

電腦：triple kill

電腦：quadra kill

我屌

比人偷頭 無咗個penta kill

即刻無晒心機

拿拿林打埋就熄機 (梗係唔會走場咁仆街啦)

果時先至十點左右

仲未眼瞓

跟住就睇下之前有人介紹我睇果套愛在雨過天晴時

唔係講笑 aimer D歌真係好好聽

但係呢個故事其實都幾有意思

一個17歲女高中生同一個45歲中年男人嘅愛情故事

兩個因為命運戲弄失去夢想 係人生路上失去方向

但係同時又遇上對方 兩個人互相扶持

最後係曾經跌倒的地方重新出發

一段不受世人所接受嘅跨世代愛情故事

兩個人嘅相愛唔單止令佢哋企返起身仲令佢哋認清對方

呢個故事認真有好多思考嘅地方 大家可以試下睇下

咁動漫就睇完 都成一點鐘

又開始有啲眼瞓 咁我就走咗去訓

第五章

去到第二朝

咁我都係同平時無咩分別啦

起身換衫刷牙洗面跟住出門口

返到去學校果頭

見仲有時間就去咗間麵包舖睇下有無菠蘿油啦

今次亦都好正常咁賣晒

咁我見有無咩想食 所以就冇買到

直接番學校

一返到課室 就見到Cherry坐咗係佢自己個位度溫緊書

我心諗 嘩屌洗唔洗咁勤力呀

我都無乜點理 就返返自己個位

咁啱Cherry就望到我

Cherry：早晨呀

我：早晨 咁早就返嚟溫書嘅

Cherry：咁我見冇咩做埋預習吓囉 咁我地學校同呢度嘅進度唔同呀嘛 咪預習吓囉 點解你好似咁劫嘅 冇食早餐咩

我：係呀 咁我見菠蘿油又賣晒 自己有無咩想食 咁咪唔食囉

Cherry：咪話咗唔可以唔食早餐囉

我：咁真係冇嘢好食ㄚ嘛

Cherry係佢個書包到擺咗一包嘢出嚟

Cherry：你擺去食啦 頭先係小食部到買架 諗住陣間小息肚餓嘅時候食 不過見你咁慘就請你食啦

我：唔使啦 我唔肚餓呀

Cherry：唔得呀 你擺去啦 我唔緊要呀

咁我都唔好意思再拒絕

原來係腿蛋治

我：又係腿蛋治 有冇第二樣呀 尋日食過 唔係好掂啫

Cherry：食你就食啦 咁多嘢講 唔洗你俾錢仲咁多要求

我：好好好 對唔住姐姐 你真係又靚女又好人架啫

Cherry：哼 算你啦

咁我擺咗個三文治出嚟啦

一咬

嘩

咁撚好食嘅

Cherry：點呀好唔好食呀

我：唔係講笑 真係好撚正

Cherry：誇張到死 好食就好啦

講完佢笑一笑跟住就繼續溫書

而我就繼續食三文治

咁食完個早餐之後

我見無乜嘢做 咪又係到訓覺囉

唔係點呀

你唔係覺得我會溫書下話

頭三堂分別係 中文同double數學

咁都無乜特別啦

中文咪記下範文囉

數學咪又係係度做卷

去到中五都教得七七八八架啦

唔係操卷仲可以做咩吖

終於第三堂都完咗 可以放小息

文哥：嘩屌 終於完撚咗啦 唔係講笑 好撚劫 瞓陣先

我：阿文哥 你好似三堂裡面有一半時間都係訓覺架啫

文哥：你理撚得我啫 去溝你嘅女啦

我：你食屎啦 鬼唔望你訓撚到猝死呀

唔知大家係咪咁呢

中學嘅時候同班朋友係度屌屌去

其實大家都唔係鬧交 只係大家知道大家都係講下笑 玩下

呢啲都係同朋友相處嘅方式

畢咗業之後

大家各散東西

少咗聯絡

雖然你之後都可以識到其他朋友

但係你好難再感受到中學果時同朋友相處嘅果種感覺

所以我成日都同自己講

一定要好好珍惜身邊嘅人

無佢咁嘅話 你唔會係依家嘅你

同埋有啲嘢冇咗就係冇咗

冇得返轉頭

但係我到最後都係冇辦法留住身邊嘅人

可能呢啲真係整定啦

都係唔好拉到咁遠

返返嚟先

幾經辛苦終於捱到去lunchtime

又係同佢哋幾條友食啦

金仔：喂 毛哥 今朝見你同cherry係班房好似有講有笑咁喎

我：咁你都見到 無呀 佢見我無食早餐 咪請我食過腿蛋治囉

金仔：少有喎 你唔係除咗菠蘿油之外 唔識其他嘢做早餐架咩

我：賣晒呀嘛 咁我又唔好意思拒絕佢 話時話乜小食部換咗個阿姐咩

金仔：我都想呀 佢D嘢難食到呢

咁點解今朝嗰個咁好食嘅

不過算啦 可能咁啱有一個比較好食掛

「唔知我可唔可以整到一個佢鍾意食嘅腿蛋治呢」

第六章

第二朝

唔知點解我尋晚會唔記得較鬧鐘

完全唔知醒

咁返到學校就梗係遲到啦

我都冇辦法 要怪就要怪自己無記性啦

咁罰完企 就緊係返課室架啦

啱啱坐低Cherry就問我

Cherry：點解你今日咁遲返嚟嘅

我：冇呀 唔記得較鬧鐘 咪遲到囉

Cherry：咁你今日咪無食早餐囉

我：係呀

Cherry：咁你擺去食啦

跟住佢就係書包度羅咗個袋嘢出嚟 遞咗俾我

我：咩黎架

Cherry：腿蛋治囉

我：你有無咁鐘意食腿蛋治呀

Cherry：咁你係咪唔食佢 咁多嘢講

我：食啊食啊食啊

點解我好似咁緊張咁嘅

可能真係肚餓掛

是但啦

我：唔係講笑 認真問 呢個真係係小食部果度買？

Cherry：係呀做咩

我：點解小食部D嘢食突然之間咁好味嘅

Cherry：可能見我靚女咪俾心機D整囉

我：實係咁啦

Cherry：咁你唔好信囉

我：我信呀 Cherry姐咁靚 我以為個阿姨會唔抵得跟著落毒姐

Cherry：口花花

講完佢就係度偷笑 擰返個頭去前面

係呢個時候

我感覺到一股寒氣係我背脊

又係文哥

我：大佬呀 你可唔可以唔好用啲咁嘅眼神望住我先

文哥：你唔係好專心咁溝緊女嫁咩 咁得閒理我呀

我：你唔好去死 都話咗唔係溝女咯

文哥：咁睇嚟要你教下我點先叫做溝女啦嗱

我：我真係費搵事睬你 總之我同佢真係普通朋友

文哥聽到我咁講都無繼續落去 繼續訓覺

叮噹叮噹～

鐘聲響起歸家的訊號

話咁快又放學lu

Cherry突然之間拍我膊頭

Cherry：你而家係咪返屋企呀

我：唔係呀 我今日要去校隊訓練

係呀 我都唔記得同大家講其實我係足球校隊架

不過我學校唔算好勁 叫做唔差咁啦

文哥佢哋都係校隊嘅人

Cherry：哦 咁你哋逢星期二訓練？

我：逢星期二四放學後囉

Cherry聽到之後「哦」咗一聲就行開左

我等埋文哥佢哋之後就一齊搭車去訓練

咁校隊訓練嚟嚟去去都係咁啦 所以就唔講啦

訓練完之後已經差唔多八點

我同文哥同阿軒三個人就一齊去食飯

阿軒：毛哥你而家同個Cherry點呀

我：乜野點呀 咪朋友囉 可以係咩啫

文哥：但係我見佢係咁請你食三文治啫 仲唔係有嘢

我：咁佢見我無食早餐先請我食姐 況且人哋有男朋友架啦

二人：你又知人哋有男朋友

我將個晚見到嘅嘢話俾佢哋知

阿軒：唔撚係掛 咁佢係咪收你兵

我：你問我我問邊撚個啫

文哥：你都係小心啲好啫

我：屌都話無嘢咯 我對佢真係朋友咋

兩條友就係度望住我陰陰咀咁笑

食完飯之後 我哋都各自各番屋企

我同佢哋唔同路 所以就行先

返到屋企 沖完涼之後 就攤咗係張床度

好撚劫

所以我都好快瞓著

(我今日記得較鬧鐘架)

我見到一個女仔

好熟口面

但係我講唔出佢係邊個

佢同我揮手 好似叫我跟住佢

但係我發現我郁唔到

我：喂 我郁唔到呀

佢無理到我 轉身就走

我：唔好走呀 喂 喂 喂

佢好似聽唔到我講嘢咁

繼續走

等埋呀...

唔好掙低我...

唔好走呀.....

第七章

我擘大眼

我屌

原來係夢

點解我塊面濕濕地嘅

我攤隻手去抹塊面

眼淚!?

唔哼係呀

發個夢姐 唔洗喊咁誇張下話

是但啦唔理

我望一望個鐘

而家先6點

咁我都費事訓返

就咁攤係張床度碌下手機

差唔多夠鐘就換衫返學

我見今日咁早

就緊係去睇下有冇菠蘿油食啦

但係又真係咁好彩被搵到最後一個嗰

有包就梗係襯熱食啦

於是我就一路行一路食

小弟本身係果啲鍾意享受嘢食嘅人

所以我返到課室果陣時都咬緊個包

唔係講笑

其實我都已經算係好早返學個批人

但係唔知點解每次一入課室嘅時候都會見到Cherry已經坐咗係課室入面溫緊書

我：其實呢 我一直都有個問題想問你

Cherry：咩呀

我：你係咪喺學校度住架

Cherry：唔係呀 點解你要咁問呀

我：如果唔係點解你每日都可以咁早就返到嚟嘅

Cherry：其實都唔係好早姐 可能我慣咗早起身掛

跟住Cherry望到我手上面個包

Cherry：咦 你今日買到菠蘿油呀？

我：係呀 今日真係好好彩 呢個係最後一個黎架

Cherry：恭喜晒啫 哈哈

唔知點解 我硬係覺得Cherry有少少怪

佢好似.....

強顏歡笑？

我都唔知 可能錯覺啦

佢應該唔會係想我食唔到菠蘿油咁衰掛

到後來我先知道

原來有好多嘢一直都已經擺咗係自己面前

但係就因為自己冇好好留意身邊嘅人或事

所以去到最後連失去咗某啲嘢都唔知道

要怪就只可以怪自己冇細心咁去關心四周

明明可以好容易就發現到嘅嘢

但係自己就不斷錯過發現嘅機會

可能呢啲就係所謂嘅命運掛

有啲嘢真係整定

無論你花幾多心機去改變

結局都係唔會改變

死嘞

點解成日都會講到離題嘅

都係返返嚟先

咁呢日返學就無咩特別啦

話咁快又放學

Cherry又走嚟搵我

Cherry：阿豪 你而家係咪返屋企呀

我：係呀 做咩呀 想約我？

Cherry：算係掛 其實我住灣仔個頭架 不如一齊行啦

我：Cherry姐問到 我實話得架啦

Cherry：咁行啦

係呢個時候阿軒入咗嚟

阿軒：毛哥 記住今晚7點柴灣呀

我：得啦 你真係當我失憶架咩 晏晝提完而家又提

Cherry：你今晚有嘢做？

我：其實無咩大不了啫 我哋間唔中會約埋一齊踢街場 咁啱聽日學校放假 咪今晚踢囉

跟住喺返緊去嘅時候

Cherry：你不如唔好成日早餐都食菠蘿油啦 始終都係唔健康架嘛

我：咁我鍾意食呀嘛 你理得我啫 做咩無啦啦咁關心我呀 我靚仔姐 都唔好咁吖 怕醜架

Cherry：有無人話過你真係好自戀呀 直淨係自大個隻

我：下 我D字唔係好大咋喎

Cherry：其實唔係幾好笑架咋

我：唔好咁啦 我都諗咗一陣架

Cherry：哈哈哈哈哈 好好笑呀咁得唔得呀

我：係假咗少少嘅 不過見你肯俾面就勉強收貨啦

Cherry：咁點呀 你可唔可以唔好成日菠蘿油呀 我唔想有一日喺C1都見到
「本港中五學生因每日進食菠蘿油作早餐 突然爆血管 在學校暴斃」

我：有無人話過你D想像力真係好撚豐富呀 連標題都諗埋 咁但係我唔識菠蘿油可以食咩
我唔係乜撚都食

Cherry：你咪食腿蛋治囉 最多我請你啦

我：有靚女請就唔同吖 咁就多謝先啦 Cherry姐

Cherry：乖

明明一早就係面前

但係點解我會發覺唔到

第八章

卒之到咗下個禮拜

我都係如常咁返學啦

差唔多返到學校嘅時候

我都好慣性咁去咗個間麵包舖

咁我見到有菠蘿油

就即刻買咗

買完之後 先突然之間醒起

係嗰

Cherry好似話會請我食早餐

算啦佢都應該係講下架姐

點會無啦啦請人食早餐㗎

嫌錢多咩

說服咗自己之後 就開開心心咁食包返學

返到課室

又係得Cherry一個坐咗係自己個位度溫書

Cherry：咦 返咗嚟啦 早晨

我：乜又係你呀 成日都咁早嘅

Cherry：咁我習慣咗早啲起身返學㗎嘛 等自己個腦熱下身清醒下

跟住佢好似望到我個菠蘿油

Cherry：咦...你...又話唔再食菠蘿油嘅

我：咁我今日見到有呀嘛 咁就梗係買咗先啦 唔係我食屎咩

Cherry：我咪話咗請你食三文治囉

我：你唔係講下咋咩

Cherry：哦 係呀 我真係講下架咋 你其實可以唔洗理

我：對唔住啦 我真係以為....

Cherry：唔洗講對唔住 你冇錯 係我連自己講笑都唔知姐

我開始有少少燥底

我：咁係乜嘢 無啦啦同人講話請人食早餐 咁就緊係當你講笑架啦 撻知你原來講真架咩

Cherry啤一啤我之後 就無再理我

點解我好似見到佢隻眼濕濕地嘅

眼淚？

咁我又真係衰啲嘅

應承完人哋之後

轉個頭就唔記得左

我拍一拍佢個膊頭

我：又靚又大方嘅Cherry姐 可唔可以請我食個三文治呀

Cherry：你有菠蘿油仲使乜要我個三文治啫

我：咁我肚餓乜嘢

Cherry：肚餓咪食埋佢囉 你又未食晒

我：菠蘿油邊度夠三文治健康呀 我唔想咁快爆血管呀

Cherry：唔健康你又食

我即刻搽咗個菠蘿油

對唔住大佬

原諒小弟咁浪費

依家氹返人要緊

我：冇呀我無食呀 你話請我食三文治架嘛 快啲啦 我好肚餓呀

Cherry : 好啦好啦 請你食啦

跟住係佢個書包擺咗個三文治出嚟

我 : 謝娘娘賜包

Cherry : 低能

氹返你 低能少少都要㗎啦

講完之後佢就拎返轉面

雖然個語氣都係好嬲咁

但係其實我見到你係度偷笑緊架

我 : 乜真係小食部度買架

Cherry : 係呀 講咗幾次啦 唔係小食部買 點會無啦啦有個包呀

我 : 可能你整比我呢

Cherry : 我...我點解要整比你㗎

我 : 我點知你啫 可能你見到我咁撚靚仔 咁為咗得到我個心 想征服我個胃都好正常㗎

Cherry : 死人自戀狂 我...我點會花咁多時間整個三文治俾你呀

我 : 哈哈 又係嘅

跟住Cherry又係度好細聲咁講嘢

我 : 你講緊咩呀 細聲到好似同自己講嘢咁 聽條撚咩

Cherry : 冇...冇嘢呀 你食你嘅包啦

唔講

算

咁我都無再理佢

我屌

好撚飽呀

下次真係要好好記住人哋講過嘅嘢

如果唔係真係食屎都唔掂

不過諗返轉頭

我都唔知點解當時會咁緊張

可能果時嘅我唔想冇咗個朋友掛

不過我都要多謝當時嘅自己

有時自己做咗一啲好細嘅決定

但係呢啲決定都可能會影響到之後嘅事

所有唔同大大小小嘅決定

都可能會令你之後嘅人生有好大改變

如果一個三文治真係可以得到你個心就好喇.....

第九章

話咁快夠鐘放學

文哥：喂 毛哥陣緊五點維園踢波 你跟唔跟

我：好呀 咁我返去搵件衫先 陣間見啦

文哥：Ok

跟住我就諗住爽手返屋企冲個涼就去踢波

Cherry：你而家係咪返屋企呀

我：係呀 你去補習？

Cherry：叻仔嗰 仲記得我幾時補習

我：我不嬲對靚女嘅嘢特別上心㗎啦 咁一齊行？

Cherry：口花花 行啦

咁我哋就一齊搭地鐵去銅鑼灣果頭啦

去到銅鑼灣

我諗住同佢講拜拜嘅時候

Cherry：我未夠鐘補習 你可唔可以陪我行下 你得閒架可

我望一望隻錶

16:02

我：都可以嘅 我仲有時間

Cherry：咁行啦

跟住佢就拉咗我去附近一個商場周圍行下

Cherry：係嗰 你幾時生日架

我：做咩無啦啦問我生日呀 想幫我慶祝

Cherry：你唔好理啦 講啦

我：8月16囉

Cherry：咁即係獅子座？

我：好似係 做咩

Cherry：真係獅子 我聽講獅子座同白羊座好夾架

我：話咗你鍾意我架啦 你又唔認 喺度借啲意扮睇星座

Cherry：你真係好無聊呀 我點知你係獅子啫

我：咁你即係幾時生日呀

Cherry：4月18呀

咁我哋就繼續行住吹水

突然之間有幾個細路走嚟走去

跟住有一個細佬就無啦啦撞到Cherry

Cherry「哎咗」就跌咗落地

果幾個細路嘅父母就過咗嚟道歉

我：點呀你行唔行到呀

Cherry：隻腳有啲痛咁啦

佢慢慢企咗起身

跟住拐下拐下咁

我：你好似好唔掂咁喎

Cherry：無事呀

我：過嚟啦

跟住我帶咗佢去張凳度坐

我：比隻腳我睇下

Cherry：唔使啦 真係冇嘢

我：擺嚟啦

我幫佢除咗對鞋 拉低咗隻襪

擘屌

我：仲話冇事 隻腳腫撚過你個頭呀 扭親又死頂

Cherry：咁我唔想你擔心呀嘛

我跔低咗係佢前面

Cherry：做咩呀

我：上嚟啦 你而家咁樣都補唔到習架啦 咩你返去呀

Cherry：唔使啦 你仲有嘢做 我抖陣就無事架啦

我：得啦上嚟啦 死要面

Cherry：我好重嫁禍

我：上嚟啊 再嘈我真係唔撚理你架

跟住Cherry就上咗嚟

我比咗件襖佢

我：你綁住呢件嘢啦 費事你走光

Cherry：唔該

佢綁完之後就訓咗係我背脊上面

我睇唔到佢個表情 可能劫掛

跟住係佢一路導航

講真 你問我有冇因為摸到女仔隻腳就打晒飛機咁

冇 真係冇

我嗰陣時淨係喺度諗 點解呢個女仔可以咁唔小心

我終於送到去佢屋企

Cherry：唔該晒 你係咪趕時間呀

我望一望個鐘已經就嚟5點

我：唔趕lu 過晒鐘

Cherry：sorry吖 搞到你要甩人底

我：唔緊要啦 係我話要咩你嘅

Cherry：坐低飲杯嘢先啦 見你今日咁好人咩我返嚟

我：唔阻住咩

Cherry：唔阻呀 我daddy mammy 不嬲都夜返

我：咁就麻煩晒啦

我擺咗部手機出來whatsapp咗文哥佢地話突然有事嚟唔到

Cherry會跳下跳下咁去咗廚房

咁我就周圍望下啦

就咁坐係度好柒架嘛

佢屋企都算幾大 兩房一廳 客廳可以望到去時代廣場果邊

呢個時候Cherry擺咗杯嘢埋嚟

我：唔該 係呢 你係獨生女？

Cherry：我係呀 你都係？

我：我有個阿哥不過佢一早同女朋友去咗澳洲果邊住 大時大節先返嚟

Cherry：其實我一直都好想要一個哥哥或姐姐架 我好想試下比人照顧嘅感覺呀🥺

我：你就想呀 比人照顧 你知唔知我細細個嘅時候成日俾佢蝦架

Cherry：唔會啫

我：真係架 佢成日係度整蠱我

Cherry：咁原來獨生都唔錯呀吖

我：屌

就係咁我同佢吹多陣水就準備走

臨走嘅時候

Cherry：你可唔可以比你電話我啊

我：咁快想抄我牌 古惑呀你

Cherry：你真係好煩呀 我諗住悶嘅時候可以搵個人吹下水咋

就係咁我哋就交換咗電話號碼

有你電話咁我掛住你嘅時候咪可以搵你囉

第十章

我返到屋企之後

咁啱就收到個Whatsapp

Cherry：你返到屋企未呀

我：你其實係咪跟蹤我 點解我一返到你就問我

Cherry：因為本小姐勁囉

我：嘩 咁我唔頒個獎俾你都唔撚得啦

Cherry：使唔使咁寸呀

我：講吓笑啫

Cherry：記住聽日唔好再買菠蘿油喇

我：我盡量啦

去到第二日 一樣咁如常返學

係我準備去麵包舖嘅時候

我醒起

係嗰Cherry話請我食早餐丫嘛

好彩記得啫 如果唔係又仆街

返到課室

Cherry就即刻問我

Cherry：你今次係咪又買咗菠蘿油呀

我：點會呢 有免費早餐咁點會俾錢去買多個早餐呀

Cherry：算你啦

跟住佢就俾咗個三文治我

我：係嗰 你隻腳點呀 冇事喇咩

Cherry : 好咗好多啦 尋晚敷咗一陣 好快就消咗腫喇

我 : 咁都無事 算你好命

Cherry : 喂呀 你把口好小小唔會死掛

我 : 講吓笑啫 Cherry姐咁好人唔會嬲嘅

Cherry突然係度搵我隻手

我 : 屌 痛痛痛痛 痴撚線 無啦啦搵人都得嘅

Cherry : 哼 鬼叫你咒我 睇下你仲敢唔敢

我 : 嘩 梗係唔敢啦 咁樣搵法 容乜易斷架

Cherry : 成日都誇張到死 係咪真係痛啊

我 : 其實無咩事 你見我咁大隻就知我唔怕痛啦

Cherry : 你大隻 真係睇唔出啲

我 : 比下面都好掛 話晒尋日都咩你返屋企吖

Cherry : 嘩 你真係好大隻呀 得唔得呀

我 : 真係假得滯 算 我大方比你過啦 第二個我一早屌柒左佢hea鳩我喇

Cherry : 咁多謝呀

我 : 無辦法 鬼叫靚女有特權

Cherry : 成日都係咁口花花

我 : 對住你姐

佢笑一笑之後就無理我

今日有pe堂

我哋班今日係同C班一齊上

唔記得咗講添

我, 文哥同Cherry係B班

阿軒, 金仔同強哥係C班

阿峰同傑仔係D班

咁今日pe堂啦

我早咗換完衫 就去咗同Cherry吹下水咁啦

阿軒佢哋一見到我同Cherry 就行埋過黎

三人：阿嫂你好

我：屌你地啦 乜搵嘢阿嫂呀

我望一望Cherry 塊面紅到呢

阿軒：遲早都係啦 早啲叫定習慣下呀嘛

金仔：咪就係 唔係咁小器下話

我：我就話慣晒冇咩嘢姐 人地唔係架嘛 陣間覺得你哋痴漢就唔係幾好啦

強哥：屌你啦 人哋欸都未欸過 你做咁多嘢做咩啫

Cherry係呢個時候拉一拉我衫袖

Cherry：唔緊要啦 我又唔介意 佢哋都係玩吓啫

我：嚟 我就比面Cherry唔屌你哋 退下

三人：謝主隆恩

又肯陪我玩啫

咁跟住堂pe堂 我都係同佢哋踢波啦

咁Cherry就同返其他交換生玩

冇咩特別就唔講啦 去到食飯

阿軒：頭先我哋叫Cherry做阿嫂嘅時候 見唔見到佢塊面幾紅呀

強哥：係呀係呀 我都冇諗過佢會有咁嘅反應

金仔：我本來以為佢都係笑吓就算

傑仔：都話人哋鐘意你架啦 毛哥你仲唔去馬

我：面紅就代表鍾意咩 況且我都係對佢有少少好感咋嘛 又未到鍾意 同埋都話佢有男朋友咯 唔通無啦啦叫佢分手咩 而家咁都唔錯吖

文哥：你之前都話你淨係見到個個男仔摸下佢個頭咋嘛 可能係佢阿哥呢

我：我問過啦 佢話佢係獨生架

阿峰：但係我都仲係覺得佢唔似拍緊拖

傑仔：如果佢有男朋友 咁仲點會成日搵你放學吖 唔使陪人咩

阿軒：我都係咁諗 不如你再試下佢啦

我：屌 是但啦 我又冇話好想拍拖 做咩啫而家

文哥：你就真係做咩呀 你自己問心 你係咪真係唔鍾意佢呀

我答唔到

但係我見到佢受傷 我就好想睇住佢

見到佢同其他男仔咁親密 我個心就好似有啲嘢銀住咁

但係我真係唔清楚自己係咪鍾意佢

我：我都唔知 我都好搵亂呀

傑仔：唉 我都唔知你點算 一係咁啦 我同我個班個個交換生幾熟 我試下幫你收下風啦

金仔：我哋都盡量幫你架喇 你自己生性啲啦屌 成日唔嚟唔吊咁 真係睇見都燥底

我：多謝你哋

強哥：屌 講呢啲 兄弟就緊係盡力幫架啦 食飯啦

真心 有呢班兄弟真係好好彩

第十一章

咁好快就到咗10月份

話說我哋學校有個傳統就係會係10月搞個班際足球賽

我都唔知點解會有啲咁嘅傳統

我應該講過我哋一組7個兄弟全部都係足球隊

咁我哋就緊係全員參加啦

不過可惜嘅係我哋唔同班冇得一齊大殺四方

同埋有一樣嘢 我哋唔同班 即係我哋住定要兄弟之間互相廝殺

唉 無辦法

為咗我哋班

兄弟

唔好怪我唔留情

咁我哋幾兄弟裡面

我同文哥係B班

金仔, 阿軒同強哥係C班

而阿峰同傑仔就係D班

經過抽籤之後

由於呢個比賽係分高年級組同低年級組

咁仲好冇咁煩

比賽分別會係lunchtime同放學後打

成個比賽由16強打到去決賽

我哋3班頭兩輪都好輕鬆贏晒

話晒都係足球隊主力點都可以carry下嘅

去到4強抽籤

我哋班會對一班中六

但係唔會難打因為果班裡面得兩個校隊主力重要唔算特別勁

但係咁就代表另一組4強會係5C對5D

唉 始終都係要兄弟內訌

先講一講

我哋呢個比賽係6人賽 一場打40分鐘 分上下半場中間有5分鐘休息

我哋班打先

係我同文哥嘅帶領之下

我哋班輕輕鬆鬆入決賽

咁我哋就緊係去睇下佢哋表現成點啦

放學嘅時候

Cherry：你係咪會去睇比賽呀

我：梗係啦 下場嘅對手嗰 點都要睇吓嘅

Cherry：咁一齊啦

我：嘩 大佬 我靚仔姐 都唔洗成日痴住我掛

Cherry：自戀 我得鬼閒嚟住你呀 我睇我個朋友咋嘛

我：佢讀呢間學校架咩

Cherry：唔係呀 佢同我一樣都係交換生嚟架

跟住我見未開波就梗係落去同佢哋吹下水啦

金仔：死啦 今場又贏點算好呢

傑仔：我哋有阿朗係度你哋都幾難贏

我：邊撚個阿朗呀

傑仔：佢係其中一個交換生嚟架 之前我話幾好傾果個人咪佢囉

係呀 我哋呢個班際比賽係容許交換生參加

傑仔：睇下就講就到

佢指住個男仔

個男仔.....

咪係Cherry男朋友囉

阿朗：hello 大家好 我叫阿朗呀 陣間錫住細路呀 我唔係好叻架咋

傑仔：嘩 屌你講啲咁嘅嘢 我地都係靠你先打到上黎咋 係啲 呢啲就係我之前講果個毛哥🤔

我：Hi

阿朗：Hi 聽講你想知道Cherry有冇男朋友啲

我心諗嗰個咪你囉

咁當然我冇講出聲啦

我：叫做有小小興趣啦

阿朗：你放心 我可以好肯定咁同你講 Cherry一直以黎都係單身

我：吓 你唔係佢男朋友咩

我將果晚見到既野同佢講

阿朗：哈哈 其實呢 我同佢係青梅竹馬 由細玩到大架喇 果日只係咁啱撞到咪吹下水咁囉

我：唔係啲 我見你仲摸佢個頭 跟住佢笑得好開心架

阿朗：佢不嬲都好鍾意人摸佢個頭㗎 算係佢一個比較奇怪嘅喜好
不過當然係佢身邊嘅人先可以咁做啦

我：原來係咁 哈哈

文哥突然繞住我條頸

文哥：咁毛哥你而家唔撚使驚可以去馬啦

阿朗：原來你鍾意Cherry咩 我可以幫下你啲

我：你咪聽佢地亂噏啦

跟住佢哋就差唔多開波走左過去熱身

而我同文哥就上左看台睇波

上到去Cherry就同我地揮手

Cherry：你地頭先同阿朗傾咩呀

我：冇呀 咪講下你壞話囉

Cherry：哼 知你冇咁好架喇

我：講下笑姐 唔好嬲啦Cherry姐

係吹緊水嘅時候

「呸」

雞聲一響

班際足球賽4強

5C對5D

正式開始

第十二章

C班開波

一開始C班選擇採取控球在腳嘅模式

其實我覺得咁樣有少少無謂

而家嘅對手有幾多斤兩

大概都清楚 始終都係自己學校嘅人

但係一場比賽入面節奏係好重要

邊一邊控制到比賽嘅節奏

個一邊基本上可以話係贏咗一半

但係另一邊 D班不斷採取全場高壓逼搶

不過都估到 因為傑仔同阿峰係嘅體力喺足球隊裡面係首屈一指

但係個個阿朗D體力都唔錯

我：Cherry姐 阿朗係咪都有踢開波架

Cherry：係呀 佢由中一開始就成日都踢波㗎喇

文哥：其實望到佢D走位同腳法都估到佢係有啲料到

我：咁希望阿軒可以贏到啦 始終C班個龍係阿邦 應該都頂得順嘅

阿邦係我哋學校嘅神龍

唔係講笑

佢仲要係踢港隊青年軍

咁你都大概估到佢幾勁啦

係呢個時候

C班有條友斬高波撻Q

粒波落咗去阿朗隻腳到

正常都應該會慢慢傳落去

跟住組織進攻

做乜撚嘢呀

阿朗係呢個時候拉弓

唔撚係呀

三十幾碼

你當你係謝拉特咩

事實證明我先係巔鳩

阿朗一起腳 粒波直吊入禁區

靚撚到呢

傑仔把握機會 諗住窩利

好彩阿邦反應快係傑仔掂到粒波之前沒收咗

如果唔係就可能真係係咁先

我同文哥係呢個時候對望住

呢個阿朗真係唔撚簡單

睇嚟C班真係大鳩鑊

比賽大概去到17分鐘

阿邦一個龍門球直接傳咗俾左路嘅金仔

金仔帶住粒波由中場爆到去三閘線位置

呢個時候金仔稍為一個假身呢過咗對面嘅防守球員

然後用左腳一下橫推 拉弓

跟住就嚟個沙比式嘅高空橫傳

粒波直接吊入去禁區入邊

全場觀眾即刻叫晒春咁

強哥係呢個時候擺脫咗本來睇住佢嘅防守球員
跟住一個獅子搖頭 頂咗粒波去龍門右上角
雖然個龍已經撲到盡 可惜都爭四分一個手掌位

1:0

強哥即刻衝咗去同金仔攞埋一舊

咁呢球又真係唔錯嘅

平時足球隊訓練嘅默契都出晒黎

冇幾耐球證就吹雞

上半場結束

咁我同文哥都冇落去

橫掂好快就開始下半場

不過Cherry就落咗去搵阿朗

點解我個心又有少少唔舒服咁嘅

Cherry同阿朗講咗幾句就返咗上嚟

我：咁快返上嚟嘅

Cherry：冇呀 都係同佢講聲加油咋嘛 咁佢輸緊 就要鼓勵下佢架啦

無耐 下半場就開始

一開始都係猜下波

傑仔傳咗俾阿朗

阿軒睇準時機諗住上去偷波

點知

阿朗竟然一下施丹轉身就過咗阿軒

我同文哥都呆撚咗

不過我哋更加估唔到之後發生嘅事

阿朗佢諗都無諗 一個右腳拉弓

整咗個超遠嘅腳面拉西

十足十哥雷斯馬2018年世界盃對伊朗個球咁

粒波越過晒所有後防 以香蕉形嘅軌道直衝龍門左上角

阿邦嘅反應已經算快

但係都慢咗少少 皮球擦過阿邦隻手入籠

1 : 1

全場除咗阿朗之外都呆撚咗係度

呢球真係好撚靚

入咗都有辦法

完全唔係阿邦嘅責任 佢已經盡咗力

下半場19分鐘

阿軒一個直線交咗畀金仔

金仔用佢嘅速度爆過咗兩個後防

然後之後一下抽埋去

可惜 對面龍門都唔係流

竟然一個一字馬 僅僅踢走咗粒波

阿峰即刻將粒波傳比阿朗

阿朗將粒波推到三閘線位置 一下變速過咗強哥同另一個球員

係佢眼前嘅淨係得返阿邦

阿朗控一控粒波 一下橫推 推過咗阿邦然後輕鬆射入空籠

1 : 2

係呢個時候

嘩！嘩！嘩！

完場

C班臨尾俾人絕殺輸咗

我, Cherry同文哥即刻落咗去搵佢哋

只係見到阿朗同金仔佢哋一齊坐咗係地下

強哥：屌你咁搵勁嘅

傑仔：話咗係佢carry我哋成隊架啦

阿朗：我都係好彩啫

我：屌你啦 咁都好彩 你可以獨中六合彩添啦

Cherry：你頭先真係好勁呀 跑得好快 仲好大力添呀

阿朗：ok啦 係嘞 毛哥 下場對你嘞 記住手下留情呀

我：咁即係漏打姐

阿朗：講吓笑啫

果陣時我真係有啲湊底

唔係講笑佢真係好搵勁

況且我哋班嘅陣容真係唔勁

要贏真係有啲難度

雖然已經keep住同佢哋訓練但係都會爭啲

希望無事啦

第十三章

去到下個禮拜

等咗咁耐終於來到呢一日

咪住先

點解講到好似大結局feel 咁嘅

是但啦

今日lunchtime會係班際足球嘅決賽

你問我有冇緊張

話冇就一定係呃你嘅

個阿朗咁撻勁

但係都無辦法啦

今日一早返到學校

Cherry就俾咗個三文治比我

Cherry：你今日決賽要加油啊

我：你唔係支持阿朗架咩 點解同我講加油

Cherry：咁而家我想你加油係咪唔得先

我：緊係得啦 女神同我講加油 咁我仲唔出盡奶力去踢咩

Cherry：成日都誇張到死

跟住嗰日成日都係到訓覺

補充體力呀嘛

你識撻咩

終於

終於

終於

重要嘅事要講三次

去到lunchtime

係終局之戰嘅時候

咁出場陣容都無咩點變啦

唔講咁多

即刻開波

嗶

班際足球賽高級組決賽正式開始

比賽一開始

我哋都係猜下波先

正常㗎 未入狀態呀嘛

唔通一開波就鳩爆咩

3分鐘嘅時候

我個班其中一個後防斬左交波比我

迎面而來嘅係阿峰同一個後防球員

我一個假身已經過咗一個球員

突然之間 阿峰係我面前落剷

我心諗

痴撚線

硬地都剷波咁癲咩

我緊係唔會比佢得逞啦

一下左腳橫推

再跳一跳

等佢剷空氣

然後繼續奔向對方禁區

阿朗已經係度係咁逼我 諗住用佢嘅身形逼到我飛走

但係佢點都估唔到我之後落嚟做嘅嘢

我首先用右腳腳面橫推一下

阿朗成個人向左移 試圖進一步逼我

點知.....

我喺呢一瞬間即刻用腳內側將粒波拉返去左邊

阿朗呢個時候即刻失去重心

瞬間一字馬咁坐左係度

呢一招就係細哨當年嘅得意絕技 *Elastico*

我係靠之前係街場日踢夜踢練番嚟嘅招式

呢個時候全場都喺度歡呼

阿朗好似仲要呆撚咗咁

我跟住繼續爆落底線

然後之後一個傳中比文哥

文哥好輕鬆托一托粒波就搞掂

1 : 0

D班開波之後就開始一系列嘅猛攻

傑仔帶住波一直推到禁區邊

文哥就一直係度迫佢

當文哥差唔多成功卡位嘅時候

傑仔用腳外側輕輕一撥

通咗文哥渠

跟住再靈巧咁射近柱

1 : 1

唉

~ 又回到最初的起點 ~

無辦法唯有繼續啦

唔係可以點

無耐之後

上半場結束

我哋都冇咩特別講戰術

專心踢好下半場好過

下半場開始

大家一直都係互相拉鋸著

16分鐘

即係話我得返4分鐘

我係左路接應文哥嘅橫傳

然後一個elastico fake過咗一個球員

然之後再加速衝向禁區

隊友見到都開始走位 想我傳俾佢

但係真係對唔住喇

救世主一定係我

我去到k角位

阿峰即刻衝過來一個箭步諗住阻我去路

我左腳一推

過咗

阿朗係呢個時候出現喺我右手邊 仲想推鳩我

好彩我重心比較低

佢推唔跌我

我用右腳一的 就越過咗阿朗

然後就到傑仔想迫甩我

我首先用elastico幫我擺返少少空間 再爆入去禁區

果時佢同我相距大概半個身位左右

對面嘅龍門已經出緊迎 準備化解我呢一個攻勢

我等

等

等

喺佢訓低嘅時候

好冷靜咁挑一挑粒波

皮球越過龍門

佢雖然伸直隻手想進行撲救

但係我話之你隻手同杜蘭特一樣長吖

皮球著地之後慢慢流向近住 跟住越過白界

2 : 1

一定入咗

一定入咗

係反勝呀

阿媽 我得咗啦

咁比賽淨返大約兩分鐘

D班仍然不斷進攻

嘗試搵出缺口

但係我哋已經係度摩連奴泊大巴

佢哋嘅攻勢毫無用處

係接近完場前1分鐘

我再次帶波衝向對方禁區

眼見傑仔衝緊埋嚟

跟住我一個插花.....

轟！！！！

我真係呆撚咗

對面其中一個後防球員係我後面一下收山腳式剷波

將我鏟到飛起

痴撚線

呢下真係中晒我小腿上五吋下五吋

做咗十幾年人都未試過咁痛

我淨係鏈住隻腳係度兜兜去

文哥：屌你 打人去打WWE啦

我果時都好想起身搵柒果條友

但係我真係痛到起唔到身

就係咁我比俾人扶咗我出場

呢個時候球證都吹雞完場

我哋贏咗啦

突然之間有人捉住我隻腳

係Cherry

佢擺咗個冰袋嚟敷我隻腳

佢隻眼好似

喊緊？

Cherry：好心你就小心啲啦 唔好咁搏呀嘛 搞到自己傷晒

我：喂 大佬呀 係嗰條友剷埋嚟 我控制唔到架喎 我應承你下次小心啲啦

Cherry：你係至好呀

我：應承你

佢聽到之後終於到笑返

望住佢幫我敷腳

我望真啲

其實佢都幾靚吖

眼大大

瓜子面

皮膚又白

對人又好

係唔錯嘅

唔知係咪望得佢太入神

佢好似留意到

Cherry：做咩係咁望住我喎

我：見你靚女咪望下囉

Cherry：口花花

我：你咪又係到偷笑

Cherry：唔理你呀

冇幾耐

阿軒佢哋行晒過嚟

強哥：你頭先就勁喇 一扭三仲入埋波

阿朗：我就比你落晒面啦 咁樣elastico 瘀到喊出來

我：咁啱啱

金仔：你食屎啦 咁啱 點呀死得未呀

我：我落地獄之前點都等埋你先落

就係咁

我終於贏咗呢個冠軍返嚟

第十四章

到咗第二日

我因為隻腳起身嘅時候仲係腫到仆街

唔係講笑 真係郁下都痛

咁所以我就直接打電話返學校請假

跟住就全日留喺屋企休息下

去到大概一點嘅時候

文哥打電話俾我

文哥：喂 毛哥 Miss Chou話今個禮拜六晚 請我哋有份踢比賽嘅去佢屋企打邊爐㗎 你得唔得

我：我ok呀 但係你可唔可以幫我問下到時帶多一個人嚟得唔得

文哥：你想帶Cherry？話咗你鍾意人㗎啦

我：唔好咁多事啦 幫我問下啦

無幾耐之後佢就話冇問題

咁我就即刻whatsapp Cherry

我：Cherry姐 你星期六晚得唔得閒呀

Cherry：得阿 做咩

我：冇呀 Miss Chou話請我哋打邊爐 你有冇興趣

Cherry：但係佢請嘅係踢波嗰啲㗎 我去埋唔係幾好意思嘅

我：無問題啦 我問咗 佢都話ok

Cherry：咁好啦 到時一齊去

我：你點話點好啦

咁之後都無乜嘢特別事

我就直接跳去星期六啦

費事你哋話我呢字數

去到星期六

我約咗Cherry晏晝四點係附近嘅巴士站等

我哋諗住過到去周圍行下先再上去

我比預期時間早咗DD去到巴士站

但係我都係等咗一陣 Cherry就嚟咗

我第一眼望到佢

我除咗個靚字之外 我真係諗唔到第二個形容詞

佢今日無再扎馬尾 反而放返D頭髮落嚟 感覺比平時更加清爽

佢著咗一件白裙再加一條黑色legging 同埋一對啡色boot

平時見親佢都係校服無咩特別

但係一著便服 女神級嘅氣質即刻出晒嚟

相反 我淨係著咗一件白色T-shirt同件恤衫 再加條黑色束腳扯布褲 同對白色嘅Nike Joyride

我：嘩 洗唔洗執到咁靚呀 而家去飲咩

Cherry：咩啫 難得放假梗係想着靚啲架啦 有邊個女仔唔貪靚架

我：好好好 你喺 有車喇 行啦

我哋上咗巴士之後 就上咗上層

可能因為我哋近總站 所以都唔係好多人

我哋揀咗個位就坐底咗

當然我梗係俾佢坐窗口位啦 事關我又唔係特別鍾意睇風景

突然Cherry問我

Cherry：你有冇帶耳機啊 我頭先留咗喺屋企呀

我：你好彩呀 咁啱我有帶

佢擺咗我個耳機之後分咗一邊比我

Cherry：一齊聽啦 你有冇特別鍾意邊個嘅歌架

我：無話特別鍾意邊個嘅 不過如果要我揀我會偏向醫神或者周仔啦 幾鍾意佢咁嘅風格

Cherry無再出聲

跟住耳機就傳嚟音樂聲

係醫神嘅無條件

「你 何以始終不說話

儘管講出不快吧

事與冀盼有落差

請不必驚怕

我 仍然會冷靜聆聽

仍然緊守於身邊

與你進退也共鳴」

跟住我感覺到冇嘢壓落我個膊頭度

我望一望

Cherry挨咗埋嚟

我騰前少少個人

俾佢挨得舒服D

佢瞓著咗

由於我未比人挨過 所以我真係完全唔敢郁

我望到Cherry訓得好舒服 就費事嘈醒佢啦

反正有排先到站

話時話 Cherry訓覺個樣真係好可愛 我忍唔住用手机影咗張相

過咗一陣之後

我見就嚟到站 我就叫醒咗佢

Cherry：唔好意思呀 無啦啦就挨住你瞓著咗

我：唔緊要啦 又唔係好辛苦

我唔會話俾佢知 我因為唔整醒佢 所以而家硬晒

我講緊條腰

好撚痛

咁落咗車之後就周圍行下啦

其實女子行街咪又係行時裝店為主

我陪佢去咗好多間鋪頭

佢每一件衫都會拎上手問我靚唔靚

我每次都答「幾靚吖」

Cherry：你每次都係咁講 都唔係認真答嘅

我：咁你真係著邊件都靚呀嘛 我可以點啫

Cherry：口花花

行咗差唔多兩個鐘之後

我哋就過去Miss Chou屋企

第十五章

上到去原來全部人都未嚟

咁我哋咪幫手整住陣間要打邊爐嘅嘢食先

正當我諗住去廚房幫手嘅時候

Miss Chou：阿豪你出去休息下啦 Cherry幫我手得架啦

Cherry：係囉 你今日係嚟放鬆架 抖下啦

既然佢哋都講到咁

咁我做出咗去客廳度坐

喺呢個時候 Miss Chou嘅老公行咗埋嚟

係呀 Miss Chou 已經結咗婚 佢老公叫Kelvin 仲同我哋班好熟

因為我哋周不時都會上去玩

Kelvin：阿豪 聽講你喺決賽果陣時 好勁喎 一個扭晒全場仲要入埋波

我：我都係盡力姐 有得贏就梗係贏咗佢啦

Kelvin：真係為咗贏咁簡單

我：梗係啦 唔係你諗住點

Kelvin：定係你為咗威比你女朋友睇咋

我：嚟線啦 我邊有女朋友呀

Kelvin：你無女朋友但係有人鍾意你喎 你唔係咁都唔知掛

我：直接開名啦 唔想估呀

Kelvin：其實人哋真係好明顯架啦

講完佢就望入住廚房入面果兩個人

我：你唔會係想講Cherry掛 佢點會鍾意我呀 我又唔係靚仔

Kelvin：其實呢 鍾意一個人真係唔會諗咁多 鍾意就鍾意

我開頭真係唔明佢講緊咩

我淨係覺得佢呢句嘢有啲玄

突然之間

廚房裡面傳嚟尖叫聲

Kelvin即刻衝咗去廚房

Kelvin：做咩事呀老婆

Miss Chou：頭先隻蟹係咁係度郁 嚇死我哋呀

Kelvin：阿豪你唔入去幫您老婆手

我即刻入咗去廚房

見到Cherry擺住把菜刀望住隻蟹唔知點算好

我行埋去擺咗佢把刀

揪住隻蟹 好快手斬幾下 就將隻蟹分咗幾

Cherry：唔...唔該晒

我：唔洗 你搞唔掂再叫我幫手啦

我出到去果陣時

我見到有兩公婆陰陰咁對住我笑

Kelvin：原來Cherry係你老婆 唔怪得知你話你無女朋友啦

Miss Chou：好sweet呀

我嗰陣先至我中計

我：唉 好心你哋啦 咁大個人仲玩呢啲咁嘅嘢

Miss Chou：唔好話我唔識做 你入去幫你老婆手啦 我唔做電燈膽

佢講老婆兩隻字既時候重要特登拉長

我真係冇佢地咁好氣

我：都話唔係女朋友咯

但係我都係入咗去幫Cherry手

始終都係唔放心

Cherry：你出返去啦 真係搞唔掂先叫你啦

我：我望下都唔得咩

Cherry無理我

因為佢面對緊另一隻蟹

我睇佢都係搞唔掂架啦

我走再去佢後面

捉住佢兩隻手

一隻揪住隻蟹

另一隻就幫佢斬蟹

就咁就好成功咁拆晒啲蟹

Cherry擰過來

Cherry：唔該

個陣時我哋嘅距離可能連5cm都無

可以好清楚咁聽到對方呼吸嘅聲音

兩對眼互相對望住

你哋睇到呢度一定係咁叫我嘴埋去架啦

但係我真係好洩底

萬一佢對我無意思

咁咪仆街

都係唔好

好快我就放手縮開咗

我：咁你再冇咩搞唔掂我在幫手啦 我出返去先

Cherry果時塊面紅到成個蘋果咁

Cherry：噃..唔該晒

過多一陣之後

其他人都嚟齊晒

足足比原定時間遲咗個半鐘

佢哋一來見到我同Cherry 都起晒哄咁

唉 男仔

是但啦

唔理佢哋咁多

終於食得嘢啦

機會擺晒係面前

但係我唔識珍惜

第十六章

打邊爐都係咁啦

大家吹下水講下笑

咁我唔講啦

打完邊爐之後

都差唔多十一點

咁我哋都散水啦

因為我同Cherry住得比較近

所以我同佢一齊行

去近巴士站嘅時候

Cherry：今日多謝你呀

我：無啦啦做咩多謝我

Cherry：帶埋我嚟打邊爐囉 我同佢哋熟咗好多呀

我：你突然之間咁客氣我有啲唔係好慣添

Cherry：難得我多謝你 你俾啲咁嘅反應我

我：講吓笑啫 我本來都係想你可以同我哋班熟啲先叫埋你姐

我真係咁諗架

傾咗一陣之後

巴士就嚟咗

我哋唔知點解好有默契咁坐返晏晝個個位

佢又問我擺咗個耳機然後一人一邊咁聽歌

聽聽下佢又挨咗去我個膊頭度瞓著咗

雖然我都好叻 但係唔知點解我覺得自己唔可以訓著

可能係男人嘅天性掛

女人瞓著咗就要保護佢

又或者我驚兩個人都訓咗嘅話可能會走咗個站

我都唔知

我淨係挨咗係佢個頭到瞓埋眼休息下就算

差唔到到站嘅時候

Cherry自己彈咗起身

扁 原來佢冇訓著

咁我捱得咁辛苦係為咗咩

落咗車之後

Cherry：不如我哋去食甜品㗎

我：又食？你頭先食唔飽咩

Cherry：你唔知女仔有另一個胃食甜品架咩

我：我驚你 再咁食落去 下次買衫要買大碼咋

Cherry：你即係話我肥啦

佢即刻搥我隻手

我：痛痛痛 對唔住 小弟多嘴

Cherry：你都知道

痴撚線 邊有女仔咁大力架 成個男人咁

當然我梗係無講出口啦

如果唔係我驚我隻手真係要報銷

我哋去咗附近一間甜品舖

佢嗌咗個芝麻糊

我就要芒果西米露

都我個西米露嚟咗嘅時候

Cherry：你果個西米露好似幾好食喎

我答都未答 佢就畢咗一羹

我呆咗咁望住佢

Cherry：你唔好咁望住我啦 最多我比返啖芝麻糊你啦

跟住佢就攤咗佢枝匙羹比咗一羹我

我望住個匙羹 吞咗啖口水

食咗啖芝麻糊

嘩

唔係講笑

點解芝麻糊會咁甜架

我極度懷疑呢間嘢煲芝麻糊落糖

遲啲要同食環署舉報先得

講吓笑啫

我由細到大都特別鍾情於芒果西米露

但係我今次係第一次覺得芝麻糊好味過西米露咁多

食完糖水之後 都差唔多十二點

Cherry：都夜啦 你返去啦

我：唔得 咁夜 你咁靚女容乜易比變態佬搞你架

Cherry：你咪果個變態佬囉

我：我真係擔心你架 仲係度講笑

Cherry：係啦 知你擔心我啦

就係咁我就陪住佢返屋企

期間都係吹下水咁啦

又係到互相串下咁囉

好快就到咗佢屋企樓下

Cherry：好啦 我到啦 你返去啦

我：嗯 咁我走啦

我跟住轉身諗住走

Cherry：喂

我擰返轉頭望住佢

Cherry：今日真係多謝你帶埋我出嚟呀

我：得啦 你多謝咗幾次啦 返去啦

Cherry：知喇 你小心啲啦 返到去whatsapp啦

我：ok

跟住我就返屋企

返到去之後 我就即刻走咗去沖涼

沖完涼之後先醒起 我唔記得同Cherry講我返到屋企

我：我頭先返咗屋企啦

Cherry：咁耐嘅

我：其實我一早返咗嚟 不過我去咗沖涼咋嘛

Cherry：咁都唔記得 我仲諗住你會唔會係發生咗咩事 點知原來唔記得 哼

我：唔好嬲啦 最多請你飲嘢啦

Cherry：拿 你話架 唔好走數呀

我：得啦 你早啲訓啦

Cherry：知喇 你都快啲訓啦

就係咁

今日就完咗

唔知點解我覺得特別開心

比平時同佢哋打邊爐都要開心

第十七章

話咁快 就去到10月末

有一日班會主席係班主任堂上面問我哋

班會主席：大家 嚟緊12月就係singcon喇 咁你哋如果想報名表演嘅話就同我講啦
最遲下個禮拜就會截止

跟住我哋班就即刻係度討論

互相問大家會表演咩

文哥：毛哥 你今年參唔參加呀

我：我估我應該會參加solo掛

文哥：wow 平時成日話自己唔識唱歌 咪又係會上台 係咪想氹女呀

我：諗多咗啦

我原本真係諗住上去玩下

但係比文哥咁講一講

我就開始計劃D嘢

不知不覺已經中五喇

下一年就要面對文憑試

無得再係咁日日玩

人大咗就係咁

成日都係到感嘆世事

唉 又離題

跟住落嚟呢個禮拜我都冇乜點玩

為咗我個計劃可以順利完成

我每日放學都即刻返屋企

有日放學

我諗住即刻返屋企

文哥：毛哥 你而家又即刻返屋企呀？

我：係呀 有嘢做呀

文哥：話說你呢排攞咩呀 好耐冇同你踢波啦

我：我準備緊一個驚喜

文哥聽到之後即刻對住我陰陰咀笑

文哥：嘩 咁我買定花生等睇你場戲喇

我：咪癲啦 其實唔係好大件事咋嘛

文哥：咁都唔叫大件事 睇嚟我真係入世未深

係呢個時候 Cherry行過嚟

Cherry：阿豪 你而家係咪返屋企呀

我：唔係呀 我仲有嘢做 你今日都係自己返去先啦 sorry呀

Cherry扁一扁嘴之後話好啦 跟住就走咗

我之後就去咗D班搵一個人之後再一齊走

好快就到11月4日

點解我會特別講呢一日

我之前報咗singcon

而今日就係初賽選拔

如果我入到圍嘅話

就會直接入決賽

決賽會係聖誕聯歡會果日舉行

而初賽就係今日放學之後開始

我呢一兩日為咗養好把聲

講起都好笑

由於我想養聲 所以嗰幾日都好少講嘢

通常都係一句起兩句止

Cherry朝早請我食三文治 我都係一句多謝就算

跟住佢問文哥我係咪黐咗佢

搞到文哥係咁鬧我

然之後學校d老師以為我發生咗咩事

仲叫咗社工黎幫我

無辦法啦

因為我今次攞冠軍嗰個一定要係我

為咗今次呢一個計劃

我花咗好多時間

所以我不容有失

跟住果日lunchtime我同班兄弟一齊食

金仔：毛哥近排成日唔講嘢真係唔係好慣

文哥：咁人哋計劃咗啲嘢呀嘛

阿軒：咁快諗住表白

傑仔：鍾意人又唔認 最後咪又係表白

阿峰：但係點解要初賽表白 正常唔係決賽㗎咩

強哥：你哋又唔係唔知毛哥咩人嫁啦 xx (我學校名) 暗黑周仔嗰

話說點解我會無啦啦多咗個名

係因為我係全級公認最忠實嘅周國賢fans

同埋我最鍾意唱佢D歌

至於點解會有暗黑呢個字 我就唔多解釋啦

我無理佢哋講嘅嘢

我：唔好理咁多 總之陣間初賽 你哋要見人

文哥：你放心 兄弟嘅大事 我哋一定到齊 你提主角記住過嚟啦

終於到咗放學

因為solo嘅選拔係5點先開始

所以打鐘之後我無即刻走

諗住hea多陣先

Cherry：阿豪 你陣間係咪初賽呀

我：係呀

Cherry：咁我可唔可以來睇你比賽呀

我：緊係得啦 我就比你睇下xx周仔有幾勁啦 你準備幫隻耳仔排期分娩啦

Cherry：乜嘢分娩呀

我：咁你隻耳仔懷孕咗咪要分娩囉

Cherry：唔好笑嘅

我：唉 唔好笑就算啦 枉我諗咗咁耐

Cherry：哈哈哈哈 點解你咁幽默嘅

我：咁間硬

Cherry：你唔想要咪算囉

我：唔係呀唔係呀 多謝你呀

Cherry：白痴仔

吹多一陣水之後 我就開始執書包準備去禮堂

去到禮堂之後 原來初賽都有唔少人留意

仆街 有啲淆底添

跟住見到阿軒佢哋走埋嚟

阿軒：毛哥陣間睇你表演啦

等多大概半個鐘之後

音樂老師 Miss Fung 就話而家開始solo嘅選拔

由於選拔係由低年級去到高年級咁排

即係代表我仲有小小時間

但係不得不說

班低年級又唱得幾好聽啲

過多一陣之後

Miss Fung：5B班陳子豪 下一個到你 而家去後台準備先

終於到我喇

第十八章

Miss Fung：跟住係5B 陳子豪

我上到台 望住台下嘅人

唔係講笑 真係有少少滄

Miss Fung望一望佢本簿

MissFung：你可唔可以講下點解揀呢首歌

我想唱咪唱囉

有乜野點解唱啫

當然我梗係無開聲扁佢啦

如果唔係因為咁比佢DQ咗

我真係嬲我自己一世

我：我揀呢一首歌其實係因為佢同我嘅做人嘅宗旨一樣

我望住佢哋喺台下面 全部黑人問號咁

同我預期嘅反應一樣

我笑一笑

Miss Fung個樣好似有啲驚奇咁

Miss Fung：好 咁將個台交比你

我深呼吸 跟住望一望果個日日放學都陪我練習嘅人

佢同我點一點頭

我之後同控制台果邊示意可以開始

「我快樂有時 我叫悶有時

也算上天的恩賜回頭是憤慨 看不到未來

於年月裡比賽

時光機永未及發明 哪裡覓證明轉季讓半山結冰

這嘀嗒 又嘀嗒時鐘似簷篷滴雨聲」

時間好似雨水一樣

你睇唔清佢嘅外形

落到地上就瞬間變成水漬

你唔可以將佢變成未落地之前嘅模樣

「這秒針 轉個彎

繁華極短暫

一切善或惡 聚或散

也定了早晚永有著時間驅使

歷史的恩怨時代迫使」

過去咗嘅已經係回憶

無辦法改變

「仰首太空 再看清一片藍圖星宿

怎麼那北斗永亮透

只可半生奔馳 好比試管嬰兒

蟲洞裡解不破的暗示」

有一啲嘢係上天早就注定

無得改變

「沒有愛因斯坦以及霍金的聰慧相對問題遇到相對問題

四度宇宙折疊冷暖愛恨活埋秒與秒之間」

我唔係乜嘢專家

我唔識宇宙嘅運作

亦唔打算去考究

「這秒針 轉個彎

繁華極短暫

新愛或舊愛 沒盛載

最後也失散

你叫喚時間終止

永遠沒法預知哪日得你重視」

就算真係比你改變歷史

你又可以改變幾多

同埋你又點知改變之後嘅結果會係你想要嘅結果

「仰首太空 再看清一片藍圖星宿

怎麼那北斗永亮透

織女望向牽牛 一知半解眉頭

從維度裡繼續破解光速的變奏

空間的結構 一瞬或不朽

有時我在記憶空間找到你

分秒一起 不會問生死

最終會不分我或你」

記憶係唯一超越時間嘅存在

無論過咗幾耐都好

記憶都永不磨滅

所以要好好珍惜現在已有嘅一切

小心做每個決定

唔好令自己後悔先係最重要

4分鐘過去

終於唱完首歌

我望一望台下

全部都向我鼓掌

包括Miss Fung

我落番台

文哥佢哋即刻衝過嚟

文哥：嘩 唔聲唔聲 原來一早喺度練歌 唔怪得知日日都咁快走啦

我：梗係啦 唔係點入決賽呀

阿軒：咁好聽實入啦

Cherry係呢個時候都行埋嚟

Cherry：估唔到你都唱得幾好聽喎

我：我不嬲唱歌都好聽 係你唔知姐

Cherry：得喇 知你勁喇 歌神

我哋喺禮堂等多陣

之後MissFung上咗台

Miss Fung：好喇 而家公佈進入決賽嘅名單 首先係樂器組

佢講咗幾個名之後

有人歡喜有人愁

之後有小組 雙人 班際

Miss Fung：而家到solo嘅決賽名單

終於

佢由一年級開始講

二年級...

三年級...

四年級...

到五年級啦

Miss Fung 開始講入選嘅人名

我從來未試過咁驚

平時考試派卷 派成績表 都未試過咁緊張

Miss Fung 梅花間竹咁講唔同班別嘅人名

突然

Miss Fung : 5B

5B !!!

Miss Fung : 陳.....

陳 !!!

Miss Fung : 子豪

陳子豪 ?

我隔離嘅人即刻係度歡呼

我 ?

我個人係咁俾人搖

我入咗 ?

Miss Fung 宣布完入選名單之後行過嚟

Miss Fung : 陳子豪 我好期待你決賽嘅表現 唔好令我失望

跟住佢就行開咗

我：我入咗？

幾把聲係我耳邊一齊講：係呀

我望住Cherry

我：我真係入咗？？？

Cherry好興奮咁同我講

Cherry：係呀 阿豪 你入咗決賽呀

我好興奮咁攞住Cherry 係度跳

我：我入咗決賽呀 我終於入咗喇

過咗一陣之後

我先發現原來我仲攞緊Cherry

我：sor 頭先興奮得滯

Cherry塊面好紅

Cherry：唔...唔緊要

文哥：都話你實得架啦 決賽加油呀

第十九章

我同Cherry一齊搭地鐵

Cherry：你知唔知你頭先真係唱得好好聽呀

我：我都話我係xx周仔架啦 你又唔信

Cherry：好啦好啦 我信喇 得未呀

我：咁就差唔多啦

返到屋企之後

我真係覺得我好似發緊夢咁

突然

我收到個whatsapp短訊

xx：話咗你一定入到架啦

我：咁其實都係多得你幫手姐 唔係你 我估我依家都係唔識唱歌

xx：唔好咁講 話說你幾時決賽

我：12月20號

xx：咁你休息一兩日之後 就要繼續啦

我：梗係啦 話晒呢個係一個影響我一生嘅計劃嚟架

xx：我信你實得嘅 但係你揀咗邊首歌

我：咪之前我同你講個首囉

xx：咁你真係要練多啲喇 呢首歌有少少難度架

我：有你係度幫我練歌 一定掂啦

xx：我唔係幫倒你好多架咋 有好多都係靠你自己

我：知喇

其實真係有少少渣底

始終我第一次做呢啲嘢

仲要打算喺幾百人面前咁做

心理壓力都真係幾大

但係我除咗踢波之外都好似未試過 咁想做好一件事

希望無咩差錯啦

我個晚仲喺度因為自己入到決賽未平復到心情 所以我好夜先訓得著

去到第二日

我差唔多10點先起身

唉

遲晒到

原先諗住詐扮睇醫生就算

但係我唔知點解好想見佢

所以都係返咗

一入到課室

成班即係係到「歌神」「歌神」咁叫我

Miss Chou：好喇 歌神你快啲返埋位聽書啦

果陣時上緊中文堂所以Miss Chou都係到

我：Miss Chou你唔好陪佢哋癲啦

返埋位之後 Cherry就即刻拍我膊頭

Cherry：做咩咁遲先返呀

我：冇呀 尋晚好夜先訓 所以唔知醒

Cherry：下 仲以為你病咗 枉我仲敢擔心你

我：唔好嬲我啦 Cherry姐 你又靚女又好人 原諒我啦

Cherry：想我原諒你嘅話 陣間請我飲嘢

我：朱古力？

Cherry：算你知我心啦

我之前好似無提過

其實Cherry係好鐘意飲朱古力

差唔多日日都要飲咁滯

總之係朱古力嘅製品佢就鍾意

Cherry：係嗰 你食咗早餐未呀

我：未呀

Cherry擺咗件三文治比我：擺去食啦

我：唔使啦 而家食咗陣間唔洗食晏都似

Cherry：唔得呀 起碼都要食一個呀

咁我費事辣燴佢啦

食咪食

但係我去到晏晝咩都食唔落 淨係飲咗一杯檸茶就算

差唔多放學嘅時候

學校開咪叫所有人咗決賽嘅人去禮堂

其實冇乜嘢都係講下當日嘅安排同埋出場嘅次序

講晒所有嘢之後

都差唔多5點

我諗住返課室執嘢走人

點知Cherry仲未走

Cherry：返來啦 頭先俾人叫咗去做咩

我：冇呀 都係講係決賽個日d安排咋嘛 你仲未走嘅

Cherry：冇呀等埋你一齊走呀嘛

我：咁行啦 我得架啦

返緊去嘅時候

我硬係覺得Cherry個樣有少少怪咁

我：你唔舒服？

Cherry：唔係呀 做咩咁問

我：我見到你個樣有少少怪姐 無事就得啦

Cherry：係啫 你有冇鍾意嘅人呀

我：都算有嘅 做咩咁問

唔通我直接同佢講咪你囉咁咩

好尷尬架嘛

如果佢對我只係朋友 咁咪大劑

不過佢咁問我 搞到我都有啲興趣

我：你呢

Cherry：有...有啊

我：果個男仔真係好 唔知邊個咁有艷福呢

Cherry：唔話你知啫

我：講啦 我識唔識架 我可以幫下你啫

講真我聽到佢有鍾意嘅人嘅時候 真係有啲唔開心

個心銀住銀住咁

Cherry：多事喇你 八卦仔

送完佢返屋企之後

我即刻打開whatsapp

我：個計劃有少少變

xx：發生咗咩事

我將頭先嘅事講番俾佢知

xx：拿 你照唱歌先 之後嘅嘢我再幫你睇下

我：Ok

其實Cherry真係幾靚女

平時佢都算受男仔歡迎

況且佢人又靚 對其他人又nice

有鐘意嘅人都好正常㗎

不過算啦 照按計劃行事先啦

其它嘅嘢之後再算啦

第二十章

不知不覺就嚟到12月

呢一段時間我都冇乜點練歌

因為決賽係12月20號

但係決賽之前係我哋學校嘅測驗週

咁始終讀書要緊

但係奇怪嘅係Cherry佢哋呢班交換生都要一次測驗

Cherry同我講返話係要睇下佢哋係另一間學校可唔可以學到嘢

當係評估個類

有一晚 係我同文哥佢哋打打下Fifa嘅時候

Cherry突然之間打電話比我

我即刻同佢哋講話急屎 就走開咗

兄弟 對唔住

Cherry：阿豪 你跟住落嚟嗰幾日放咗學之後得唔得閒呀

我：而家校隊唔使練波 所以基本上日日都得 做咩

Cherry：我想問下你有無興趣放學之後一齊去圖書館溫書咋嘛

我：都可以嘅 你想溫到幾點

Cherry：我諗住搵到大概6點跟住一齊食埋飯 你得唔得呀

我：我ok呀

Cherry：咁就到時見啦

我係咪發緊夢呀

Cherry佢約我溫書呀

通常呢啲情節唔係發生係情侶身上架咩

我諗到呢度即刻拍吓自己塊面 叫醒自己

佢又鍾意嘅人架啦

可能人哋純粹想溫書姐

唔好諗咁多啦

跟住我又收到個whatsapp

我望到個短訊之後

我開心咗成晚

我對我個計劃嘅信心又大咗

去到第二日放學嘅時候

阿軒過咗嚟問我去唔去踢波

我：唔啦 有嘢做

係呢個時候Cherry就行咗埋嚟

Cherry：阿豪 我行得喇

阿軒：哦 原來約咗阿嫂 咁我唔阻你啦

我：你諗左去邊呀 我哋去溫書咋

阿軒：你都溫書？平時叫你溫書你都屌晒鬼咁架喎

我：同你溫書 我自己溫仲好過

阿軒：擺明就人哋叫你先溫啦

我：都一樣姐

跟住我同Cherry就去咗圖書館溫書

話就話溫書其實基本上都係佢溫

我大部份時間都係望住佢

咁唔可以怪我架喎

鬼叫佢靚咩

靚嘅嘢自然吸睛㗎啦

溫完書之後 我哋就去咗附近嘅一間茶記食飯

我叫咗個乾炒牛河 佢就要西炒飯

Cherry：乜你好鍾意食乾炒牛河架咩

我：係呀 你又知嘅

Cherry：我見你坐低咗之後諗都無諗就叫咗 咁估到你應該都幾鍾意囉

我：其實我由好細個嘅時候 已經好鍾意食架喇 我好鍾意乾牛河個種鑊氣同油香

咁跟住落嚟嗰幾日都係咁樣放學溫書食飯

終於去到星期六

我諗住可以休息下嘅時候

Cherry又叫我出嚟溫書

我心諗大佬呀吊頸都要透氣㗎

但係口裡說不身體卻很誠實

我都係去咗

溫書果陣時我都係大部份時間望住佢

突然Cherry擰過嚟

Cherry：阿豪 你可唔可以教我.....

果時我同佢面對面

基本上我個頭伸前少少 就可以錫到佢

咁我梗係無錫啦

但係佢塊面就紅晒

我吞後咗少少

我：教咩呀

Cherry個陣先醒返

Cherry：呢...呢條 我唔識做

當冇事發生過咁繼續溫書

溫完書

原來已經9點咁滯

我哋就去咗食飯

食完飯就已經10點

咁作為男仔就梗係要送女仔返屋企啦

果時係12月

唔係講笑真係幾凍

隻手薑晒

Cherry：你係咪好凍呀

我：唔係呀 有少少寒咋嘛

係女仔面前梗係要扮大隻啦

但係我哋唔到佢

因為我講嘢嘅時候

我個嘴係咁係度震

Cherry笑一笑

跟住佢捉住咗我隻手

放咗係佢件褸袋到

我第一次拖女仔呀

但係我隻手凍到冇晒知覺

完全感受唔到 Cherry隻手

唔緊要啦

有得拖已經好好

我嗰時好想呢段路可以行成世

但係每樣嘢總會結束

去到佢屋企樓下都係要放手

Cherry臨上去之前

Cherry：你呀 明知凍就著多件衫啦 又唔係大隻

我：我其實真係好大隻架

Cherry：實信你啦 如果你大隻 就唔會震晒咁啦 我捉住你隻手嘅時候 我都嚇一跳啊 真係好凍呀

我：俾個位我落台都好吖 唔好講到咁盡啦

Cherry：咁阿豪你真係好大隻呀 得唔得呀

我：好過無啦

Cherry：好喇 我要上去啦 你返到去同我講啦

我：知喇

好

我決定咗今晚唔洗手

我覺得佢鍾意嗰個係你

第二十一章

就係咁

我每日都會同Cherry一齊溫書

好快就去到測驗週

測驗既情況係點 我就唔多講啦

但係我想趁機 公審一班學霸

我相信每間學校都會有幾條友係好乞人憎

特別係考試測驗嗰D時候

呢D仆街通常有幾個特徵

考試果日一定會講某幾句說話

「我唔記得溫書呀」

「我無溫到書 尋晚打機打通宵」

考數學果日會問「乜今日唔係考通識咩」

仲有好多

但係費事比人話我哋字數

咁我都好好彩

我班兄弟全部都有以上特徵

當然有幾個係講真啦

同時梗係有幾個講完之後

擺住一份90幾分嘅卷

話自己好廢

跟住講完之後一定會有10個起跳既人出咗黎 捉佢去暗角位

千年殺 螺旋丸 連續認真拳

血腥畫面我就唔多形容

大家明就得

咁我個成績都叫做幾好

可能因為成日同Cherry溫書所以有d進步

我見Cherry D數學physics都進步左

Cherry：阿豪 我數學同physics有7字頭呀

我：全靠我不辭勞苦咁教你咋

Cherry：多謝您啦 老師～

嘩 佢個樣

天啊

為何世間會有如此國色天香之美人

我終於明白咩叫一笑傾城

真係好靚

我越來越希望我個計劃可以成功

唔係

係一定要成功

咁測驗完左 之後就係singcon決賽

我哩排都好少踢波

大部分時間都去咗練歌

有好都人問我打算唱咩歌 我都無講

連Cherry問我都冇答佢

你哋好快就會知架喇

日日都係到唱同一首歌 我就黎訓覺都繼續唱

都係果句 我真係好佩服自己

好耐未試過對一件事咁上心

時間過得好快

聽日就係決賽啦

我放學準備走既時候

Cherry拉住我

Cherry：聽日就比賽啦 我知你哩排成日都練習 唔洗咁緊張㗎 贏輸唔係最重要 最緊要係享受呀

我：如果我贏唔到 我會黹自己一世 因為我唔會再有勇氣 去再做多一次

Cherry聽完就側一側頭

我：你而家唔明我講咩 聽日就會明

一切都係因為你

Cherry：不如聽日一齊返㗎

我：好呀 咁聽朝7點半地鐵站等？

Cherry：ok

9：56

xx：好喇 差唔多啦 你都要比條聲帶休息下

我：真係夠喇？ 我覺得自己未夠好㗎

xx：你已經唱得好好喇 到時你只要將你想講既野唱晒出黎就冇問題

我：咁好啦 唔該晒你呀

xx：希望你計劃成功啦 雖然我覺得你唔洗唱歌直接同佢講都可以成功

跟住我地就各自返屋企

我返到屋企就將個計劃喺個腦到係咁loop

好

應該無問題

聽日一定要加油

第二十二章

12月20日

今日係決賽嘅日子

今日可能亦都會係我人生入面最重要嘅日子

我一朝早好早就起咗身

我見有時間就聽多幾次首歌

再不斷將個計劃由頭到尾諗一次

確保唔會有咩差錯

今日只許成功 不許失敗

希望可以順順利利

過多一陣之後 就差唔多要出門口

我今日第一次喺襯衫方面花咁好多時間

差唔多用咗半個鐘

我着咗件白色T-Shirt 再加一件紅黑格仔恤衫褸 下面係條卡其色束腳褲
跟住住著對灰色高筒Converse Chuck 70s

然後再擺件黑色飛機褸 到時凍先著

搞掂晒之後

我照一照鏡

唔錯

幾靚仔

跟住就出門口

我去到地鐵站嘅時候

Cherry已經到咗

佢今日著住一件白色冷衫 一條黑色嘅窄腳牛仔褲 同一對白色adidas originals superstars

仲戴住頂黑色冷帽頂帽上面仲有個白色毛球

唔掂

好可愛

我：你等咗好耐？

Cherry：我啱啱到咋 你做咩係咁望住我呀 我今日著得唔好睇咩

我：唔係呀 因為你今日.....好靚.....

Jesus Christ

點解我會口窒架

Cherry聽到之後笑得好甜

但係仲要係度扮靚咁

Cherry：成日都咁口甜舌滑 實好多女啦

我淨係對你一個先係咁

但係我方講出嚟

我：我都想呀 佢哋一啲都唔識貨 咁嘅筍盤係面前都唔要 真浪費

Cherry：知喇知喇 行啦筍盤 遲到喇

跟住佢就轉身走咗

不得不說佢面紅個樣真係好得意

突然之間

Cherry：你食咗早餐未

我：未呀

Cherry：都估到你架啦 擺去啦 頭先係樓下茶記買架

佢擺咗個三文治比我

一睇

又係腿蛋治

我：多謝晒喎 俾返錢你啦 成日要你請

其實佢成日請我食三文治 我真係有啲唔好意思

Cherry：唔使啦 又唔係貴

返到學校之後

原來已經有唔少人返咗

朝早都無乜嘢特別

都係大家一齊玩咁

去到晏晝就留係班房開party 嗌外賣返嚟食

咁來來去去都係pizza個D啦

跟住又播下歌 大家一齊影下相咁

Party完咗之後

就到咗今日嘅重頭戲

singcon決賽

Solo會係最後一個環節

壓軸呀嘛

我就坐咗喺台下睇其他人嘅表現

Cherry坐係我隔離

Cherry係咁係我側邊講其他人嘅表現有幾好睇

但係我無心情聽

我淨係好擔心陣間會失手

跟住我嘅計劃就會渣都無得淨

Cherry：你係咪好緊張呀

痴線

我咩都無講你就知

讀心神探咩

但係我唔想佢擔心

我：唔係呀 我係度諗緊連呢啲人嘅表現你都係咁話好睇 咁陣間我表演你實無聲出

Cherry：點解呀

我：因為太好睇 好睇到唔識形容

Cherry：睇下點

我一定要你永遠記得我今日嘅表演

話咁快就到solo喇

我同Cherry講低聲 我就去咗後台準備

去到後台嘅時候

大家都好俾心機準備

我都不忘聽多幾次首歌 等自己唔好唔記得歌詞

跟住我收到個whatsapp

xx：唔好咁緊張 放鬆自己 上到台唔知點算嘅話 就搵啲嘢望住等自己可以冷靜啲 同你練咗咁耐 你一定無問題嘅 等你good show

我：多謝

跟住金仔同阿軒行咗過嚟

佢哋係工作人員

金仔：陣間表演加油呀

阿軒：希望呢個計劃可以成功啦

我：點解你.....

金仔：阿朗同我哋講咗啦 你都算蠢惑啦 咁大件事都唔同我哋講

我：即係你哋全部都知？

阿軒：係呀 不過放心我哋唔會同佢講 留番俾你自己講啦 我哋班兄弟實撐你

我：多謝你哋

工作人員：5B班 陳子豪 下個到你 請準備好

我準備咗咁耐

而家就係收成嘅時候喇

第二十三章

我去到後台準備

MC：頭先嘅表演好唔好睇呀

眾人：好睇!!!!

MC：既然大家都咁開心 咁我地就唔好比佢停 好唔好呀

眾人：好!!!!

MC：跟住落黎呢個就犀利喇 佢有xx暗黑周仔呢個稱號 但係聽講佢喺初賽既表現非常出眾 咁我地就睇下佢可唔可以打甩暗黑呢個字喇

阿MC大佬 你咁講我好大壓力架喎

之後我就行咗上台

我望一望台下

嘩

痴撚線

我真係第一次比幾百人同一時間望住我

個種壓力真係唔講得笑

我開始有少少腳軟

但係為左我一生嘅幸福

死就死啦

我深呼吸做一下

同控制台果邊示意可以開始

幾秒之後就聽到音樂開始

全場都靜晒咁望住我

我想搵D嘢望下等自己冇咁緊張

跟住我好自然咁將目光放左喺一個女仔身上

望住佢

我成個人好自然咁放鬆晒

「這怪誕氣候 把冰川變了沙漠
熱燙夏季冰雹竟降下來 怎麼閃躲
會否真有一天 全人類於一剎那結束
天國終於降臨 我想起只有你」

你既存在比任何野都重要

「遍地也裂開 地球像洪海
同遊這末世與你觀察活斷層怎剖開
愛別要放開 別理會天空塌下來
貼著寸步也不會共你分開」

就算世界末日我都會係你身邊陪住你

一直都會

「建設已化成塵埃散滿天地
目睹全數經濟宗教文明 毀於一旦
地殼相繼分開全球活火山快要爆開
地平線盡頭還有否方舟接載

遍地也裂開 地球像洪海
同遊這末世看過火山噴出極燙漿火
我們被旋渦席卷入幽暗深海
愛讓我們再沒法把手鬆開」

發生咩事都好 我都唔會放開你

「兩極赤道 還未有幸帶著你統統也踏過
世界卻頓成天涯最終海角
我是世上最後的怪獸 你是可愛木偶
在瓦礫星塵下顯得罕有
不緊要 奇蹟有沒有
我只要共你一起」

我既願望只有一個

「遍地也裂開 地球像洪海
我共你於這末世見證過天塌來極精彩
剎那地暗天昏 津波把我共你淹蓋
抱著抱著抱緊你 沒溺海底裡」

永遠同你一齊

音樂完左之後

全場歡呼

Cherry都笑住咁俾左隻手指公我

終於都唱完喇

我準備咗咁耐

終於搞掂喇

雖然一日未公佈結果 一日都未知我成唔成功

但係我要做既都做晒

之後就真係聽天由命喇

但係點都好 我對自己都幾滿意

起碼冇三分鐘熱度先啦

我落返台 第一眼就見到班兄弟

文哥：毛哥你就威啦 頭先真係周國賢上身咁款 今次實掂啦

我：希望啦 我都唔知

金仔：比D信心自己

阿朗係呢個時候過左黎

阿朗：毛哥 頭先做得唔錯吖 比之前練習好好多

我：過獎喇

阿朗：唔好諗咁多喇 頭先Cherry仲係咁同我講 話你好叻呀 你快D去搵佢啦

我就行做過去搵Cherry

Cherry一見到我就捉住我隻手係咁喺度fing

Cherry：你頭先真係唱得好好聽呀

我：還好啦 但係我覺得好多人都唱得好好

Cherry：唔係呀 你係我眼中係最好嘍 知唔知呀

我望住佢認真嗰個眼神

好靚

跟住我拗一拗頭笑住咁多謝佢

有佢呢句

擺唔到冠軍都無所謂

之後既表演我都無認真睇

跟住終於到左頒獎環節喇

Miss Fung：今次呢個比賽大家既表現都好好 仲有D令到我幾驚喜

唔知點解我覺得佢講呢句既時候望一望我

大濟

緊張到有幻覺添

之後就係頒獎

頭幾批都係樂器 小組等等

我唔多講

Miss Fung：最後就係個人組 請校長上台頒獎

校長你可唔可以行快少少

Miss Fung：首先係季軍 4C班 鄭樂恆

有個高瘦既男仔走左出嚟 佢個樣好開心咁

Miss Fung：亞軍 6D班 曾子希

全場嘩然 因為嗰個男仔係因為輸左真心話大冒險先參加

我望到佢個樣好似仲未知發生咩事咁

Miss Fung : 最後喇

唔該要係我呀

Miss Fung : 冠軍.....

第二十四章

Miss Fung : 冠軍係 5B班 陳子豪!!

成個禮堂瞬間都係掌聲

我係呢個時候好似仲未訓醒咁

文哥同強哥見我唔郁

兩條友間硬拖咗我上台

我上到台先知

我真係贏咗

我當堂忍唔住流咗滴馬尿

失禮晒

我即刻行咗過去校長到擺獎

擺咗獎 影埋相

MC就過咗嚟

因為我哋singcon嘅所有冠軍都會現場接受一下訪問

其實真係有D尷

但係我之所以咁想擺冠軍 就係為咗呢一刻

MC : 陳同學 首先恭喜晒你先 不過你可唔可以講下點解你會揀呢一首歌

我 : 多謝 我之所以揀呢首歌嘅原因有兩個 第一係因為我好鍾意聽周國賢
而呢一首歌係其中一首我最鍾意嘅歌 而另外一個原因就係因為一個人

全場都喺度大啖 : 表白!!!!!! 表白!!!!!! 表白!!!!!!

同一時間

我望一望果個對我嚟講好重要嘅人

佢個樣好似有少少愕然 但係都對住我好溫柔咁微笑

就同平時一樣

一樣咁靚

我：有一個人曾經同我講過 佢唔係幾鐘意周國賢嘅歌 係果時 我同我自己講 終有一日
我會令佢鍾意周國賢

MC：咁我相信你口中個個人聽到你頭先嘅表現 都應該會好滿意啦

我：呢層我就唔知啦

我嘅目光無離開過佢

我：我都好想問下佢 我能唔能夠達成到個陣時對自己嘅承諾

我隱約咁望到佢微微咁點頭

但係頭先掛係面上嘅笑容開始消失

我：如果我做到嘅話 我想應承自己多一樣嘢

我深呼吸咗一下

我：我之後聽周國賢嘅時候 佢都會同我一齊聽 我唱歌嘅時候 佢會陪我一齊唱
就好似頭先嘅歌詞一樣

MC：邊句歌詞呢

我笑一笑

我：你估下

講完之後 就落咗台
全場都喺度歡呼

點算

我覺得呢一刻 我真係好型

其實你可能會問 點解我可以咁大膽 係老師校長面前表白

咁係因為我學校係比較開放

對於中學生談戀愛係冇乜所謂

你見之前Miss Chou咁玩我就知啦

我行到去我個位嘅時候

我發現Cherry唔係到

阿朗突然拍一拍我膊頭

阿朗：佢返咗班房呀

跟住我就返咗班房

入到去

我淨係見到一個熟悉嘅身影訓咗係張檯到抽搐

喊緊？

我慢慢行咗過去

敲一敲張檯

佢聽到有人敲檯就抬高頭

佢望到我 就即刻抹走眼淚

Cherry：阿豪 恭喜晒你呀 終於攞到冠軍啦

我：多謝晒啲

我嘆咗一下氣

Cherry：做咩事呀 嘆晒氣咁 唔係攞咗冠軍啦咩

我：攞冠軍有咩用

Cherry：發生左咩事呀

我：我頭先頒獎嘅時候 公開對佢表白

Cherry呆咗一陣 眼神流露咗一絲悲傷

Cherry：咁佢實好開心啦

Cherry好似係到強顏歡笑

我：但係佢無理我呀 佢聽完就走咗去

Cherry眼神開始變得古怪

好似係想

逃避？

我唔知

我：我真係唔知佢點諗 平時又對我咁好 又陪我吹水 又陪我食嘢 又陪我玩 我受傷嘅時候 佢又會好擔心我 講真吖我都唔知我到底係佢邊個

Cherry：唔好再講

不過佢好細聲 我聽唔到

我：其實我真係好鍾意佢 唔知由幾時開始我就好留意佢 佢嘅一舉一動我都留意住

Cherry：我求下你唔好再講

我今次終於聽到 但係我無理

我：有時我見佢唔開心 我會專登去講笑話氹下佢 佢受傷 我會想照顧佢 見到佢受苦 我都會好唔開心

Cherry：真係唔好再講喇

佢開始流眼淚

我：有一日佢同我講佢有鐘意嘅人 我真係好心灰 原來自己一直都只係佢朋友 原來係我自作多情 但係我都好想同佢表明一次心意 就算最後係失敗都無所謂 我真係 好鍾意佢.....

Cherry：夠喇！！！！

貼著寸步也不會共你分開

第二十五章

Cherry忍唔住眼裡面一直係度打滾嘅淚水

淚水好似決堤咁流落嚟

Cherry：我求下你唔好再講啦

我冇咗講落去

Cherry：你可唔可以唔好咁殘忍

我無出聲

Cherry：你知唔知當一個自己鍾意嘅人同你講佢對另外一個人嘅感覺嘅時候 個心會好痛架

我：我明呀

Cherry：唔係 你根本就唔明 你根本就唔會知道當自己鍾意嘅嗰個人唔係鍾意自己嘅果種感覺 果種明明我想喊但係又唔可以喊嘅感覺 你明咩 果種撕心裂肺但係又唔可以表現出嚟嘅感覺 你明咩

我：我都試過呢種感覺呀 就喺你同我講你有鍾意嘅人嘅時候

Cherry有少少嚇親咁望住我

Cherry：你講咩呀 你唔係有鍾意嘅人咩

我笑咗一笑

我：係呀 我係有鍾意嘅人呀 嗰個咪你囉

佢冇講嘢 淨係係度望住我

我：乜之前同我一齊聽歌嗰個唔係你咩 話唔鍾意聽周國賢嗰個唔係你咩 喺我受傷嘅時候幫我處理傷口 叫我要小心啲 又擔心嗰個我唔係你咩 喺我準備緊singcon嘅時候鼓勵我嗰個 唔係你咩

Cherry：係呀 咁我鍾意你呀嘛 咁...咁我咪想陪你多D囉 但係我都唔覺得你係鍾意我嘅

我：如果我唔鍾意你嘅話 咁你扭親個陣 我點解要逼你俾我咩你返屋企呀 如果我唔鍾意你 我就唔會食你口水尾啦

Cherry聽完之後塊面即刻紅晒

Cherry：你.....你真係鍾意我？

我：係呀 我鐘意你呀

跟住佢就係度甜笑

我伸咗隻手出嚟

我：咁...趙芷瑩 (Cherry中文名) 小姐 你可唔可以做我女朋友呀

佢冇答我

佢直接跳左埋黎攞住我

Cherry：我等咗你呢句好耐啦 衰人

我：咁我而家都講咗啦 遲到好過冇到

係呢個時候

有一大班人入咗嚟

文哥, 金仔, 強哥, 阿軒, 傑仔, 阿峰, 阿朗 7個人同時入咗嚟

阿朗：恭喜晒你哋啲

文哥：終於都大結局喇

阿峰：我哋終於望到呢一日嘅出現喇

強哥：毛哥 今餐pool飯你走唔甩架喇

我同Cherry見到佢哋行咗入嚟都嚇一嚇

我：你哋幾時係度架

阿軒：由一開始你搵佢嘅時候就已經係度架

金仔：頭先見你整喊人 我爭D衝入嚟打柒你架喇 好彩你都氹返人

你哋見唔到 但係佢真係笑得好搵奸

我：我女朋友嚟㗎嘛 點可以唔氹呀

講完我就攞住Cherry

Cherry：喂呀 唔好啦 佢哋係度架

我：有咩所謂啫 我依家就係要喺度宣洩主權

Cherry篤一篤我個鼻

Cherry：我都係你架啦 洗咩宣洩啫 白痴仔

文哥：嘩屌 你地兩個可唔可以唔好咁閃

阿軒：我而家有D後悔幫你添

我：你幫咗我D咩呀

阿軒：你為咗溝女唔撚踢波 我肯忍你都算係咁啦

我：嘩 真係多撚謝晒啲大佬

跟住就係咁吵吵鬧鬧就到咗放學嘅時候

Cherry拉咗我去唔同地方係咁自拍

佢話再過幾個月就唔會再返嚟 所以要影多啲相留念啲

影咗好耐 終於都走啦

估唔到之前果4年聖誕聯歡會 都係自己一個嚟 自己一個走

今年竟然可以拖住我最愛嘅人行出嚟個學校門口

第二十六章

我同Cherry之後一齊去咗食飯

食完之後 我哋兩個就走咗去行街

更正 係行時裝店

但係女朋友叫到

我諗唔到有咩理由去拒絕

Cherry帶咗我去好多唔同嘅舖頭

佢試咗好多衫 每件都會行過嚟問我擺意見

但係我之前都講過啦

佢真係著咩都靚

Cherry：你認真D啦 每件都話靚

我：我講真架 咁我女朋友真係著咩都靚呀嘛 咁我可以點啫

Cherry：口花花

我：淨係對你一個啫

Cherry無講嘢 但係佢笑得好甜

Cherry：不如去食甜品啦

我：你叫到 一定得嘅

Cherry：咁快D行啦

講完佢就拖住我隻手拉我出去

我加快腳步追上佢 然之後我郁一郁隻手

同佢十指緊扣

佢感覺到之後望住我

我哋兩個就係咁係度對望咗一分鐘

跟住我哋兩個都係度笑

我今次終於可以好好享受啦

女仔隻手真係好柔軟同滑

而且同一個你最愛嘅人十指緊扣咁一齊行

真係好幸福

有D嘢唔駛下下講出口 對方都會明白

呢啲係咪傳說中嘅心靈相通

真係好幸福

我同佢去咗之前個間甜品店

我哋同樣叫咗芝麻糊同西米露

佢畢咗一羹芝麻糊比我

擘 真係好甜

Cherry：我餵完你 你唔餵返我嘅

JESUS

我竟然連呢樣都無做

咁我梗係即刻餵佢啦

Cherry：叫你先做嘅

我：下次我自動自覺啦 唔好嬲啦

Cherry：講下笑咋 我邊會咁小器呀 好小事姐

我：你真係無嬲？

Cherry：冇呀 傻仔

食完甜品 我就送佢返屋企

沿途上我哋都一直十指緊扣咁並肩而行

去到佢屋企樓下

我：好喇 夜喇 你快啲返上去沖涼訓覺啦

Cherry：你都係呀

我：知喇

Cherry：係啫 你平安夜得唔得閒呀

我：我ok呀

Cherry：咁不如我哋一齊出嚟行街吖

我：可以啊 就咁話啦

Cherry：咁我約實你架啦 我返上去先啦

講完佢就轉身行入去佢屋企嘅大堂

突然佢轉身走過嚟

我：做咩.....

我都未講完佢就錫咗落我個嘴唇到

可能因為我未試過同人錫過

我覺得個咀有少少濕

Cherry個嘴唇好軟 好甜

嗰種感覺真係好奇妙

唔知過咗幾耐

我哋先慢慢移開

係街燈嘅照耀之下

我見到Cherry塊面好紅

真係好可愛

Cherry：做咩眼金金咁望住人哋啫

我無答佢

我直接攞住佢

Cherry見我突然之間攞住佢都嚇一嚇

但係佢冇推開我 反而雙手緊緊咁放係我條腰到 攞住我

我喺佢耳邊好細聲咁講

我：我愛你呀

Cherry：我都係呀

過咗一陣之後 我哋先放手

Cherry：你返到去要打比我呀 知唔知呀

我：知喇 快啲返上去啦

我喺街度望住佢入lip 我先轉身走

返到屋企

我即刻打比Cherry

我：我返到喇

Cherry：好啦 你要早D訓呀 聽日放假都唔可以咁夜訓呀知唔知呀

我：知喇知喇 你都早D訓啦

Cherry：嗯嗯 早啲喇

講完電話我就去沖涼

沖沖下涼嘅時候

我喺度諗

頭先果個其實係我嘅初吻

不過佢應該同我一樣

果種感覺我會記一世

我用手指摸一摸個嘴唇

然後微微咁笑

我同我自己講：我呢世都唔會俾你離開我

我當時真係咁諗

第二十七章

既然佢話平安夜先見嘅話

咁即係代表我仲有幾日時間玩啦

我即刻約咗文哥佢哋踢波

去到第二日 踢波嘅時候

阿軒：乜你咁得閒同我地踢波呀

金仔：係囉 唔駛陪女朋友咩

佢仲要將女朋友三隻字 逐隻字拖長咁講

講真吖 嗰刻真係有D想打柒佢

我忍

我：佢話平安夜先見呀嘛 咁梗係陪下兄弟架啦

強哥：咁睇黎你準備好晒啦啫

我：準備乜嘢呀 見個面有咩要準備

強哥：我諗你真係蠢架啫 你唔似扮嘢

我：不如你直接講啦 教下我

其實我應該冇講過

唔好睇強哥咁樣

佢已經拍緊第四次拖喇

叫佢做情聖真係一D都唔過份

強哥：平安夜同情人節一樣 係情侶嘅節日

我：咁又點

強哥：咁情人節嘅時候會做D咩呀

我：行街睇戲食飯囉

強哥：....啱... 不過女仔會冇咁開心囉

我：不如你講白D

強哥：情侶之間需要一D嘢去作為佢哋嘅關係既象徵

我：kiss？

強哥：點解Cherry會鍾意左個咁嘅鸚鵡仔㗎

我：咁係咩呀

強哥：係定情信物呀 你就算唔買定情信物都要買聖誕禮物啦

係嗰屌

我竟然唔記得左買禮物

我真係好蠢

好彩強哥提一提我 如果唔係真係大檸樂

我：咁我應該買咩好

強哥：而家我拍拖定你拍拖呀 自己諗啦

我：求下你幫下我啦 我真係無頭緒呀

強哥：只此一次下不為例 人地鍾意咩咪送咩比人囉 再唔係你覺得佢適合乜野咪買乜野囉
其實都係講心意姐

我：咁...

我都未講完

強哥：我唔會再幫你 跟住落黎你自己諗啦

跟住踢波既時候我都心不在焉

一直係度諗買咩好

應該係話我成日都係到諗緊呢件事

去到夜晚 Cherry WhatsApp我

Cherry：我嘅男朋友你做緊咩呀

我：我咪掛住緊我嗰個好可愛既女朋友囉

Cherry：成日都咁口花花 我想問你平安夜個日想去邊呀

我：我想去有你喺度嘅地方

Cherry：喂呀 認真D啦

我：其實我真係無咩所謂 我淨係想同你一齊

Cherry：咁我plan行程架喇 你到時話唔鍾意嘅話 我打死你架

我：你辦事我放心啦 只要同你一齊 去邊都得

Cherry：知啦 白痴仔

我：我氹你笑又話我係白痴

Cherry：咁你係白痴仔呀嘛 不過係我嘅專屬白痴仔

我：算你啦

呢種感覺真係好幸福

好甜

好快我又埋頭苦幹喺度諗送咩禮物好

我其實真係唔知道佢鍾意D咩

係啲

阿朗同佢係青梅竹馬黎架嘛

佢實知Cherry鍾意咩啦

跟住我即刻WhatsApp佢

我：朗哥 我想問呢Cherry佢有冇D咩係特別鍾意架

阿朗：你想送禮物比佢？

我：係呀 我同佢平安夜會出黎

阿朗：我記得佢好鍾意食朱古力

我：但係朱古力既話好似情人節送好D啲

阿朗：咁呀.....咁飾物啦 佢不嬲都好鍾意D小飾物嘅

我：小飾物呀 都好似唔錯咁啲 唔該晒呀

阿朗：最緊要幫到你姐 加油呀

小飾物...

我諗到啦

之前我同Cherry行街既時候

佢喺一間賣飾物既鋪頭櫥窗度 眼甘甘咁望住一條手繩 隻眼仲要發晒光

我第二日即刻去返嗰間鋪頭

我見條手繩仲係到

我：老闆 我想要個條手繩

老闆：個樣係非賣品黎架 呢樣野對你好重要？

我好堅定咁答佢

我：係 真係好重要

老闆：我可以送條手繩比你 但係你需要放低一樣對你黎講同等重要嘢係到

同等重要？

就個樣啦

我：我而家即刻返屋企攞 老闆你等我一陣

跟住我就衝返屋企

好快我就搵到塊牌

呢塊獎牌係兩年前我同文哥佢哋參加左Nike cup 一個室內足球五人賽仲要贏咗
跟住我仲要攞咗個乜野最佳球員獎

呢塊牌見證著我哋嘅友誼發展

但係今日係你發揮用途既時候喇

我攞住呢塊牌返去個鋪頭比個老闆

老闆咩都無講就收咗 然之後比咗兩條手繩我

我：你唔問下 呢塊牌有幾重要？

老闆：我信你 呢兩條係一對黎架 唔好比佢哋分開

屌

總之求其擺塊牌比佢算啦

不過算啦 其實咁樣將大家重要既野交換都幾有意思

禮物就咁準備咗喇

之後只係需要等果日既蒞臨

第二十八章

呢幾日我都係同班兄弟打下機踢下波

然後之後夜晚就同Cherry吹水

日子一日一日咁過去

我都越來越期待

終於

到咗24號喇!!!

前一晚我直頭興奮到瞓唔著

我朝早6點就起咗身

我約咗佢2點鐘地鐵站等

即係我仲有大把時間

我就係度期待跟今日會發生咩事

唔係講笑 我真係等咗好耐喇

碌下IG 睇下Youtube

話咁快就差唔多要出門口

我今日無咩點襯衫

我淨係著一件白色長袖衫 同一條黑色牛仔褲

同著埋之前個一對converse

跟住我一早就去咗地鐵站等佢

不過原來佢都好早到

Cherry：你咁早到嘅

我：咁我唔想我女朋友等我呀嘛

Cherry只係甜甜一笑

跟住佢又係佢個袋到擺咗個腿蛋治比我

我：你真係日日都買架啲

Cherry：如果我唔買嘅話 我睇死你都係唔食架啦

真係了解我

Cherry：我而家開始一定會睇實你 唔會比你唔食野架

我：咁就靠晒你喇

我：咁我地陣間去邊呀

Cherry：你跟住我咪知lo

懶神秘

但係我都冇出聲

我都好好奇佢會帶我去邊

佢帶咗我去希慎

我：無啦啦做咩嚟希慎嘅

Cherry：咁因為我想幫我哋買一套.....

我：我聽唔到你講咩呀

Cherry：情....侶裝呀

佢塊面又紅到成個蘋果咁

點算呀 真係好可愛

我摸一摸佢個頭

我：咁快啲行啦 仲棟係度做咩呀 傻妹

Cherry：邊個係傻妹呀 哼

我：你咪我嘅傻妹囉

我哋行咗幾轉 最後走咗入去hollister

我哋每人買咗一件Hoodie

我嗰件係灰色同白色 而佢係天空藍同白色

Cherry：不如我哋而家直接著住啦

跟住我哋就咁樣著住套衫一齊行

我成世人第一次同人著情侶裝

雖然只係一套衫

但係唔知點解我覺得好幸福

之後佢又帶咗我去將軍澳

行咗一陣之後

我哋係一間鋪頭停低咗

我一望

吓

冒險樂園？

點解嘅

我望住Cherry

Cherry：咩嘢 其實我未嚟過架 我daddy mammy 成日都要返工唔得閒帶我去玩

我：咁我以後就帶你周圍玩啦 環遊全世界

Cherry：真係架？？？

我：我應承你

Cherry：勾手指尾

就係咁我哋勾咗手指尾

佢入到去就好似成個細路咁

周圍走 指住好多遊戲 話要玩

我幫佢換咗一大袋銀仔

跟住我哋就血洗一整日冒險樂園

唔係講笑

Cherry玩遊戲真係好勁

明明未玩過 但係都擺到好高分

呢啲係天份

但係佢阿爸阿媽埋沒咗佢嘅天份

算 我都係唔好派膠

時間好快就玩到夜晚

嘩 已經差唔多10點

唔怪得知咁肚餓

我哋於是就周圍行下睇下食咩好

但係可能今日係節日

所以周圍都爆晒位

根本無訂位嘅話 係冇可能食到

我哋行咗半個鐘左右

Cherry：阿豪 不如我哋食麥當勞啊吖

WHAT?!?!

我有冇聽錯

老麥？

我：你無問題咩

Cherry：其實都係一餐啫 食咩都得啦

我竟然搵到一個肯陪我食類M嘅女朋友

我真係好好彩

勾手指尾又代表到D咩

其實只係一種象徵

最後都未必做唔到

咁又有咩意思

第二十九章

我嗌咗個雙層芝士孖堡餐 雪碧走冰

而佢就要咗個脆辣雞腿包餐 可樂走冰 然之後仲要加兩件脆香雞翼

當我諗住比錢嘅時候

Cherry截住咗我

Cherry：今次我俾啦 頭先你都畀咗好多錢去玩啦

我：唔係幾好意思嘅

Cherry：我唔理呀 如果你要比嘅話 我黐死你呀

唔駛去到咁盡掛 一餐飯姐

我：咁多謝晒你啦

Cherry：hehe

我真係好幸福呀

我哋擺咗嘢食然之後搵咗位坐低

跟住就一路食一路吹下水咁

突然 佢用條薯條指住我

我：做咩呀

Cherry：你擘大個口啦

我唔知佢想點

我一擘開口 佢就隊咗條薯條落我個口度

我咬住條薯條

呆咗一陣先知發生咩事

呢啲係咪戀愛嘅感覺

嘿嘿

對唔住呀 咁多位大佬

咁人哋初戀呀嘛 咁緊係少少嘢就會好開心架啦

Cherry : 又係得我餵你 咁我呢

我即刻擺咗一條薯條比佢

我睇條薯條就嚟比佢咬到嘅時候

遞高少少 等佢咬空氣

佢望到就伸直條頸再咬

我再擺高

Cherry : 玩我嘅 乞人憎 正衰人

跟住係度打我隻手臂

我 : 好啦好啦 我唔玩你啦

今次我比佢食到條薯條

佢一路食一路甜笑

好得意呀

打打鬧鬧咁食完嘢之後

我哋就一齊走

話晒都成11點啦

今晚我哋冇再食甜品

我直接送佢返屋企

一路上 我哋都係十指緊扣

呢種感覺真係好開心

完全唔想理身邊嘅事

行咗一陣就到咗佢屋企樓下

Cherry : 你等一陣呀 我上去擺少少嘢呀

我：你會返落嚟架可

Cherry：唔知架 可能你要等到聽朝架

我：咁我去買睡袋先

Cherry：傻仔

講完佢就上咗去

過咗應該無4分鐘佢就落番嚟

我有一刻真係諗過佢會唔會玩我 要我等天光

不過 量佢都唔敢啦

佢返嚟嘅時候仲攞住一袋嘢

佢遞咗個袋比我

Cherry：送你架 聖誕快樂呀 阿豪

我望一望部電話

原來一早過咗12點

再望下個袋裡面係咩

係一條純白色嘅頸巾

Cherry：你一定要帶著佢呀

我：你織架

Cherry：係呀 係咪好核突呀

我：唔係呀唔係呀 真係好靚呀 多謝你呀

我即刻攞條頸巾出嚟 帶住佢

Cherry：點呀 舒唔舒服呀

我：唔係講笑 溫暖牌真係溫暖牌 好正呀

Cherry：你鍾意就好啦 咁我返去啦

我：等陣先 我都有啲嘢比你呀

我係褲袋到攤咗個袋仔出嚟

我遞咗比佢

Cherry：咩黎架

我：你開嚟睇下咪知囉

Cherry打開咗個袋

呆咗一陣

Cherry：點解你會有呢條手繩架！！！！

我：買咪有囉

Cherry：但係佢係非賣品嚟架喎

我：總之我有辦法啦

我攤咗另一條手繩出嚟

我：佢哋係一對架

Cherry即刻攤咗嗰條

Cherry：我幫你帶吖

Cherry幫我帶完之後 就要我幫佢帶

Cherry：我哋不如影張相吖

我：好呀

跟住我哋就拖住手咁自拍咗一張

Cherry：好喇夜喇 你快啲返去啦

我：知喇 你早啲訓啦

Cherry：知喇長氣 返去啦

佢錫咗我一啖

Cherry：聖誕快樂呀 傻仔

我：恩 聖誕快樂呀 傻妹

跟住佢就轉身行入去佢屋企大堂

我望住佢入咗lip之後我就返屋企

返到去 同Cherry報完平安之後

我就即刻沖涼訓覺

今日真係好撻劫

但係又好開心

第三十章

去到第二日 我起身嘅時候已經係晏晝1點

我一起身就即刻擺起部手機睇

平時聖誕節我係絕對唔會開手機

因為聖誕節本來就係班契弟係IG放閃

而我以前無女呀嘛 咁梗係費事眼冤啦

我又唔係幾想咒人早日分手

但係我而家有女仲驚乜春啫

我依家百毒不侵

我一開個IG

第一個就係Cherry嘅post

個張相係尋晚我同佢拖住手影嘅相

「點呀 條頸巾係咪好靚 好暖呢

你呀 唔准唔帶呀 如果唔係我一定唔會放過你㗎

btw我真係好開心呀 第一次有自己愛嘅人陪住我嚟到呢一日

仲有多謝你條手繩呀 真係好靚 我好鍾意呀

希望呢對手繩可以陪住我哋入大學啦

我愛你呀

To : My Mr Right」

佢今朝早7點幾就post咗

佢同我講話今日約咗班姊妹行街

但係都唔使咁早掛.....

是但啦

早起身個個唔係我就得

我like咗佢個post

喺comment到打咗個心心

跟住就wts文哥

我：fifa乎？

文哥：唔得 有嘢做 聽日先

算

但係佢聖誕節會有咩做呀

佢唔係不鏟都自摺打機架咩

唔理

好彩阿軒同傑仔都得閒

我哋開住discord 打proclub

其實我哋每次打機都係吹水為主

所以贏定輸就唔重要啦

阿軒：你哋有冇發覺近排文哥好似怪怪地咁呀

傑仔：係呀係呀 而家約佢打機踢波都話唔得閒

我：係咩 我唔覺嘅

阿軒：屌你 掛撻住拍拖 你連我姓乜都唔知啦

我：不過話說我頭先搵佢打機佢都話有嘢做 唔得閒

傑仔：條友仔聖誕節有咩做呀

我：我撻知咩

傑仔：你估佢會唔會有女呢

阿軒：佢平時身邊全部都係男人 想搵個冇J嘅都難啦 佢會有女？

我：咪就係 算啦 可能佢真係有嘢做呢

阿軒：係囉 打機啦 你隻盧鳩古扭波完未呀 因住踩波車呀

跟住我哋就係咁打機打到夜晚7點幾

我見有少少肚餓去咗附近三哥買碗墨硯肥牛米線殺小辣

跟住我見到有個好似文哥嘅物體 係不遠處

我正想過去嘅時候

發現個個物體拖住個女仔

我開始懷疑呢間三哥係咪有咩詛咒

點解食親三哥都會見到識得嘅人好似拍拖咁嘅

上次係Cherry

今次就到文哥

咪住先

文哥身邊無啦啦點會有女呀

同埋就算真係有

佢應該都唔會鍾意啦

佢好似仲鍾意緊曉彤架嘛

曉彤係以前同我哋一間補習社嘅女仔

同我哋同年

文哥同佢好frd

佢仲同我講話鐘意人哋 不過唔敢表白咋嘛

跟住有一日曉彤無再補習

文哥就一直都放唔低佢

所以我好肯定呢個唔係文哥

哈哈

我終於破撚咗個三哥魔咒

唔好意思

派膠添

之後落嚟

我食完嘢 返屋企

打多陣機

又同Cherry傾咗兩三個鐘電話

之後就訓咗

咁就無咗一日

第三十一章

過多無耐之後 就到咗12月31

我哋成班兄弟諗住一齊出嚟倒數

當然Cherry都會嚟啦

到時阿朗都會係度

話說阿龍就好似已經變咗我哋兄弟團裡面其中一個咁

每次踢波打機都會搵埋佢

之後文哥喺whatsapp到講咗一句嘢

令我哋全部人都好震驚

文哥：我到時會帶多一個人嚟

我哋全部人即刻瘋狂炸佢機 問佢會帶邊個嚟

文哥淨係同我哋講話到時我哋就知

挑

懶神秘

但係我真係好好奇會係邊個

唔通我個日見到嘅真係佢？

終於

去到夜晚

我哋咁多個約係IG pier 果度倒數

而我就同Cherry一齊去

我哋今日以情侶裝出戰

唔係咩呀

呢啲時候梗係要搽下閃光彈架啦

唔係等幾時呀

我哋都比約定時間早到

佢哋全部都未見人

係好正常嘅事

因為我哋每次無論約踢波定係約打機

佢哋都冇一次係會準時

算

一早已經慣咗

但係佢哋冇幾耐都嚟咗

阿朗仲帶咗個女仔過嚟

全世界即刻係度起哄

金仔：原來阿朗你又有女架

阿朗：係呀 同大家介紹 佢係我女朋友 Kristy

阿峰：你哋一齊咗幾耐呀 未聽你提過嘅

阿朗：其實我哋一齊咗兩年架喇 但係唔係幾想周圍講姐

傑仔：屌 而家有兩對情侶係度 好銀眼啊

話口未完 文哥就黎左

文哥：sorry呀 我遲咗

我正想出聲屌佢嘅時候 佢身後面果個人令到我呆咗

我：曉彤？

文哥點解會同曉彤一齊架

佢唔係走咗嫁咩

曉彤：Hi 阿豪 好耐冇見喇 靚仔咗啲

我：好耐冇見.....

阿軒佢哋都望過嚟

幾把聲同時係度嗌：屌！！！！！！

成街都望過嚟

errr 尷尬囉

文哥：知你哋實屌我同想問我好多嘢架啦 我講咗先啦

原來當日曉彤走咗無耐之後

佢有搵文哥

我：屌你 唔同我講

文哥：話俾你知有撚用咩 你又唔係鍾意佢

曉彤突然係度扭佢耳仔

曉彤：唔准講粗口呀！！

文哥：對對對唔住

睇嚟文哥俾人食住曬

好彩我有事啫

文哥繼續係度講

曉彤當年原來因為屋企有事去咗新加坡一段時間

而佢同文哥一直都有聯絡

曉彤兩個月之前返咗嚟

而文哥同佢亦都好快喺埋一齊

傑仔：我頂 啱啱講完有兩對情侶 而家又加多對

阿軒：我哋識錯兄弟喇

其實我仲慘

原來我仲係擺脫唔到三哥魔咒

算啦

我都幾鄧文哥開心嘅

可以同自己鐘意嘅人一齊係一件好幸福嘅事

而且佢哋兩個一個願打一個願捱

襯到絕

我：我係幾鄧你開心嘅 但係唔可以因為咁唔踢波同打機囉

講完之後 我個背脊好寒

有四個人八隻眼睇住我

我

好似講錯嘢添

我：強哥 你條女你咁

傑仔：係啲 唔見人嘅

強哥：冇法啦 佢屋企人唔比佢出夜街架 都慣架喇 無咩所謂

佢話就話無所謂

其實我哋都知道佢好唔開心

點解我哋會知？

做咗幾年兄弟 唔使下下講出口嘅

有啲嘢心照啦

我望一望Cherry

我咩都未講

Cherry：明啦 你陪下佢啦 我哋女子組可以有啲時間講下你哋壞話

我錫咗佢一啖

我：果然都係你對我最好

跟住我哋咁多個就拉咗強哥去吹水

女子組亦都開始有講有笑

美好嘅回憶往往都係充滿住苦澀嘅味道

第三十二章

我哋唔知傾咗幾耐之後

突然之間我見到海傍天空上面爆開咗一朵又一朵嘅火花

原來已經12點

我哋正想同我哋嘅女子組講happy new year嘅時候

有幾把聲係我哋後面同一時間大啖

我哋聽到之後第一時間係望下強哥

因為我哋真係有啲擔心佢

但係我哋見到佢講緊電話

仲要笑得好開心

睇嚟都唔使擔心

我哋見佢都有晒事就行開咗

Cherry即刻走咗埋嚟

Cherry：哼 你而家先識得嚟搵我咩

我：咁頭先兄弟唔開心ㄚ嘛 你唔好嬲啦

Cherry：我講下笑咋 我邊有咁小器嗶

我聽到之後即刻攞住佢

我：果然都係我女朋友最好

Cherry：你而家先知咩 太遲啦

我：遲到好過無到ㄚ

Cherry：你呀 成日都...

佢都未講完我就已經用個咀嚟封住佢把口

過咗大概1分鐘我先至鬆開

Cherry成塊面紅晒咁同我講：成日都借啲意錫人

我：咁你可以推開我架嘛

Cherry無講嘢 淨係拎埋一邊係度偷笑

我兩隻手夾住佢塊面

強迫佢望住我

我：happy new year 呀 Cherry

然後係佢額頭上面輕輕錫咗一下

Cherry即刻學我咁夾住我塊面

Cherry：happy new year 呀 阿B

然後就錫咗去我個咀到

嘩

我又真係估佢唔到嗰

又會咁主動嘅

咦

等等

咪住先

佢頭先啖我咩話

我：你.....你頭先啖我咩話

Cherry：成塊面紅晒咁好大聲啖

Cherry：咪.....咪阿B囉

然後就中咗去我個心口度

有少少痛

但係佢啖我阿B呀！！！！！！！！

係我夢寐以求嘅情侶之間嘅稱呼呀！！！！！！！！

嚟到呢度唔好鬧我發姣

咁我第一次拍拖係咁架啦

正常咩都會好興奮㗎啦

hehe

將就下

我哋坐低㗎吹多一陣水就走

痴撚線

咁就已經成點幾

好彩有N車

如果唔係的士錢實貴到喊出嚟

上咗巴士之後

Cherry好快已經挨咗落我個膊頭度瞓著㗎

我驚佢會凍親所以攤咗件褸披喺佢身上

架巴士好快就到站

我推一推Cherry叫佢起身

佢好似個BB仔咁掙一掙眼 跟住望住我

我摸一摸佢個頭

我：落車喇

佢先好似如夢初醒咁跟咗我落車

之後係街上面佢都攞住我隻手啖住我個膊頭

半睡半醒咁行

係咪真係咁劫呀

我見佢咁辛苦而且仲要行多一段時間

所以我踏低咗係佢前面

我：上嚟啦

Cherry：唔使啦 我無嘢嗶

我：你就嚟死咁欸啦 上嚟恰陣啦我又唔介意

於是佢就好聽話咁上咗嚟

Shit

點解好似重咗啲嘅

好彩我夠大隻

佢幾重都唔成問題

佢訓咗係我背脊上面成隻貓仔咁馴著咗

真係好得意

好喇

我知我成日話佢得意喇

但係真係冇其他形容詞喇嘛

詞窮呀

行咗一陣之後

終於到咗佢屋企樓下

佢都好似知道到咗就自動彈咗起身

Cherry：唔該晒你呀

我：你係我女朋友嚟㗎嘛 駛咩講唔該

Cherry笑咗一笑就攞住我

Cherry：多謝你呀 阿B

我：無啦啦做咩同我講多謝

Cherry：因為你真係對我好好

我：咁你係我.....

Cherry：我係你咩呀

我：阿.....阿B囉

我講完之後成塊面好慶

Cherry兩隻手夾住我塊面

Cherry：你終於都講出來啦咩

我：咁我怕醜呀嘛

Cherry：咁既然你咁勇咁講出嚟 咁我就獎勵下你啦

跟住佢就錫咗我一啖

錫完之後面紅紅咁望一望我

跟住就轉身

Cherry：好喇 我返上去啦 你都快啲返屋企呀

我：知喇 我返到去同你講啦

Cherry：嗯 咁就乖喇

我望住佢入lip之後我都返屋企

咁又一年啦

唉

諗到下年就要DSE

我就好掛住以前每日喺學校玩嘅日子

第三十三章

咁其實之後都冇乜嘢特別

1月都係喺度考試

咁我就唔多提啦

都只係我同Cherry約埋一齊溫書咁姐

雖然大部份都係佢溫

我主要都係教佢

同埋我終於可以好光明正大咁望住佢啦hehe

唔使好似之前咁偷偷地望

好啦唔講咁多

成個考試過程都叫唔錯啦

我都幾有信心

但係班兄弟又喺到叫晒春咁話唔識又剩咁

我都費事理佢哋

咁考完試之後

Cherry佢哋其實都差唔多要走

佢哋走之前最後一個我哋學校嘅活動就係我哋嘅陸運會

我哋嘅陸運會係一連兩日

通常都會係大概2月尾左右舉行

但係今年好似話因為想我哋嘅轉校生都可以一齊參與

所以改咗係2月頭舉行

然後陸運會於咗之後就直接放農曆新年假

我懷疑其實係學校想慳番一D假期咁

不過算啦

反正有得同我嘅Cherry一齊多幾日就無問題

真係多謝晒

有一日班長又係到叫大家報名

我哋班裡面個D人本身都係做開運動

所以班長一問之下

我哋全班都好踴躍去報名

同埋因為我哋中六嘅呢個時候已經開始咗Study Leave

所以我哋都會當呢一次嘅陸運會係最後一次

跟住我哋都會盡量報多啲項目

Cherry：阿B 你報左咩呀

我：我？ 我報咗200米 400米 同埋跳遠囉 你呢？

Cherry：我無報呀 我諗住做工作人員就算啦 反正我都唔叻運動嘅 你都試繼續加油啊

我：得啦 到時實擺個冠軍俾你嘅

Cherry：你自己講架 到時擺唔到你就知死

咁我順便都喺度同大家講埋其他人報咗D咩啦

阿軒報咗100米推鉛球同埋跳高

強哥報咗100米同埋400米

文哥報咗100米200米同埋400米

金仔報咗100米200米同埋跳遠

傑仔報咗800米同1500米

阿峰報咗400米同800米

阿朗報咗200米400米同埋標槍

睇嚟

又要來多一次兄弟相殘

唔好意思啦

今次贏個個

一定係我

因為今次係我哋中學生涯裏面最後一次嘅陸運會

所以我哋全部人都好重視

當然我哋都好重視啦

我同班兄弟就係因為咁

我哋每日放學之後都會去學校附近嘅運動場練跑

真係風雨不改

而每日Cherry同曉彤都會過嚟幫我哋睇住啲袋同電話銀包

雖然我哋好彩我哋有操返

如果唔係我哋都唔知道完來我哋啲體力差咗咁多

咁話說因為我哋本身都係運動底嘅關係

所以我哋都好快就操返D體能返黎

而家諗返起我會好多謝自己當初咁認真對待呢一次嘅陸運會

今次嘅陸運會唔單止留低咗好多回憶比我

佢仲幫咗我好多

至於咩事我遲啲會講

不過真係架

去到中六之後

自己會好自然咁好認真看待每一件事

可能係唔想自己後悔當初冇做到某啲事

或者係想補償返前5年浪費咗嘅歡樂時光

點都好啦

到將來你望返啲相或者片

你會好自然咁笑出嚟

跟住係到諗：好彩我以前有參加到或者做到某件事

死啦

點解我會變到成個阿伯咁嘅

但係都係個句啦

珍惜當下嘅時間

唔好俾自己去到將來有任何後悔嘅機會

第三十四章

去到某個星期日

因為前一日我哋都練跑練到好夜

所以我今日去到差唔多2點先起身

我望住一個空晒客廳

唉 老豆老母今個禮拜又唔返嚟

係喎

我好似無同大家講過我屋企嘅事

我阿爸阿媽係商人個啲啦

佢兩個成日都要去外國做嘢

有時會留係香港好耐

但係有時幾個月都唔返嚟

只係定期過數俾啲零用錢我

所以其實我同佢哋嘅關係唔算太好

同埋因為佢哋嘅工作關係

呢間屋企基本上同屬於我嘅無咩分別

好啦

返返嚟先

咁屋企無人

然之後我有好肚餓

所以我又去咗食三哥

食食下米線嘅時候

有人突然之間拍我個頭

可怒也

邊條粉腸係我食嘢嘅時候

阻Q住晒

跟住一把聲將我拉返返嚟

xxx：好耐冇見啦喎 豪仔～

WTF

Chloe？！

我：你幾時返嚟架

Chloe：上個禮拜咋嘛 你到而家都係咁中意食三哥喎

我：咁食慣咗吖嘛

點解突然又多咗個女仔呢

咁話說啦

Chloe係我嘅青梅竹馬

我阿爸同佢阿爸係中學同學

仲要係死黨果種

所以我同佢未返幼稚園嘅時候已經成日一齊玩

跟住幼稚園, 小學都係同一間學校

雖然中學唔同學校啦

但係因為果陣時佢住係我屋企對面

所以我同佢一直都好frd

你哋可能會問

通常青梅竹馬唔係一般會走上白頭到老嘅結局架咩

咁可能我同佢特別的啲

我以前仲試過幫佢追男仔

認真呀

我真係冇鍾意過佢

我同佢嘅關係可以話係

兄弟？

差唔多啦

不過佢係我中三個年

佢好似因為屋企嘅事所以去咗澳洲果邊生活

而家先返嚟

而其間我哋都冇咩點聯絡

然之後我同佢都係到傾番以前嘅事

原來佢而家都搬咗嚟呢一邊

過咗唔知幾耐

終於都食完

Chloe就建議周圍行下

我都無咩所謂

反正無咩做

我同佢行咗好多地方

亦都傾左好多野

佢去咗澳洲之後嘅事啦

我呢兩年發生咗咩事啦

當然

我梗係有話俾佢知拍緊拖啦

Chloe : wow 大個仔喇喎 以前成日都話無鍾意嘅女仔 我仲以為你係gay添

我：咁以前真係無個睇得上眼呀嘛

Chloe：冇冇相呀

我擺咗之前平安夜張相比佢睇

Chloe：嘩 又真係幾靚喎 如來你咁眼角高嘅

我：超 我眼角高我就唔會同你條八婆 做frd啦

Chloe：你去死啦 以前我幫咗你咁多 你而家講啲咁嘅嘢

嘿嘿

終於返番去以前嘅感覺喇

之後一直咁行啦

突然之間

係我哋面前出現咗個女仔

我唔係好識解讀佢面上面嘅表情

佢怒啤住我

同時係到流眼淚

但係嗰陣時我個腦淨係彈咗一個訊息俾我

今鋪真係食屎都唔掂

第三十五章

我即刻追住佢

Chloe都知道佢係邊個所以同我一齊追住佢

我捉住佢隻手

我：唔好走住先啦

Cherry：你放手呀

我：你聽我解釋先啦

Cherry：你收聲呀 我唔想聽到你講嘢呀

跟住佢fing甩咗我捉住佢個隻手

Chloe：其實真係唔係你諗咁嫁

Cherry：你又邊個呀

我：阿B呀 你冷靜啲聽我哋講先啦好無

Cherry：你唔好叫我阿B 我唔識你呢啲咁嘅衰人

我：你冷靜啲先啦好無

Cherry：你叫我依家點冷靜呀

我：真係唔係你諗咁嫁

Cherry：夠啦 我唔想再聽到你講嘢 我亦都唔想見到你

講完呢句佢就跑走咗

我想追佢嘅時候

Chloe拉住我

Chloe：你而家講咩佢都聽唔入耳架喇 不如俾佢冷靜下啦

今鋪我真係唔知點算

我返到屋企即刻係咁Whatsapp

但係佢藍剔咗我

唉

有冇人可以話比我知點算好呀

於是我即刻同班兄弟求救

因為佢哋都知Chloe係邊個

阿軒：其實你又係衰嘅 又唔同Cherry講你有個咁嘅女仔朋友

我：咁我又點知佢會突然之間返黎先得架

強哥：唉 今次你又係無辜嘅 無啦啦咁就辣慶咗女朋友

阿朗：不如比我同Cherry傾下啦 話晒我同佢識咗咁耐 佢應該聽我講嘅

我：咁靠晒你啦

今次真係屌出聲

無啦啦整單咁嘅嘢比我

喊出嚟

咁我而家咁擔心都無咩同不如早D訓啦

我訓咗喺張床上面

過咗兩個鐘

我都仲係張床上面

點解嘅

點解我明明咁叻

點解我都仲係訓唔著嘅

幾經辛苦

我終於捱到去第二日

我落咗床

跟住入咗廁所

我照一照鏡

一晚姐

我就已經變到咁殘 點算呀

算啦唔理啦

於是我就拿拿聲換衫返學

返到學校

我望到果個好熟悉嘅身影

但係我唔敢行過去

真係好好笑

平時我見到呢個身影

我一定會即刻走過去

但係我而家竟然卻步

佢好似感覺到門口有人 所以就問咗過嚟

佢望一望我之後

咩都冇講 就做返自己嘢

點解我會有種想喊但係又喊唔出嘅感覺嘅

之後成日

我同Cherry一句嘢都無講過

去到食晏嘅時候

阿軒：喂 毛哥 你今日有冇同Cherry解釋呀

文哥：解條撚咩 轉堂同小息嘅時候就即刻影都唔見

金仔：阿朗你果邊又點呀

阿朗：Cherry今次連我講嘅嘢都唔肯聽呀 佢話我一定係幫你噏

我：咁都唔可以怪你嘅

傑仔：毛哥 你唔好咁灰啦 實可以救得番既

我：希望啦

結果去到最後

我今日全日都係無同Cherry講過一句嘢

我究竟可以點做

Cherry要點先可以原諒我

如果要我一直咁樣過生活

我真係受唔住

去到我依家先知道

呢啲所謂嘅冷戰(?)

其實真係冇乜嘢

反而係一啲好珍貴嘅回憶

因為你起碼都仲有一個比你奮鬥嘅目標

到你連奮鬥嘅目標都冇

作為你人生動力嘅果個人 都唔係到嘅時候

個一種

先至係真正嘅痛苦

第三十六章

幾經辛苦終於過咗一日

返到屋企嘅時候

唔知點解成個人都好無動力

所以我無去練跑

番到屋企

我就直接攤咗係張床到

我完全唔想郁

其實我係咪好無用

連一段關係都維持唔到

因為無完全坦白

我就搞到依家咁

突然之間

有人打電話比我

電話顯示打俾我果個係阿朗

我：喂

阿朗：毛哥 你得唔得閑出一出嚟呀

我：可以嘅

跟住佢就俾咗個地址我

我跟住個地址行

我去到之後

喺我面前嘅係一間喺商場上面嘅咖啡店

間咖啡店唔係好多客人

所以我入咗去之後好快就搵到佢哋

全部人都睇晒度

阿朗一望到我就同我揮手

阿朗：嚟咗喇 睇下想飲啲咩 隨便啖 呢間舖頭係我阿媽開嘅唔使擔心

我：冇所謂啦

阿朗於是就去咗同收銀果度嘅人講

而我就坐低咗

冇幾耐之後

阿朗就擺咗杯mocha比我

我飲咗啖

嘩

真係好好飲

唔係講笑

阿朗：係咪好飲呢

我：遲D叫你阿媽教我沖咖啡

強哥：你哋兩個唔好轉晒話題先啦

文哥：我哋幫你諗到個方法可能可以幫你逃返Cherry喇

我：係點呀 快啲講啦

我一聽到有方法我真係成個人醒晒

仲勁過啲咖啡

阿朗：我之前同Cherry傾過偈 佢話你應承過佢會坦白一切 但係你瞞住佢 識咗第二個女仔

我：WTF 我邊有同佢做過呢啲約定

阿軒：依家佢話咩就咩啦 你唔係諗住同佢嘈掛

我：咁你哋又有咩辦法

金仔：你之前係咪應承咗佢話會擺一個冠軍俾佢呀

我：哦 咁我知點做啦

阿峰：但係唔係淨係咁簡單

我：即係點呀

阿峰：佢而家其實都好驚

我：佢驚咩 唔係得我驚咩

傑仔：屌 你真係弱智架啫

阿朗：佢之前見到你同Chloe一齊 佢驚你只係玩佢 你而家玩厭咗 所以唔要佢

我：痴線 點會係咁

強哥：你冇同佢講過 佢又點知你心入面點諗

阿峰：每個人心入面都會有啲嘢唔敢講出嚟 佢唔係對你無信心 佢係對自己冇信心 佢驚自己無能力留住你呀

我：咁我要點做

阿軒：咪直接同佢講你心入面係點諗囉

我：但係佢而家都唔理我

阿朗：呢層你唔使擔心 我哋會幫你

我：多謝你哋

喺呢個時候又好唔爭氣咁

流咗幾滴馬尿

去到第二日

我同平時一樣咁返學

今日返到學校都係見到Cherry

佢依然係唔理我

我同佢講左聲早晨

不過佢都係唔理我

咁佢唔理我都有辦法

於是我就返埋位

跟住我就聽到我個肚係度打鼓

唉

而家無咗每日一個腿蛋治

開始唔係好慣

之後我一直都係到搵一個機會畀自己用佢講嘢

可惜

佢冇一次理過我

我都開始頹

不斷努力但係連小小成功嘅希望都見唔到

真係好容易灰

去到晏晝

傑仔：點呀 你今日同唔同到佢傾番計呀

我：唔得呀 佢真係唔肯理我呀嘛 我可以點

文哥：陣間bafs堂 你哋兩個一齊上嫁嘛

我：希望真係得啦

食完飯返到學校就係bafs堂

入到課室

本來係佢坐嘅位空咗

睇嚟佢未返

第三十七章

過多一陣之後

我見到Cherry終於行入課室

佢望到我之後

我隱約見到佢好似係度深呼吸？

跟住就行過嚟

坐咗係我隔離

但係佢都係無望過我一眼

點解我同佢會搞成咁

明明就喺隔離

但係我同佢之間就好似有一道巨大而無形嘅牆

上堂嘅時候

佢都仲係無望過我一眼

係一眼都無

無論我幾辛苦去嘗試

幾努力去突破

呢一道牆都仲係絲毫無損

我成堂都係到諗緊我要點先可以打破到隔膜

突然之間

教BAFS嘅黃sir：陳子豪 你答我咩叫Future Value

我呆咗

因為我真係冇聽書

我企咗係度

正想同阿sir道歉嘅時候

Cherry : Future Value 即係一樣嘢係某段時間之後嘅價值

黃sir : 啱嘞 陳子豪你要多謝人哋救咗你呀 你好專心上堂喇

我 : 係嘅 係嘅

頭先Cherry幫咗我 ?

我坐返低之後

望住Cherry

佢依然眼望住前面嘅黑板

我 : 唔該晒呀

Cherry用非常低嘅聲量 : 嗯

佢應我呀呀呀呀 ! ! !

我辛苦咗幾日

終於有返少少新嘅進展喇

我突然覺得自己可以越來越容易打破呢度牆

之後我都有不斷搵機會試下撩佢講嘢

雖然佢都係冇應過我

但係自從頭先佢幫咗我之後

我就覺得自己一定可以成功

放咗學之後

我即刻搵齊晒文哥佢哋

然後同佢哋講返頭先發生嘅事

文哥 : 咁佢幫得你就代表 佢心入面仲著緊你啦

阿軒 : 係囉 咁你而家可以唔駛咁擔心啦

阿峰 : 你而家可以專心咁練跑啦

阿朗：未得住

傑仔：仲未得？咁仲要做啲咩

阿朗：而家Cherry雖然幫你 但係咁唔代表 佢而家仲對你有信心

金仔：咁而家仲要做啲咩呀

強哥：我覺得而家毛哥你要搵個機會同Cherry講清楚你自己心入面到底係點諗
將你自己嘅想法講晒俾佢知

阿朗：同意

我：咁幾時先係啱嘅機會呀

強哥：機會唔係等出嚟 係要自己創造架

點解我覺得而家我自己好似係果啲熱血動漫裡面

但係真係好幸福

有班咁好嘅兄弟係度幫我計劃咁多嘢

去到第二日

一返到學校

佢都係好似平時咁

坐係自己位做自己嘢

我都有特別去搵佢傾計

因為我知道佢都仲係唔會理我

可能會真係聽唔到掛

但係我覺得佢係特登

是但啦

總之今日我要比佢知道我內心到底係點諗

我一日唔話比佢知我點諗

分分鐘我同佢就真係係咁先

但係都要一個合適嘅時機

係呢個時候

我諗返起尋日強哥果句說話

機會唔係等出嚟 係要自己創造架

創造？

講就易

但係到底要點先可以創造到

今次我唔可以再問倆個佢哋

雖然我問到嘅話佢哋一定會幫我

但係我每次都要靠佢哋先做到嘢嘅話

咁我真係好失敗

而家係我嘅感情事唔係佢哋

下下都要佢哋幫我手

我都真係唔係幾好意思

所以今次我都係決定要靠自己

喺我一直諗到底要點先可以創造機會嘅時候

哎吔

機會唔係成日有 機會擺喺面前 把握唔到嘅話 冇咗就真係冇咗 唔會返轉頭

第三十八章

我聽到有人係度嗌咗一下

我好自然咁拎轉頭問吓發生咩事

我見到Cherry坐咗係樓梯邊

攞住自己嘅腳腕

我即刻行埋去

我：你點呀

Cherry：冇事

我無理到佢句無事

因為佢面上面嘅表情已經話比我知佢好痛

我捉住佢嘅腳腕

稍為出多少少力

佢已經痛到嗌咗出聲

我拉低咗佢隻襪

隻腳腫晒

真係豬蹄咁款

於是我扶起咗佢

我：嚟啦 我扶你去醫療室

Cherry：唔駛 我無事

我：乖啦好無 唔好再死頂啦 你隻腳腫晒都話無事

Cherry冇再出聲

於是我就扶咗佢去醫療室

由於佢隻腳真係有少少嚴重

我哋嘅速度有啲慢

行行下嘅時候

我諗返起之前佢又係扭親

跟住我就咩咗佢返屋企

不過今次係學校嘅關係

所以我只係扶住佢

跟住我個腦突然彈咗兩隻字出嚟

機會

係嗰

依家我同佢獨處緊

如果我今次唔講嘅話

我真係唔知仲有咪下一次機會畀我講

我：Cherry呀

Cherry：嗯

我：其實呢 我有啲嘢想同你講呀

Cherry：嗯

我：一直以黎 我都冇呃過你

Cherry無應我

於是我繼續講

我：你之前見到嘅果個女仔 我同佢嘅關係真係唔係你諗咁樣

Cherry聽完之後望住我

我：佢個名叫做Chloe 係我嘅青梅竹馬 我無同你講過佢嘅存在係因為佢之前離開咗香港

講講下就已經送到佢去醫療室

我放低咗佢之後

我：我講咁多嘢都只係想話你知 我對妳嘅感情由頭到尾都係真 我一直都冇呃過你
我講過我淨係鍾意你一個 就真係淨係鍾意你一個

講完之後

我見到Cherry望住我

跟住我就轉身走咗

唔係懶型

而係再唔走我就肯定俾人話我走堂

雖然之後Cherry成日都冇同我講嘢

但係我feel到佢對我無之前咁嬲

起碼佢無好似之前咁一見到我就黑面先

其實咁對我嚟講已經係一件好好嘅事

放咗學之後

我即刻將呢件事同強哥佢哋講

強哥：咁你已經成功咗一步啦

阿朗：咁睇黎你之後只需要係陸運會做返你應承過嘅嘢 咁應該就冇問題啦

我：應該都係

文哥：但係有個唔係幾好嘅消息

我：乜嘢唔好嘅消息呀

文哥：展希佢同你撞咗幾個項目呀

傑仔：咁毛哥你今鋪大撚鑊喇喎

展希係我哋級裏面嘅運動大將

佢係我哋學校嘅田徑隊主力

佢幫我哋學校攞過唔少田徑嘅獎

跟住佢而家同我撞咗唔少項目

即係代表今次如果我要攞冠軍嘅話

難度係加倍上升

今次真係喊出嚟

但係雖然話展希佢好勁

但係我話晒都係足球隊嘅主力

運動上應該唔會太過輸蝕嘅

如果我肯再努力啲練習嘅話

分分鐘我真係贏到佢呢

就係因為咁

我比以前更加努力去練跑

真係好叻

但係我都堅持要早啲起身返學

唔係淨係因為想見多啲Cherry

而係我已經習慣咗

習慣咗就唔想變

今日我又係正常時間咁返學

返到學校

我見唔到有人喺課室

但係我知道Cherry返咗嚟

因為佢個位已經放咗個書包

可能佢去咗廁所掛

咁我就返埋位

我將筆袋放去櫃桶

咦??

第三十九章

喺我櫃桶裡面出現咗一包嘢

係一個好熟悉嘅包裝

一個白色膠袋

裡面係一個兩塊嘅白色夾住一塊紅色同黃色

腿蛋治

我：YES！！！！

我喺心裏面咆哮

望到果個好耐都無見過嘅腿蛋治

我個心莫名嘅感動

即係代表Cherry已經下咗少少火

如果真係咁嘅話就好啦

即係代表我尋日講咁多嘢

唔係曬口水

真係做到嘢

我而家已經唔係強求佢一定要應我

即係佢唔好好似之前咁完全當我隱形咁就得

嘅然佢依家都好似之前咁買腿蛋治比我

咁已經足夠

跟住落嚟我成日都好開心

成個人好似High大咗咁

文哥：你拍藥？

我：你都痴孖根 我係唔會掂煙同毒架

文哥：知你乖仔啦 我都係講吓笑啫

阿朗：咁你做咩 無啦啦咁開心嘅

我將腿蛋治嘅事同晒佢哋講

傑仔：咁你而家放心好多啦

我：梗係啦 仲駛你講嘅

強哥：照咁睇你只要遵守承諾就無事啦

我：嗯

冇錯

跟住落嚟我淨係需要做返自己應承過佢嘅嘢

咁應該就冇事架喇

話咁快

就終於到咗陸運會嘅日子

我今日好早就起咗身

雖然只係馴咗大概4, 5個鐘

但係都好精神

我感覺到今日係我嘅日子

我話比大家知

今日我先係王道

冇嘢可以阻擋到我

今日我約咗成班兄弟食早餐

點解？

要預祝我嘅勝利呀嘛

即係咁講姐

咁大家互相鼓勵下

可能表現都會好啲

總之就喺大戰之前聚一聚啦

因為而家真係朋友

陣間企喺跑道上面就已經變咗敵人

阿軒：毛哥 今日就係判定日喇喎 你有冇信心架

我：同你講贏緊就一定係呃你嘅 始終最大嘅對手係展希 但係信心嘅話 唔多唔少都有嘅

金仔：嘩 大佬呀 你而家講到好似淨係同展希1on1咁 當我哋流？

阿峰：話晒我哋都係足球隊正選嚟㗎

文哥：仲要我哋都練咗好耐架

強哥：我哋話之你係咪想氹阿嫂 仲之想贏就問過我哋先

我：咁我諗我哋冇彎轉架啦

阿朗：並沒有

我：咁兄弟都無情講架喇

阿軒：睇下到時邊個喊

死啦

都未開波就已經全世界咁蠢鳩

陣間仲得了嘅

是但啦

反正佢哋都唔係我對手

我對手係自己度

Shit

又膠咗

總之最後贏果個一定係我

吹吹下水嘅時候

我哋已經到咗運動場

入到運動場

原來已經有好多人到咗

個場面重要好熱鬧

係咪因為最後一次嘅關係呢

點解覺得今年嘅陸運會盛大咗咁多嘅

總之今年我一定要好好享受埋今次呢個陸運會

第四十章

入到去運動場之後

我第一眼就望倒Cherry

佢係度幫緊同學搬物資

又要講下我哋學校陸運會嘅小小背景啦

咁我哋學校有6個社

咁我就以藍綠淺藍啡紅黃嚟表示啦

我係藍社嘅

而學校為咗可以令轉校生更加融入我哋嘅校園生活

所以佢哋都會平均分入我哋6個社

Cherry同我一樣係藍社

而阿朗就同阿軒同強哥一樣係淺藍社

番番嚟先

我一入到運動場就見到Cherry係度幫我哋社嘅人搬運物資

咁我仲企係度做咩吖

梗係即刻埋去幫手啦

我一手攞咗佢捧住嘅箱

我：等我幫手啦 你早幾日扭親就休息下啦

Cherry：我有事

我：無事都抖下 粗重嘢男人做架嘛 返去坐下啦

Cherry：唔該

講完佢就轉身返番去我哋個社嘅位置

我開始可以同佢正常傾偈喇

心情即刻變到好好

拿拿聲搬完物資之後

我都返埋位

我緊係坐係Cherry附近啦

唔係我唔想坐佢隔離呀

而係佢去咗同佢班frd一齊坐呀嘛

咁我有理由阻住人架嘛

咁咪坐佢附近擺

見佢哋有時傾計有時指住我

應該係講緊我？

唔知Cherry而家係咪下咗氣呢

話咁快

今日嘅陸運會就要開始喇

訓導主任：請全體學生起立

訓導主任：而家請我哋嘅學生代表帶領宣誓

等學生代表同校長講完一大輪嘢之後

我哋最後一年嘅陸運會終於開始喇

老師：而家請工作人員, 各個項目嘅負責老師到自己所屬嘅區域
今屆陸運會嘅比賽將會喺30分鐘後正式開始

我參加咗嘅項目最早果個係200M 但係都有排先開始

所以即係我仲有大把時間做準備

老師：而家首先請男子C grade 100m 跨欄同男子C grade 推鉛球嘅參賽者到召集處報到

唉

又諗起今次就係我中學生涯裡面最後一次陸運會喇

以前成日係度玩

完全唔識得珍惜

而家就係度怪自己點解之前要咁樣係度浪費時間

突然有人拍我膊頭

金仔：做咩呀 毛哥 呆晒咁嘅

我：冇嘢呀 我諗緊嘢咋嘛

阿峰：諗緊陣間點氹人咁呀？

我：冇呀 要準備嘅都準備晒啦 盡力就好啦

金仔：加油啦 信你實得嘅

過多一陣之後

：男子甲組100m 初賽最後召集

文哥佢哋都參加咗100m 架啲

咁我都落去同佢哋打吓氣先

落到去已經見到佢哋喺召集處果度拉筋

我：咁多位大佬睇嚟都好有信心啲

文哥：梗係啦 你陣間唔好嚇親添呀

金仔：等我話比你知咩叫快過光速

阿軒：I will be back in a flash

強哥：今鋪冚家劇喇 一個二個中二癡發作 點贏呀

阿軒：不過我就建議你留意下展希 話晒陣間你要同佢跑 收下料都好

我：得啦 你放心 我識做架喇

老師：而家請咁多位選手去跑道準備

第四十一章

文哥同阿軒係第一組

佢哋兩個望落去都好輕鬆咁

又係嘅同佢哋練咗咁多

真係想係初賽輸都幾難

呼

佢哋兩個都跑得好快

一開始已經大幅拋離其他選手

阿軒同文哥佢哋兩個分別擺咗第一同第二

佢哋同第三名個個相差成1秒

有睇過賽跑嘅人都知1秒其實真係相差好多

好喇

唔講咁多

話咁快第二場比賽就要開始

即係代表展希要開始比賽

On Your Mark

Set

呼

一開始展希起步比其他人慢

跟住我喺度諗

唔通佢今日狀態唔好？

如果係咁就好

今日應該會輕鬆好多

但係好快佢就用行動證明咗比我知我實在太過天真

我一路望住佢慢慢咁開始加速

由第8名開始一路追上

第7名...

第6名...

第5名...

第4名...

第3名...

第2名...

第1名.....

跟住仲要一直拉開距離

到最後佢嘅成績係11秒65

同第二名相差接近3秒

係呀

你無睇錯

真係3秒

痴撚線架

佢由原本落後去到反超再領先

成個過程11秒65

我真係睇到O撚晒嘴

睇嚟今日有排捱

跟住去到第三組嘅金仔同強哥嘅比賽我都有咩心情睇

我個腦自己係度諗今日要點先好

我後來知道佢哋都成功入到決賽

恭喜晒

但係我就真係唔知點算喇

今日我要對住個爆晒seed嘅對手

唔好話贏晒

分分鐘真係一場都贏唔到

跟住我就一直都好苦惱

金仔：毛哥 你做咩咁愁呀

我將我諗緊嘅嘢話畀佢知

佢唉咗一聲

跟住呢個時候

文哥佢哋全部過晒嚟

文哥：金仔你唉乜春嘢呀

跟住金仔就即刻將我頭先講嘅嘢話俾佢哋知

強哥：我屌你老母 好心你就唔好咁驚青啦 我哋練咗咁耐 你而家走嚟縮沙

阿峰：我哋花咗咁多時間喺你度你連試都唔試就諗住放棄？

傑仔：我哋每日放學陪你練習唔係玩架 真係見你好有決心先陪你架咋

我：對唔住 但係我真係好驚

阿軒：我真係唔知你驚乜柒 你花咗咁耐時間去練習 咁你都冇信心

阿峰：你有練習人哋都有練習架啦 咁人哋進步唔通你會無咩

阿朗：我雖然唔清楚果個展希以前有幾勁 但係我覺得你唔會差過佢

金仔：如果你而家真係諗住放棄嘅話 先唔講我哋 你對得住你自己咩 你之前咁辛苦 每日放學就去練跑 練到9, 10點 風雨不改 你付出咗咁多 你真係甘心咩

甘心？

我唔甘心

我又點會唔知道自己比其他人付出多幾多努力

但係我頭先見到展希咁嘅表現

我真係好驚自己會失敗

我忍唔住流咗滴眼淚

我：對唔住.....

呼

我開眼個一刻我發現我訓咗係地下

點解我會訓咗係度嘅

我望一望

文哥好大力咁打咗我一拳

文哥：你而家本pea咁做乜撚嘢啫 你覺得你咁做Cherry會原諒你咩 佢見到你咁仲會鍾意你咩 你應承咗佢嘅嘢係咪諗住唔理 你諗住就咁就算？ 女朋友都唔諗住要？

我慢慢咁企返起身

我：唔係.....

文哥：咁你諗住點呀 試都未試就諗住放棄 覺得自己輸緊 咁似樣咩 以前果個毛哥去咗邊呀 以前不斷鼓勵我 幫我同曉彤做frd嘅毛哥去咗邊呀 果個又樂觀又咩都唔驚嘅毛哥喺邊呀

一次又一次想放棄的念頭不斷在腦中徘徊

第四十二章

返返去中3既時候

我同文哥逢星期二四都要一齊去補習

而補習社裡面有一個女仔

文哥一直都話果個女仔好靚

但係佢又衰滂底 唔敢同人哋講嘢

成個月連人哋個名係咩都唔知

嗰陣時我一直幫佢洗腦 希望會對自己可以有多啲信心

最後佢終於知道咗果個女仔嘅名

冇錯

果個就係而家文哥嘅女朋友--曉彤

某程度上 我係將佢哋兩個拉埋一齊嘅月老

基本上算係交代下文哥口中嘅以前嘅我

嗰啲詳細嘅情節可能遲啲會再講

返返嚟先

文哥：咁你諗住點呀 試都未試就諗住放棄 覺得自己輸緊 咁似樣咩 以前果個毛哥去咗邊呀 以前不斷鼓勵我 幫我同曉彤做frd嘅毛哥去咗邊呀 果個又樂觀又咩都唔驚嘅毛哥喺邊呀

我：我真係贏到咩

金仔：我哋陪咗你咁耐 雖然唔係日日都喺度 但係啲成績都幾好 咁你一定無問題啦

強哥：同埋我哋都有同佢一樣嘅項目架嘛 我哋幫你搞掂佢等佢擺少個冠軍啦

我：多謝你哋呀

阿軒：屌你咩 男人老狗講呢啲 總之你比啲信心自己啦 你實做到嘅

之後嘅比賽就係1500m

因為參賽人數比較少嘅關係

所以呢個項目會直接入決賽

傑仔最後攞咗亞軍

呢個成績叫做唔錯

因為第一名果個係cross country team嘅隊長

跟住落嚟就到我嘅200m

但係呢場比賽會喺食晏之後

即係好快就要同展希較量

強哥：點呀毛哥 你陣間搞得掂啦

我：應該都冇問題啦

但係老實講其實我仲係好驚

始終佢真係好勁

不過我唔可以輸

我輸咗就真係乜都冇

可能你會問我點解唔同佢夾埋比我贏

因為如果我唔係憑自己實力贏到個冠軍返嚟嘅話

我唔單止對自己唔住我更加對Cherry唔住

同埋佢始終都會發現到呢個冠軍係造假嘅

有啲嘢瞞唔到好耐

真相總有一日會上水

跟住我都唔敢食咁飽

費事陣間嘔

快快手手食完之後我就返返運動場準備

拉下筋跑下圈熱下身咁啦

話晒今日成日都無乜點郁過

好快就聽到廣播叫200m嘅人係去召集

文哥, 金仔同阿朗佢哋已經到咗喺度吹緊水

文哥：呢場係你今日第一場比賽 要俾心機呀

阿朗：我話你知我哋唔會放水架 兄弟都無情講呀

冇耐之後

我哋全部都喺跑道上

我望住展希

佢坐咗喺度拉緊筋

我同我自己講今日一定要贏到佢

就算賭上一切

我都要贏

突然間

耳邊傳嚟咗一句

On Your Mark

終於要開始

Set

唔可以俾自己後悔

呸！！

跑道上8位選手隨即起跑

一開始我排喺第5

金仔同阿朗係我前面

而文哥就喺我後面

過咗大概50米左右

我開始發力加速

慢慢由第5名追到上第2名

展希就係前面

只要我再努力啲就可以爬佢頭喇

但係佢都好似察覺到有人追緊上嚟

所以佢都開始加速

當然我都唔執輸

去到最後60米嘅時候

我哋兩個叮嚙馬頭

我哋一直維持著呢個狀況去到衝線

第三名係金仔

之後就係阿朗同文哥

但係

到底我同展希之間嘅第一仗

係邊個贏？

第四十三章

我望向運動場上面果個大螢幕

1. 鄭展希 00.24.68

2. 陳子豪 00.24.85

0.17秒

爭少少

就係個少少

我輸咗

呢個時候展希行咗埋嚟

展希：估唔到你都幾勁喎阿豪

我：大家咁話啦

展希：陣間嘅比賽都要加油呀 我好期待你跟住落嚟嘅表現

唔知點解

我聽到佢呢一番說話之後

我成個人醒晒

今次只係初賽

之後總會有決賽同埋其他比賽

我唔可以咁快放棄

我仲要氹返Cherry架

我：你都要加油呀

過多一陣之後就係400m嘅初賽

因為都有咩特別所以我就唔講咁多啦

大家只係需要知道我贏咗就得啦

抖多一陣之後就係我哋嘅社際4X400m

據我所知阿峰都有參加

但係我都係唔會讓佢

兄弟 對唔住喇

4X400 裡面

我嘅位置係第二棒 因為我係唯一一個識得cut線嘅人

阿峰就係第四棒

咁都好啲 因為我哋兩個唔使正面交鋒 我都唔洗咁驚

始終同兄弟比賽嘅壓力都唔惹小

但係我嘅目標都只係得一個、

贏

我都知今次陸運會我講咗好多次要贏

可能真係煩咗啲

咁但係今次贏唔贏到真係好重要 呀嘛

可以話係影響我嘅一生架

冇誇張

轉眼間勝負已經分咗

我講到咁

大家都估到係我哋贏咗喇

但係阿峰都唔係路

佢哋都擺咗第二名

阿峰：恭喜晒嗰毛哥

我：你都唔差啦

阿峰：唔係講笑 真係出埋奶力都贏唔到

我：咁唔係淨係得我哋有努力嫁嘛 其他人都會練習嘅

好

我而家已經率先擺咗一個金牌

暫時都好順利

我而家有一個金牌 然之後一個項目入咗決賽

之後有三個項目仲未開始

跟住落嚟就係今日嘅最後一個項目

我哋每級嘅班際4X100接力比賽

呀 係呀

我唔記得咗講

由於我學校係男校

你哋可能會問咁雖然男交換生可以參加我哋嘅比賽但係女仔點算

學校就係因為呢個原因

所以強制要求有交換生嘅班別同社喺接力賽嘅時候一定要有一個女同學係度

頭先社際個個女仔無提過

係因為佢真係同個故事無咩關係

好似好mean咁

咁係乜嘢

陣間你哋又話我ar字數啦

咁點解我無啦啦又會講呢個規則

都好明顯啦

因為我哋班際嘅果位女同學就係Cherry

唔講你唔知

其實Cherry運動方面都叫做唔錯

雖然唔係真係好勁果隻

但係都叫做唔會失禮嘅

同一時間

展希都參加咗

即係又要出盡奶力去跑

一日兩次chur到咁盡 會唔會死架

算啦

其實今次都已經係中學最後一次陸運會

如果唔跑到命都冇嘅話

可能會有啲後悔都唔定

諗咁多都無用

拿拿林去休息下仲好過

過咗一陣之後

：請中五班際4X100接力賽嘅參賽者都召集處報到

別辜負所承受的痛苦

這將成為成長的證據

第四十四章

要嚟嘅始終要嚟

文哥：喂 毛哥 你仲坐係度做咩呀 召集緊喇

冇錯

文哥都有參加

我哋兩個出晒名係疾風兄弟

只要我哋兩個一隊

基本上想輸都幾難

唔係嚇你哋

話晒都係足球隊兩個最快嘅隊員

點都可以carry下嘅

跟住文哥同我就分別係第三同第四棒

Cherry就係第二棒

隔離班嘅展希同我一樣第四棒

同一時間D班嘅陣容都好得人驚

除咗第一棒個個唔識之外

就係傑仔, 阿峰同阿朗

分別就係第二,三同四棒

今鋪真係大鑊

阿朗都好勁

之前足球比賽嘅時候就知咩事

又係一場硬仗

等我哋都企好晒位嘅時候

阿朗：阿豪你有無信心呀

我：老實講其實真係無乜 啱啱先跑完400米 而家又要跑一百 真係好劫

阿朗：咁你就真係要加油啦 雖然知你好辛苦 但係我都係唔會讓你架

我：我梗係知啦 就算你讓我 展希都唔會

我望住坐喺地下拉緊筋嘅展希

~搞清楚 今日嘅經過構成你同構成我
確定左要咩成果~

唔知點解

我個腦突然之間彈咗呢一句歌詞

都唔知提咗自己幾多次

一直以來

支持我嘅都係班兄弟

佢哋係我身邊一直陪著我

無論開心定係唔開心都好

佢哋都係度

但係今次係我嘅問題

我嘅問題一定要由我自己解決

兄弟都幫唔到我啲咩

都係嘅

始終靠咗佢哋咁耐

都係時候要長大

靠返自己

始終佢哋唔係永遠都會幫到我

中學畢業之後就真係乜都無

我唔可以再繼續嘅樣落去

再加上今次係個人比賽

佢哋想幫我都幫唔到

只可以陪著我訓練

諗下諗下

比賽都準備要開始

呼！

C班嘅阿輝一馬當先起勢咁加速

但係D班嘅聰哥都唔執輸

好快就平排

之後呢個局勢就維持到去第二棒

我哋B班嘅第一棒根仔以第三名形勢交棒畀Cherry

其實我哋咁啱全部嘅第二棒都係女仔

成個感覺就好似睇睇下男子接力突然之間變咗女子接力咁

遠來Cherry真係幾勁

兩三下手勢已經追到上去第二名

去到第三棒嘅時候

Cherry同第一名嘅D班之間嘅距離得返好少

我見到佢交完棒之後好似幫咗我一眼

佢嘅眼神就好似話俾我知

你一定要贏

淨係會一個咁嘅眼神 我已經叉滿電

好快

文哥已經超過咗第一名

就嚟嚟到

A班機嘅第三棒

而家係第三名

同文哥仲有一段距離

即係我比展希早少少起步

同時間D班亦都咬住文哥唔放

我同阿朗基本上係同時開始助跑

到我接到棒之後

我好似隱隱約約地幫唔到一把好溫柔亦都好熟悉嘅聲同我講加油

我即刻咩都唔理係咁跑

成個過程我感覺到身邊嘅空氣都好似凝固咗咁

我聽唔到周圍嘅打氣聲

除咗自己嘅呼吸聲同跑道之外

我咩都感覺唔到

我隻腳每一下落地嘅感覺都好實在

一下一下咁

呢種咁嘅感覺一直維持

直到我聽到震耳欲聾嘅歡呼聲

我就好似返番嚟現實咁

無人話你唔得

係你自己話你唔得

第四十五章

: 你好癲呀
: 好熱血呀
: 好彩今次冇射波咋

當我仲諗緊到底發生咩事嘅時候

文哥: 毛哥

我: 做咩呀

文哥: 你老老實實話比我知 你到底係咪食咗過期春藥

我: 你咪搵癲啦

文哥: 如果唔係點解你會咁快架

展希係呢個時候行咗埋嚟

展希: 阿豪 原來你咁勁架 我真係出晒力想追你都追唔到

追唔到?

咁即係

我贏咗????

我再望一望個顯示屏

1. 5B
2. 5A
3. 5D
4. 5C

我真係贏咗呀!!!!

第二面金牌

我嘅冠軍之路開始明朗

但係我真係估唔到我自己咁勁

根據我向好多人收集嘅情報

當我接棒之後就一直咁跑

仲要開始拋離阿朗

然後展希接棒之後梗係即刻爆速

唔使一陣佢已經追過咗阿朗

但係就一直都收窄唔到我同佢之間嘅距離

反而仲有拉開嘅跡象

呢個形勢就一直維持到我衝線

我真係估唔到我竟然會咁樣贏咗

唔通呢啲就係傳說中嘅爆發小宇宙？

呢啲事蹟J一陣就夠啦

要好好準備第二日嘅比賽

陣間開始飄就奶屎架喇

因為今日最後一場嘅比賽都完咗

所以過多一陣之後我哋都解散返屋企

我都拿拿聲走

快啲返屋企休息下

如果唔係聽日冇力跑

我到咗巴士站嘅時候

咁啱就目送咗我班車係我面前離開

連個天都咁對我

我都係想快啲返屋企啫

咁都有錯咩

於是我就充滿著怨氣咁去排隊

我帶住耳機聽歌

挨咗係個欄杆到瞓埋眼休息下

過咗一陣之後

我感覺都好似有人望住我

我開眼望一望隔離

咁啱就同Cherry四目交投

佢即刻回避我嘅視線

我為咗唔好咁尷尬所以就求其搵啲嘢講

我：你頭先4X100都幾勁喎

Cherry呆咗一陣先知道我同佢講緊嘢

Cherry：係...係咩 都唔係好勁姐

Cherry講完之後我哋兩個都無嘢講

成個氣氛尷尬到喊出來

過多一陣Cherry突然開口

Cherry：你而家暫時個成績點呀

我：而家都幾樂觀呀 暫時有有兩個冠軍 跟住其他項目都入晒決賽

Cherry：咁你要繼續加油呀

我：梗係啦 我仲要攞總冠軍架

我特登提高總冠軍就係提醒佢呢個承諾我一定會守

跟住我好似見到Cherry稍為笑咗一下

無奈之後 我哋架巴士都到咗

跟住我是但搵個位坐低

Cherry行咗過嚟

Cherry：我可唔可以坐你隔離嘅窗口位呀

我：冇問題呀

雖然Cherry坐咗係我隔離但係我真係好搵劫

開車冇耐就訓著咗

訓訓下嘅時候

我隱約聽到有人喺我耳邊講嘢

但係我完全聽唔清楚
應該都係發夢姐

唔知訓咗幾耐之後

直到Cherry叫醒我

返到屋企之後我就即刻沖涼訓覺

直到有人打電話比我

我等你

第四十六章

屌你老味我今日真係好撚劫

邊條撚樣阻住我瞓覺

我摸咗一陣先搵到我部電話

我擺起部電話望吓係邊條仆街

原來係曉彤

我收番頭先講過嘅嘢

但係點解佢會打俾我

以防萬一大家唔記得咗佢係邊個

佢就係文哥嘅女朋友

我：喂

曉彤：喂 阿豪？

我：係呀曉彤 做咩啊

曉彤：阿文同我講你好似有啲心事咁 所以佢叫我搵下你

屌 文哥呢條死仔

擔心又唔講

兄弟就係咁

有啲野明明好在意

但係就係偏偏表現都唔在意

然之後喺暗地裏默默咁擔心

我：而家基本上都有咩事喇 你可以放心

曉彤：但係好似係關女仔事喎 使唔使我俾啲意見你呀

俾佢咁講

可能文哥就係想曉彤俾啲意見我所以先叫佢打俾我

又諗得幾周到啲 衰鬼

我：其實而家都差唔多解決㗎喇

曉彤：咁你當講個故仔俾我聽得唔得吖

咁佢都講到咁啦 話俾佢知其實冇乜所謂

於是我盡量將成個故仔完整咁由頭到尾講比佢知

佢聽完之後靜咗一陣

我仲以為佢cut咗線

曉彤：我自己諗啦 其實你唔需要咁重視呢個陸運會擺唔擺到冠軍
其實Cherry等緊你嘅係一句正式嘅道歉

我：即係點呀

曉彤：簡單啲講啦 你哋兩個之間爭一句對唔住就可以變返以前咁

我：但係我應承過要擺個陸運會冠軍俾佢

曉彤：你覺得喺佢心目中你重要啲定係嗰一牌獎牌重要啲？

我：...

曉彤：我唔講到咁白啦 個答案係咩你自己心裏有數

跟住我哋就收咗線

同佢傾完電話之後我完全冇晒睡意

我淨係喺度諗我要點做

承諾定係道歉....

尋晚唔知去到幾多點就瞓着咗

但係我起身嘅時候成個人都好辛苦

周身骨痛

應該係琴日帶落嚟嘅傷

哇屌

唔係講笑真係好痛

依家要去郁一都痛

陣間陣間比賽咪仆街？

跟住我醒起琴日返到屋企唔記得浸冰水

Shit 失策添

鬼叫自己大懵唔記得咗

而家做怨婦都冇用

跟住過多一陣我就換衫跟住出發返去運動場

去到運動場我第一個就見到展希

佢都望到我跟住就即刻行過嚟

展希：阿豪點解你個樣好似咁殘嘅 冇事呀嘛

我：冇啊只係尋晚瞓得唔好而家成身都好痛姐

展希：我都唔知點幫你好 你試吓拉下筋啦可能會好啲

我：得啦 有心

展希：唔好咁容易整親呀我仲好想同你繼續鬥埋今日㗎

我：你今日有咩項目

展希：我今日有100米200米同跳遠囉 你呢

我：我有200米400米同跳遠啊

展希：咁你要加油啦

我：你都要加油

金翅仆街鳥

今日狀態咁差但係我仲要同佢鬥兩場比賽

咁我好難贏㗎嗎

跟住我突然之間諗返起琴日曉彤同我講嘢

我突然間諗通咗少少野

好啦唔講咁多

我中學生涯最後一場陸運會嘅決賽日要開始喇

一句道歉

已經係一種距離

第四十七章

今日陸運會嘅決賽日嘅第一場比賽就係100米

我哋兄弟幫裏面有參加比賽嘅都入晒決賽

即係文哥,阿軒,強哥同金仔都有份

一場比賽有8條跑道

即係有8個選手

而8個裏面有一半都係我嘅人

大家係咪即刻聯想到「球證、旁證、足協、足總、足委，全部都係我嘅人，你點同我打呀？」呢

好可惜

我人脈冇咁廣

我都係唔好係咁派膠喇

好

而家鏡頭影住嘅係我地喺跑道上面的8位選手

佢哋望落去都非常精神

佢哋望落去全部都好精神

呢個時候文哥行咗過嚟

文哥：同尋日一樣呀 你好望實展希

我：得啦 我會收多啲料架喇

文哥：雖然我哋都未必贏到佢 但係我哋一定會盡力chur爆佢

我：咁就靠晒你哋喇

冇錯

我係無咩人脈

但係我有我班兄弟就夠

事不宜遲

我哋嘅100m比賽好快就要開始

8位選手各就各位

on your mark

set

呼!!!

一開始領先嘅係文哥之後係強哥跟住就係展希

但係好快展希就追過咗強哥

得返文哥同展希兩個廝殺

文哥一直係前面帶頭

展希就喺後面慢慢咁收窄佢哋兩個之間距離

當展希同文哥相差帶來一個身位嘅時候

文哥亦開始加速

可惜文哥嘅體力都開始見底

就快到終點嘅時候文哥都係捱唔住被展希過咗

最後展希亦順利將呢一塊金牌收入自己嘅獎盃櫃

雖然真係好可惜

但係都無辦法

文哥已經盡晒力

我行咗過去搵文哥

佢訓低咗喺終點線嗰度

我：點呀 死得未呀

文哥：屌你啦 今次真係爆seed咁跑架

我：得喇 知你勁喇 起身先啦

於是我就扶咗佢起身

文哥：你同我醒醒定定呀 我已經盡晒力架喇 你要同我贏呀

我：我盡力啦

之後嘅比賽係跳遠同400m

但係無咩特別

所以我就直接講話俾你哋知我贏咗啦

咁係乜嘢

又唔係特別刺激

唯晒D字數就唔係幾好啦

話咁快就去到Lunch time

阿軒：毛哥 你爭一場比賽咋咯 有無信心呀

我：你話我好有信心梗係假架啦

文哥：你唔好輸呀 如果唔係我會扁柒你架

我：都係果句 我盡力啦

金仔：扁 食嘢啦 咁多嘢講 陣間費事你話我哋阻住你食嘢搞到你輸添呀

我：咁我又唔會咁仆街嘅

拿拿聲食埋個晏晝就返去熱下身準備下

返到運動場嘅時候

成個場都無咩人

應該全部都去晒食晏啦

咁我都無理

返返自己位去換鞋

係我著緊鞋嘅時候

有個人坐咗係我隔離

：你陣間跑咩

咦

我抬起頭

真係Cherry

我：200m呀

Cherry：加油呀

我：得啦 放心我一定會贏 應承過嘅嘢一定會做到

Cherry個表情稍為變左一變

雖然只係一瞬間

但係我都睇得出

Cherry：嗯

我淨係想你同我講一句嘢

一句咁簡單嘅說話點解你都講唔出口

第四十八章

唔知過咗幾耐之後

我終於聽到200m 決賽召集嘅宣佈

痴線

真係等到人都癲

要集中精神咁耐真係好辛苦

再支持多一陣

去到召集處

展希已經係度拉緊筋

展希：阿豪 陣間加油呀 我想同你認真鬥埋我哋中學生涯嘅最後一場比賽

我：我樂意同你奉陪到底

你哋可能會問我唔係好唔鍾意展希架咩？

咁你哋就錯喇

呢啲識英雄重英雄

你哋識條鐵咩

跟住我哋就慢慢行去200m嘅起跑線準備

一路上

我一直諗返起以前嘅事

中一嘅時候人生路不熟乜嘢項目都有參加到

淨係識得坐喺觀眾席打氣

去到中二嘅時候

無啦啦俾人捉咗去參加班際仲要好負碌咁贏埋個冠軍

跟住就開始比D高年級嘅人睇中

不斷咁拉我去參加社際比賽

就係咁

嘅中學生涯就開始越來越多姿多采

而家諗返起

真係要好好多謝當初咗過去跑班際個個人

返返嚟現實

話咁快我哋已經係起跑線上面準備緊

On your mark

Set

呼

我同展希一聽到就差唔多同時起步

但係佢快我少少

我同展希只係相差一個馬鼻嘅身位

我哋嘅速度都差唔多

咁就大撻鑊

如果我同展希嘅速度keep住一樣嘅話

咁另一個方面嚟睇

即係我同佢嘅距離永遠都拉近唔到

我絕對唔可以輸

我無失敗嘅機會

我一定要贏佢

Cherry會離開我嘅諗法一直喺我個腦入面

我真係好驚

今鋪真係一失足成千古恨

我連少少錯都唔可以有

雖然話就話要盡全力

但係實際上我連少少距離都拉唔到

當我哋就嚟衝線嘅時候

當我以為我輸咗嘅時候

突然之間

展希跌咗落地下

正當我諗住唔理佢繼續跑嘅時候

我眼角稍到展希個樣好辛苦

佢仲要捉住自己隻腳裸

我果陣時好掙扎

冠軍就放咗係前面

但係我嘅良心同我講唔可以咁做

最後我停咗係終點線前

我有勇氣去行埋最後一步

卒之

當原本落後緊嘅選手衝線嘅時候

我就知道自己已經做咗選擇

已經冇得返轉頭

我慢慢行埋去展希身邊

佢坐咗係地下

我伸咗隻手埋去

我：點呀 死得未呀

展希望一望我

展希：點解你唔過埋終點線呀 你唔係好想贏冠軍咩

我：係架 所以陣間我要早過你過終點線架

展希用一個唔知係乜嘅表情望住我

展希：點解嘅

我：對我嚟講 我要贏嘅對手只得你一個 同埋你唔係叫我好好享受中學生涯裡面最後一場比賽嘅

我扶咗展希起身

我：如果我唯一嘅對手都訓低咗 咁我仲點享受啊

係呢個時候 我笑住咁望住展希

展希：你真係好撚肉麻呀

跟住有兩滴水喺佢隻眼都流咗落嚟

我：我屌 你唔撚係呢個時候流馬尿掛 唔好咁gay得唔得先

同一時間

成個運動場嘅觀眾都向我哋鼓掌

我先知道原來我方做錯決定

第四十九章

係呢個時候全場歡呼

文哥佢哋衝晒過嚟

阿軒：毛哥你就威啦 比你擺晒彩添啦

文哥：咪就係囉 咩風頭都俾妳搶晒啦

金仔：毛哥你個樣做咩咁呀 你咁都唔開心咩

冇錯

雖然我擺晒全世界嘅掌聲同讚賞

但係我失去咗一個人對我嘅信任

雖然就算我贏咗呢場比賽

我最後都會因為覺得自己贏得唔光彩而唔開心

咁我不如做番啲正確嘅事

同埋而家再諗都無用

唔發生嘅都發生咗

咁我仲可以點

但係我點都要面對

於是我就周圍搵佢

終於比我係看台山頂位搵到佢

Cherry自己一個坐係度單手托頭 好似喺度諗緊嘢咁

我行咗埋去 坐咗喺佢隔離

我一坐低

Cherry望一望我

跟住繼續凝視著跑道

跟住佢突然之間開口

Cherry：你又話一定會贏嘅

唉

今鋪真係含得撚橡皮糖喇

我都估到佢會咁問

只不過我仲未諗到點答佢好姐

我而家淨係識得講一句嘢

我：對唔住

Cherry突然望住我

Cherry：你做咩講對唔住呀

我：因為我做唔到應承過你嘅嘢

Cherry嘆咗一口氣

Cherry：你應承過我啲咩

我：我話要贏架嘛

Cherry：我從來都無要求你一定要贏 一直以黎都係你講 你話你會應承過乜嘢
但係你到底知唔知我想要嘅嘢

我答唔到

因為我真係從來都無諗過到底自己諗嘅係咪佢希望嘅

Cherry見我無答佢

於是佢就繼續講

Cherry：其實我嘅要求一直都好簡單同好容易

我：咁...係咩呀

Cherry：如果你真係覺得你自己了解我嘅話 我覺得你可以好容易就估到
同埋我頭先都俾咗少少提示你

講完佢就行開咗

留低我一個人係度沉思

提示？

乜嘢提示

我又miss咗啲乜嘢

點解我可以咁搵蠢

曉彤：其實你唔需要咁重視呢個陸運會擺唔擺到冠軍 其實Cherry等緊你嘅係一句正式嘅道歉

一句正式嘅道歉.....

唔通真係咁簡單佢就會原諒我咩

突然之間

我諗起頭先Cherry頭先嘅反應

同我講對唔住嘅時候

佢即刻望住我

係佢嘅眼神裡面

我好似見到有少少嘅

希望？

跟住之後當我同佢講咗我道歉嘅原因之後

佢好似有啲唔開心

同埋開始鬧我話我唔知佢想要嘅係咩

可能曉彤講得啱

Cherry一直等緊嘅就係我嘅一句道歉

我都唔理得咁多

而家咩方法都要試下

跟住我就即刻起身搵Cherry

但係唔知點解我周圍走都搵唔到佢

同我仲搵緊佢嘅時候

：頒獎典禮將會喺5分鐘後開始 請所有學生返回自己嘅座位
同埋請得獎者馬上去到自己所屬嘅社嘅隊伍就位

唉 頂你個肺

頒獎禮又會咁快開始嘅

咁唯有完咗頒獎典禮先再搵佢啦

望住咁多位嘅選手上台攞獎

我有突然之間諗起

以前一直都覺得呢啲頒獎典禮好悶好想skip左佢

但係而家先知道原來呢啲頒獎典禮都係中學回憶嘅一種

以前唔想睇頒獎典禮就走去搵班frd玩

狼人,uno,象棋

仲有大把

你講都講唔晒

你淨係吹水都大把嘢吹

呢啲回憶真係唔係講笑

淨係諗吓都覺得開心

第五十章

話咁快個頒獎典禮終於去到尾聲

淨返最後一個獎未頒

就係Individual Champion

亦即係我最唔想見到嘅獎

因為我唔想見到一個唔係我嘅人攞呢個獎

我唔想接受自己嘅失敗

司儀：好喇 相信大家都等咗好耐 係時候公佈我哋學校今屆陸運會嘅individual champion喇

跟住成個運動場氣氛都好高漲

每個社記啦啦隊都不停咁嗌自己嘅口號

就好似自己嘅社嘅其中一個人會攞呢個獎咁

其實

呢個獎會落係邊個手上都已經估到

司儀慢慢將氣氛拉高其實只係將我嘅死亡時間拉長

不如快啲了結我啦

唔好再拖喇

終於

司儀：我而家將會宣佈我哋今屆陸運會嘅individual cham就係.....

快啲講啦

司儀：5B班嘅陳子豪！！！！

我：下

WTF

點解係我嘅

正當我仲諗緊點解我會贏咗嘅時候

司儀：我哋嘅陳子豪同學係今次嘅陸運會裡面贏得4面金牌 呢個獎係佢實至名歸嘅
大家一齊比啲掌聲佢

於是

我帶著一個好疑惑嘅心情囉咗呢個獎

擺完獎之後我就去問一問其他人先知

原來展希只係擺咗2塊金牌同埋2塊銀牌

跟住我諗多一陣先醒起

我同佢有三場都係一樣

而係呢三場比賽入面

全部都係我贏咁滯

除咗場200米之外啦

我而家先知道

原來我咁撻勁

hahaha

自high咗一陣之後

我先醒覺

我有一樣好重要嘅嘢要做

當頒獎典禮完咗之後

我即刻係度周圍搵佢

終於

我見到佢同佢班friend一齊傾緊計

佢班friend見到我之後都自己行開

我行咗過去坐低咗

我未等Cherry開口我就已經開聲先

我：對唔住呀

Cherry好似比我嚇親

Cherry：你做咩講對唔住呀

我：所有嘢都好對唔住

Cherry冇出到聲

我見佢無咩反應

於是我就繼續講

我：我之前冇同你講過有關Chole嘅事 真係好對唔住

Cherry：咁點解你之前完全冇同我提過佢嘅存在

我：有幾個原因啦 咁首先因為佢前幾年去咗外國生活 我原本以為佢唔會再返嚟 咁既然佢都唔會返嚟 咁都可以唔洗話俾你知啦

Cherry：仲有呢

我：另外一個原因就是 D人成日都話青梅竹馬最後會發展成情侶架嘛 咁我同佢重要係由幼稚園識到依家架嘛 咁我驚你會呷醋咁所以我更加唔敢講 你又唔係唔知你自己成日都係咁有疑心架啦

Cherry：咁你有冇諗過如果一早講咗嘅話 你而家咪唔使咁辛苦囉

Cherry講講下隻眼開始有啲濕

我：起碼我而家有俾到解釋你㗎 雖然真係差咗少少

我講完之後

將一塊掛係我條頸上面嘅獎牌除咗落嚟

我：同理...

我將呢塊獎牌遞俾佢

我：我都遵守咗我嘅承諾㗎

呢塊就係我嘅individual champion 嘅獎牌

Cherry望住我塊獎牌

會慢慢伸隻手接住

然之後就係咁望住塊獎牌

佢唔會係見到塊獎牌開心得滯掛

Cherry慢慢擰轉頭望住我

Cherry：對唔住

第五十一章

咩話？

佢....佢頭先講咩話

Cherry眼中嘅眼淚終於流咗落嚟

Cherry再一次同我講

Cherry：對唔住

我：做咩無啦啦同我講對唔住呀

我盡量表現到好自然

但係其實我個心裏面驚到仆街

呢種咁嘅劇情如果發生係電視劇或者愛情小說裏面嘅話

除咗係講分手之外

我諗唔到其他結果

我求下你唔好

我越諗越驚

慢慢

我隻眼都開始流咗一滴眼淚

Cherry見到之後即刻伸手幫我抹咗啲眼淚

然之後問我

Cherry：做咩喊呀傻豬

聽到傻豬呢兩隻字之後

我隻眼裡面嘅眼淚就開始控制唔到

眼淚開始決堤流落嚟

我：你唔好離開我 我唔想無咗你

Cherry：無人離開你呀

我：咁你做咩講對唔住呀

Cherry稍為笑咗一笑

Cherry：我講對唔住係因為我覺得我好小氣 同埋唔識體諒你 見到你同第二個女仔一齊就認定你有第二個 連小小解釋嘅機會都唔比你

Cherry：你可唔可以原諒我啊 我會改...

我未等佢講完

我已經忍唔住攞住佢

我：我好掛住你呀

Cherry緊緊咁攞住我然後好溫柔咁摸我個頭

Cherry：我而家咪係度囉

Cherry：咁你可唔可以原諒我啊

我稍為冷靜咗少少

我摸一摸佢塊面

我：梗係可以啦傻妹

然之後我就錫咗埋去

我而家先明白

有好多嘢

無論令你幾失望都好

只要你見到對方真係有因為咁而努力去做補救

去到個個時候

一句對唔住其實已經好有份量

其他所謂嘅承諾已經再唔係啲乜嘢

我終於都氹返Cherry

當我哋一齊離開運動場嘅時候

Cherry突然之間主動拖住我

我望一望佢

Cherry微笑住咁望住我

oh shit

我嗰一刻真係成個人溶晒

呢種感覺真係無論幾多次都係咁開心

同我行出咗運動場之後

我擰轉頭

望住呢個我嚟過5次嘅運動場

我諗起每一次比賽嘅時候

果種緊張

果種興奮

努力過後嘅果種喜悅

真係唔係就咁可以用文字話俾你哋聽

呢個運動場亦都見證咗我嘅初戀嘅復合

佢見證著我為咗呢一段感情所付出嘅壓力

多謝你

離開運動場嘅時候已經5點幾

由於運動場距離我哋屋企都幾遠下

所以我同Cherry一齊搭巴士返屋企

上咗巴士之後

我哋揀咗坐喺樓上嘅車頭

我讓咗個窗口位俾佢坐

跟住Cherry突然之間開口

Cherry：你有冇耳機啊

咁對於我呢啲聽歌愛好者

耳機呢啲又點可以少呢

我哋每人分左一邊耳機

跟住佢又伸手要攞我部手機

唉

即係有冇得聽周仔

不過是但啦

有得同Cherry一齊

聽咩都冇所謂啦

「別當你要奮勇血戰

無論聰穎或愚笨

猜猜情尋 雖不如人

不影響你笑臉迎人

沒有說過你要戰勝

留下歡樂便無憾

猜猜情尋 猜猜情尋

玩輸可以勝過別人

多一餐好教訓」

我真係估唔到佢又係播陳奕迅

我唔知大家仲記唔記得

但係我就記得好清楚

上一次我哋一齊搭巴士嘅時候

我仲記得係去緊Ms Chou屋企食飯

跟住佢播咗陳奕迅嘅無條件

跟住而家佢又播猜情尋

我：乜原來你好鍾意陳奕迅架咩

Cherry：係呀

我：你有幾鍾意佢先

Cherry：嗯...就好似你有幾鍾意周國賢咁啦

嘩

咁佢都真係幾鍾意

佢講完之後就挨咗去我個膊頭度

同時我哋亦都十指緊扣

呢種咁嘅感覺

真係好懷念

雖然佢都唔係嬲咗我好耐

但係呢段時間對我來講通過咗幾十年咁上下

所以經過咗今次之後

我同我自己講我會更加珍惜佢

第五十二章

我哋聽咗唔知幾多首歌之後

終於都到站

咁作為男朋友就梗係要送佢返屋企啦

我：不如我送你返去啦

Cherry諗咗一陣之後

Cherry：不如我哋去食咗飯先啦

我望一望手機

17:45

唔撚係呀

6點都未到就食飯??

我：但係而家6點都未到啫

Cherry：但係我好肚餓呀

望住Cherry嗰個眼神

喂導演呀

佢開外掛啊

你叫我點忍心拒絕佢先得架

所以Cherry最後都令到我就範

當我仲諗緊帶佢去食咩好嘅時候

Cherry已經一馬當先拖住我隻手帶住我行

當我仲諗緊佢帶緊我去邊嘅時候

同時我喺度擔心跟我銀包

因為我原本真係無諗過我今日會去食埋夜晚先返屋企

所以我真係唔夠錢

我仲未擔心完

佢當然之間就停咗係outback門口

WTF

大佬呀

我真係窮架

我：可唔可以食第二間呀

Cherry：點解呀 你唔鐘意据扒咩

我：唔係...但係我唔夠錢比呀

Cherry：其實我諗住請你食架

我：下 你發咗達咩 做咩無啦啦請我食飯

Cherry：冇呀 咁下個禮拜係情人節呀嘛 我又唔知道送咩比你好 咁所以咪請你食飯囉

仆街

我真係唔記得咗原來下個禮拜就係情人節

之前淨係掛住諗點樣氹返佢

完全冇諗過原來時間過得咁快

Cherry：我而家請你食飯 咁所以你識做啦

我：得啦 你同我放心

今次死緊

我真係冇準備過

而且我淨係得返一個禮拜嘅時間

咁而家點算好呢

成餐飯我哋就好似返咗去以前咁

我餵下你 你又餵下你咁

話咁快就食完

我原本諗住同佢AA制

因為都真係幾貴

兩個人食outback 食咗差唔多1000 其實都真係幾誇張

但係佢又真係諗住自己一個人比晒

咁就真係仆街啦

佢宜家請咗我食一餐咁貴嘅飯

咁即係代表我一定要送番一份差唔多份量嘅禮物啦

唉

唔緊要啦

其實情人節都係一年一次咁姐

一年一度嘅日子洗突啲都無所謂啦

屌

唔係呀

而家係唔搵夠時間準備呀

比著我係李嘉誠都準備唔切啦

唔係嘅

李嘉誠可能連情人節都會叫自己啲管家幫手搞掂都唔定

我都係唔好再晒咁多時間

當我送咗Cherry返屋企之後

我即刻去頒救兵

咩話

邊個係救兵？

超

除咗佢之外仲會有邊個姐

同一間中學之外仲要係青梅竹馬啲

就係個一晚

我就即刻whatsapp左佢

但係我今次就冇之前咁好彩

我收到嘅答覆係

：今次我都幫唔到你 我自己都有嘢煩緊

咁都無辦法啦

唔可以下下都叫佢幫手架嘛

咁我唯有搵第二個啦

跟住我就搵咗強哥

我：喂大佬

強哥：咩呀

我：我想問下你呢

強哥：屌你講快少少得唔得啊 Annie等緊我架

annie就係強哥嘅女朋友

講係佢哋兩個真係火都嚟

日日都見面呢啲我真係明白

但有時真係屌出聲

佢哋兩個係要係我哋面前放閃

尤其是之前當我仲同Cherry反緊面嘅時候

仆你個街 真係完全當我無到咁濟

拖手就由佢啦

你老味又攞又錫

仲要係咁互flirt

咁擺明搞鳩我姐

好喇 要屌嘅基本上都屌晒

返返嚟先

我：咁就嚟情人節呀嘛 我想問....

強哥：你想問送咩俾Cherry呀嘛 係咪呀

我：...係呀...

強哥：屌你老味 而家Cherry係你女朋友定我女朋友呀

我：我

強哥：咁咪係囉 而家係送嘢俾你女朋友呀 唔係我呀 你係佢男朋友 咁唔係應該好了解佢鍾意啲咩架咩

我：但係...

強哥：但乜撚嘢係吖 送個禮物都阿支阿佐 你唔撚好拍拖算啦

第五十三章

其實強哥講得啱嘅

始終而家呢個係我嘅女朋友

送咩畀佢應該係我自己決定

如果咩都問人嘅話

咁我真係唔好拍拖算

同埋之後嘅日子

唔同我每次送禮物之前都要問一次其他人咩

但係你而家問我情人節送咩俾佢好嘅時候

我真係喊出嚟

諗唔到呀大佬

諗送咩禮物已經咁辛苦

我終於明白點解啲人話拍拖會短幾年命

我諗都應該係真

但係有睇睇開嘅故事嘅人都應該知道我真係一個冇咩創意力嘅人

之前SINGCON同聖誕節嘅主意其實都係要人哋幫我諗出嚟

我真係從來都無試過自己一個人去諗咁多嘢

但係正所謂凡事總有第一次呀嘛

咁咪放手搏一搏囉

經過咗我幾日嘅調查

我發現原來啲人冧女都係嗰幾招姐

但係有咁多嘢揀

我真係唔識點揀

跟住我又諗起強哥講嘅嘢

其實我遲早都要自己諗架啦

咁不如我將呢啲搵返嚟嘅資料當係我嘅參考

之後再慢慢搵個計劃出嚟

經過咗我一個禮拜嘅計劃之後

我最後都係放棄

因為真係搞唔掂

我都係走咗去問強哥

咁當然都係比佢屌咗我一鑊金啦

呢啲少少苦我都捱得住嘅

咁之後落嚟係強哥嘅幫手之後

我終於都搞掂咗我嘅情人節計劃

我幫呢個計劃起左一個好撻威嘅名

千祈唔好嚇親呀

我叫呢個計劃做情人節之浪漫史之夜大作戰

喂

唔係講笑呀

呢個名聽到都嚇得下人架

咁當然我都希望呢個計劃唔好淨係嚇人啦

如果可以成功咁就最好啦

皆大歡喜呀嘛

但係真係唔係講笑

為咗今次呢個大作戰

我真係晒咗唔少錢

睇嚟今次真係有排捱面包

但係如果可以到佢開心

食多啲麵包又有咩所謂㗎

咪當吸收多啲碳水化合物囉

又唔係啲咩壞事嚟嘅

但係如果佢唔鍾意嘅話

咁我真係收皮算

(大家唔好意思 為咗可以加密啲出文嘅頻率 由而家開始 每一章嘅長度將會稍為縮短
同埋由於小弟學業繁忙嘅關係 所以文章嘅質素可能麻麻 係呢度講番聲對唔住
希望大家仍然對阿豪同Cherry嘅故事有興趣啦)

第五十四章

2月13日

可能大家見到呢個日期已經會想問點解唔係情人節嘅正日

咁我都要拖一下劇情架嘛

我真係唔信你哋會信我咁快完架啦

(況且我仲未開始諗下個故嘅情節架)

同埋我都唔係淨係得Cherry架嘛

我仲有一班兄弟架嘛

淨係識得陪女 唔理兄弟嘅話

會比人屌鳩我重色輕友架

只不過情人節前一日我哋雖然話約咗出嚟打邊爐

但係打邊爐嘅時候

傾嘅咪又係女

拿拿拿

唔好屌住先

咁係丫嘛

男人之間

唔係打機就係講波

再唔係就講女架啦

唔通突然之間講回憶咩

回憶呢啲嘢都係留返之後淨番幾條毛

然之後踢住拖 係一棵大榕樹下面慢慢講啦

好啦

都係唔好再講咁多住喇

屎忽就嚟俾人屌爆啦

強哥：屌你老母 英超曼聯又輸一仗 都唔知麥佳亞做乜鳩

文哥：條撚樣擺明係臥底啦

我：我真係鄧你哋班獵狗辛苦 比自己友搞到咁 不如轉隊啦

文哥：你都痴孖根

強哥：喂 唔好講我哋住先啦 聽日情人節啦啲 諗住點同Cherry慶祝呀

阿軒：係啲 講啲嚟聽下啦

我：你哋班仆街仔 Cherry都無你哋咁期待

阿峰：話晒都係你哋第一個情人節呀 我哋都想知你哋會點慶祝架嘛

係啲

其實如果唔係阿峰同我講起

我真係醒唔起原來呢個係我哋第一個情人節

可能因為我哋已經經歷咗太多嘢啦

我有時候真係以為我同Cherry已經係埋一齊咗好耐

真係因為突然之間醒起聽日嘅重要性

我更加希望佢會鍾意聽日嘅安排

阿軒：喂 做咩突然之間發晒牛豆呀

阿軒拍一拍我膊頭

我先至返返嚟

我：冇嘢呀 諗緊啲嘢姐

強哥：快啲話俾我哋知你哋聽日嘅活動啦

我：過咗聽日先話俾你哋知啦

阿軒：屌 扮撚晒嘢咁

我：唔好跟我啦 強哥聽日又諗住同條女去邊呀

強哥：多事啦你 文哥同曉彤又點呀

文哥：你估下

金仔：阿朗你又點呀

阿朗：我就唔好提啦

傑仔：個撚個都係咁 唔好講啦 總之希望你哋四個聽日順利啦 乾杯！！！！

就係咁我哋成班麻甩佬又清咗一批啤酒

第五十五章

2月14日

等咗咁耐

終於到咗呢一日

唔係講笑

呢一個禮拜對我嚟講真係好似過咗成年咁

我真係好耐都無試過咁用腦

考試都無咁辛苦

但係喺臨近橋嘅過程啲搬走都係開心嘅

因為我真係好想知道佢對你呢一個plan會有啲乜嘢感覺

到底佢會唔會鍾意

我今日差唔多12點先起身

因為我哋今日嘅活動係7點幾先開始

事關佢今日話屋企有啲事

所以日頭唔方便出嚟

咁都係嘅

始終我哋兩個嘅屋企人都唔知我哋有拍拖架嘛

咁我見起身無咩嘢做

所以我就碌下IG

一開IG就見到周街啲撚樣都係到放閃

一個二個喺度我愛你你愛我咁

真係睇見都眼冤

不過唔緊要

因為今日我都唔擔保我會唔會放閃

喂

咁都話晒係第一個情人節呀嘛

我都唔知我會有咩感覺嘅

好啦

都係唔好講咁多

大概去到4：30左右

終於差唔多夠鐘出門口喇

嘩

我真係第一次覺得時間原來係過得咁慢

我去到衣櫃面前

一打開

頂你個肺

一套好睇少少嘅衫都無

要怪就怪我平時冇好好咁襯衫

無辦法啦

死毒撚就係乜都唔識架喇

死啦

我近排係咪受咗啲咩挫折

做咩突然之間咁負面嘅

算

咁衣櫃都無咩衫揀啦

咁唯有隨便啦

最後我揀咗一件棗紅色嘅hoodie 然後再配一條黑色嘅工裝褲

然後再著多對深藍色嘅stan smith

臨出門口之前

我拎咗一件比較厚少少嘅褸

因為我都驚佢今晚會凍

好彩仲未遲到啫

岩岩好夠鐘

冇幾耐之後

我就到咗約定嘅地方

我仲早咗到添

但係唔夠一分鐘之後

我已經見到Cherry

嘩

唔撚係呀

第五十六章

Cherry著住一件米白色嘅大褸

然之後着住一條紅色裙加多對legging

佢仲要戴咗一副大圓框眼鏡

真係冇得彈

Cherry真係每一次都俾到驚喜我

唔係

應該係咁講

Cherry本身就係我人生中嘅驚喜

Cherry行過嚟拍一拍我個頭

Cherry：做乜野發晒牛豆呀

我：冇呀 見到靚女呀嘛

Cherry：邊個呀

我：咪你囉 靚女

Cherry：車 口花花

我：但係點解你咁早到嘅

Cherry：點解我唔可以早到呀

我：我以為女仔又要襯衫又要化妝 通常都會遲到架嘛

Cherry：咁我就係因為知道我搞呢啲嘢要花時間 所以我先至要更加走去做準備

嘩

正係呢個解釋

已經係滿分啦

我：真不愧係我女朋友 實在諗得太周詳喇

Cherry : 死傻仔 成日到誇張到死

我 : 係咁架啦 係要盲撐架喇

Cherry : 咩話 乜嘢叫做盲撐呀 即係你講大話啦

跟住佢就即刻擰我耳仔

痴撚線架

女仔都咁大力

我 : 我無講大話呀 我真係讚你架

Cherry鬆咗手

Cherry : 真係 ?

我 : 我幾時有呃過你啫

Cherry : 咁又係 好啦放過你啦

跟住我哋就上咗巴士

Cherry:我哋依家去邊呀

我 : 而家都成7點幾 我哋去咗食嘢先啦

Cherry : 咁我哋而家去食咩呀

我 : 不如去食韓烤放題啦

Cherry : 好呀 我都好耐冇食韓烤喇

嘩

幾驚你話唔想食呀

我一早已經book咗位

你而家先話唔食咪大劑

不過其實應該都有事嘅

話晒你兩日之前先話過想食韓烤

好彩我咁啱聽到

如果你唔係淨係諗去邊度食都真係可以搞到我拗爆頭

好

今日嘅情人節之浪漫史之夜大作戰

正式開始！！！！

第五十七章

上咗巴士之後

Cherry：阿豪 你有冇帶耳機啊

我：有啊

Cherry：不如我哋一人一邊聽歌呀

我：靚女叫到無理由拒絕嘅

於是我就攤咗我個耳機出嚟

佢帶住右邊嘅耳機

而我就帶住左邊嗰個

然後 我將耳機插入手機嘅耳機孔

跟住我都無特別去揀歌

我淨係揸咗隨機播放

我哋聽到嘅第一首歌就係

側田嘅美麗之最

其實我唔算係側田嘅fans

只係我幾鍾意呢首歌嘅旋律

所以就加咗呢一首歌入去我嘅歌單

但係呢一首歌真係講出我嘅心聲

我：又會咁啱係呢首嘅

Cherry：做咩呀

我：我而家坐係我人生中嘅美麗之最隔離 再聽著美麗之最 果種感覺真係好似發緊夢咁

Cherry：白痴仔

Cherry好甜咁笑咗一笑

然之后佢就挨咗係我膊頭上面

我真係好想時間停留喺呢個時刻

但係可能個天唔抵得我哋咁sweet

所以好快我哋就到站

咁食韓烤嘅過程都無咩特別

都係咁啦

啲詳情就唔講喇

陣間你哋一個二個又話我恰單身狗啦

咁食完飯之後

我就帶左佢去中環

Cherry：做咩無啦啦去中環嘅

我：冇呀 中環碼頭個view靚呀嘛

Cherry：咁尖沙咀海旁唔靚咩

我：都靚

Cherry：咁點解要去咁遠呀

我：唔話你知

Cherry：哎吔 講啦

佢仲要扁晒嘴咁

我真係好想搵佢個咀

佢個樣真係

真係

唉

我已經唔識點去形容

淨係可愛同靚已經唔足以去形容佢

但係好彩我都忍住㗎

我：你去到咪知囉

Cherry：車 懶神秘咁

第五十八章

之後

我哋終於去到中環海傍

Cherry：咁我哋而家去邊呀

我：你跟住我行埋知囉

Cherry：哎吔 講少少啦

我：唔得嗰

Cherry：車 好叻咩

我見佢好似真係有啲蹦蹦地

所以我即刻一隻手攞住佢咁行

我：你信我啦 我唔會食咗你嗰

Cherry個樣好似好返少少

果然我真係一個好了解女人心嘅人

Cherry：量你都唔敢食我啦

我：哼 好難講呀

跟住我就搵咗佢個鼻一下

Cherry：嘩 變態佬呀

我：但係你鐘意嗰

跟手我就即刻錫咗佢一啖

Cherry塊面即刻紅晒

都話咗我好了解女人心架啦

講你哋又唔信

真係呢

唔係講笑

丞女朋友我真係有一手

噏

唔計陸運會個次啊下

之後我帶咗佢去中環海旁個個AIA嘅摩天輪

Cherry：你特登帶我嚟搭摩天輪架

我：唔通帶你嚟睇摩天輪咩

Cherry：但係做咩咁突然嘅

我：你以前話過你未試過丫嘛 咁我咪帶你試下囉

其實佢之前同我講過

但係我方同大家講

Cherry：原來你記得架

跟住我哋就去咗排隊

但係因為聖誕節嘅關係

所以個條龍都真係有啲長

咁大家都知架啦

12月嗰

有幾凍大家明啦

仲要係喺海邊添

其實真係好辛苦

跟住我就見到Cherry成個人凍到震晒

然之後我就將今日攤出嚟果件襖

搭喺佢身上

佢望一望我

然之後就攞住我

我：做咩呀

Cherry：咁唔可以淨係得我一個咁舒服架嘛 所以我咪分啲溫暖比你囉

我：點解我可以有一個咁溫柔可愛嘅女朋友架

Cherry：又係咁口花花

我係認真架

第五十九章

唔知過咗幾耐之後

終於都到咗我哋喇

雖然真係好凍

但係排隊嘅過程當中真係覺得好溫暖

坐咗上去之後

Cherry就好似一個細路女咁周圍望

咁都唔可以怪佢嘅

話晒係佢嘅第一次呀嘛

不過我都好耐無搭過摩天輪

以前細細個嘅時候

老豆老母成日都會帶我周圍去玩

但係大個咗之後佢哋兩個都開始冇咩點理我

相處嘅時間就越來越少

跟住而家仲要成日去外國出差

真係一年都唔知有冇見到十次

雖然而家我已經坐緊係個摩天輪上面

但係果種感覺始終都係唔同

一個種同父母一齊嘅時候嘅果種親子樂趣

另一種就係同你心愛嘅人一齊既甜蜜

人係長大概路途上將會失去一啲嘢

但係同時你亦都會獲得一啲嘢

所以當你失去咗某啲嘢嘅時候

嘗試下唔好淨係喺度懷緬過去

試下去珍惜一下你仍然擁有嘅嘢

死嘞

又講遠咗添

隨著摩天輪一直轉

坐係我隔離嘅Cherry都仲係咁興奮

咁大個日都仲係成個細路女咁嘅

不過望到佢咁開心

我都好滿足

當我哋去到最高點嘅時候

Cherry突然之間望住我

唔係講笑

佢突然間咁望住我

我都嚇咗一嚇

Cherry：多謝你呀

我：做咩無啦啦多謝我呀

Cherry：如果唔係你 我可能無機會過一啲咁開心嘅聖誕節

然後佢就攞住我

我輕輕咁摸下佢個頭

然後我feel我褲袋果一盒嘢

我攞咗出嚟

我：送比你架

Cherry：咩黎架

我：你打開咪知囉

其實係一條頸鍊

條頸鍊上面有一隻印著咗MO & Cherry嘅戒指

Mo其實係用返我個花名毛仔去改

因為我本身個英文名太柒 唔想用

所以就用咗呢個

Cherry：好靚呀

跟住我就幫佢帶起左條頸鍊

Cherry：你自己整架

我：係呀 所以之後我每一次見你都要見到條頸鍊架 如果唔係你就死梗

跟手我就搵咗佢個鼻一下

Cherry：知道啦 多謝你比咗一個咁完美嘅聖誕節我呀

講完佢就撲咗埋嚟錫咗我一啖

好

我而家向大家宣佈

情人節之浪漫史之夜大作戰

大成功！！！！！！！！

第六十章

話說講起條頸鏈

真係搞咗我好耐

我之前plan好晒行程之後

就係到諗

淨係同佢去個摩天輪好似唔係好夠誠意

所以我就係咁係度諗想啲乜嘢禮物畀佢

真係諗到我頭都大埋

之後我就不斷咁上網搵

「情人節送甚麼給女友」

「情人節的浪漫禮物」

「女友喜歡的情人節禮物」

跟住仲要上埋連登搵資料

但係一般都係話咩戒指呀花呀

大佬呀

我同佢一齊咗一年都無就送戒指

會唔會快咗啲呀

同埋送戒指嘅話好似有種綁住咗佢嘅感覺

跟住就到送花

嗱

即係我唔係話送花唔得

但係好似真係有啲老土

跟住我又唔知Cherry鍾意咩花

同埋送花俾佢嘅話

唔通要佢嚟住扎花周街走美

可能你哋又會問

咁到時送佢返屋企嘅時候先比佢囉

我真係屌出聲

頂你個肺

咁咪即係我要擺住紮花周街走

咁會唔會仲巒鳩啲添呀

然之後我就係咁搵搵搵

終於比我係唔知邊個網頁搵到話送頸鏈

頸鏈啊.....

又唔係唔得嗰

頸鏈其實唔會太貴

而且帶起身仲會幾靚添

跟住我就繼續碌

跟住就比我搵到一個可以自訂頸鏈嘅舖頭

都話咗GOOGLE會睇住你架啦

FBI IS WATCHING YOU

屌 睇咪睇 驚閻咩

之後望一望果個價錢

係就係貴咗啲

但係冇所謂啦

因為呢一間舖頭嘅重點係可以自己落手落腳去整你嘅頸鏈

咁貴啲都值得啦

親手去整一份禮物

個一種嘅重要性唔係你現成買嘅可以比較得到

第六十一章

既然呢一個情人節嘅大作戰都成功咗

咁即係代表今日呢一個短暫而美好嘅情人節之夜應該都差唔多要落幕

咁如果要一個完美嘅結果嘅話

咁就梗係要送埋佢返屋企啦

我同佢一路上道係到十指緊扣

雖然呢一段路程嘅時間真係好短

但係對我嚟講

我唔知佢啦

但係淨係對我嚟講嘅話

我真係唔想行完

因為真係好幸福

但係無奈

都係個句

有啲嘢總會有盡頭

無論我幾唔想都好

我始終會有一日送到佢返屋企

去到佢屋企樓下嘅大堂之後

佢轉身攬住我

Cherry：今日真係好多謝你呀

我：傻豬嚟嘅 做咩無啦啦係度講多謝啫

Cherry：因為我真係未試過過一個咁開心嘅情人節

我：咁就梗係啦 我係你第一個男朋友嚟架嘛

我一講完

Cherry佢就即刻撲咗埋嚟錫我

唔係普通錫一錫果隻啲

係真係深情親吻果種啲

食完之後

Cherry：我愛你呀

我：我都愛你呀傻妹

Cherry：應承我丫 唔好離開我 無論發生咩事都好 你都要留住我

我當時完全唔明白點解佢要咁講

但係作為一個稱職嘅男朋友就當然會應承佢啦

但我目送咗佢上樓之後

我都開始起程返屋企

返到屋企嘅時候

我見到屋企個閘開咗

仆街

唔撚係咁撚悲哀下話

情人節先有賊入屋

但係我方武器

好彩我都叫食過夜粥

一入到去

即刻聽到一把好熟識嘅聲音

老豆：終於返嚟喇咩

老母：有冇好好地送人咁返屋企呀

我：點解你哋會係度 同埋你哋點知㗎

老豆：喂 呢層樓我買架啲 咁點解你又會係度呀

扁

老母：果然係兩父子 我哋頭先返緊嚟嘅時候係街上面見到架

老豆：個女仔唔錯吖 眼光有份我一半咁上下

老母：好心你啦 咁大個人仲講啲咁嘅嘢

唉 扁

我都費事再等佢哋噏

跟住我就去咗沖涼

「唔好離開我 無論發生咩事都好 你都要留住我」

到底係咩意思

都係唔好諗

應該都係擔心未來架姐

我應承你

第六十二章

跟住之後都無乜嘢特別事發生

都係返學放學拍下拖咁囉

其實來來去去都差唔多

所以我都費事講咁多

但係有一啲日子都係唔可以唔講嘅

咩話

乜嘢日子？

頂你個肺

咁都唔記得

2月之後咪3月囉

咁跟住之後係咩呀

4月囉

4月即係點呀

4月尾Cherry生日囉

咁都唔記得

罰你哋一個二個重新由頭到尾睇多次

但係講起生日

我真係屌晒鬼

啱啱先搞掂個個情人節

過咗兩個月

條氣都未喇順

又有個生日

大佬呀

可唔可以唔好咁chur先

大學assignment都無咁癲

不過都無所謂啦

生日嚟㗎

咁都係一年一次姐

反正過埋今日

之後都可以啱耐啲嘅

講吓笑啫

有得拍拖㗎

又有咩所謂啫

但係諗嚟乜呢啲嘢出嚟係好難賣返

你哋見到我聖誕節情人節嘅時候就知咩事啦

小弟嘅創意力等等真係好撚廢

但係我都已經學精咗

連登google呢啲已經信唔過

我諗住佢今次真係靠自己諗出來

用咗幾日

終被我諗到一條絕世好橋

對我嚟講係啦

但係個禮物係咩呢

我梗係唔可以咁快講住啦

如果咁快就話畀你哋知嘅話

咁你哋就唔會追故架喇

不過我為咗你一個計劃

我都真係用咗唔少時間同錢

屌

有邊次我幫佢準備禮物係唔駛用任何時間同錢架

都慣撚咗

不過我都冇所謂

咁始終佢都係我女朋友㗎嘛

為咗女朋友付出下都冇咩所謂啦

鬼叫我鍾意佢咩

雖然真係幾辛苦

但係當我見到佢好開心嘅嗰個樣

果一刻我真係覺得咩都抵返晒

只不過嘅就係

因為我幫佢準備緊果個驚喜

我真係冇咗好多時間

我連陪佢嘅時間都少咗

所以其實我都睇得出佢好唔開心

但係真係好好對唔住

一切都係為咗你

第六十三章

呢一排

無論係邊個搵我都好

我基本上都係唔得閒

Cherry以為佢自己做錯咗啲咩

係咁問我發生咩事

基本上除咗返學之外

我就係去上堂

上咩堂？

其實我係為咗想親手整一個生日蛋糕畀Cherry

因為我覺得冇嘢可以比一個男朋友親手整嘅生日蛋糕更加有價值

可能你哋唔會覺得點啦

但係我唔知點解好有信心佢會鍾意

其實禮物又好驚係有好

最重要都係睇心意㗎啫

咁我而家花咁多時間去準備

淨係心意分到已經夠晒啦

理得佢好唔好味ㄚ

即係咁講

學咗咁耐

學得咁辛苦

我當然想佢好味啦

我而家連波都唔得閒踢

我為咗佢連我最鐘意嘅踢波都犧牲咗

Cherry呀 你就忍下啦

好快架咋

再過多幾日就係你嘅生日

不過

講真個句

我都係唔想見到Cherry唔開心

所以我都搵咗人幫手

我將呢個計劃話咗俾班兄弟知

阿朗文哥佢哋亦都話會幫我手

佢哋幫我叫Cherry班姊妹出面

令到佢哋可以陪Cherry多啲

可以令Cherry無咁孤單

同時我都盡量保持同Cherry傾多啲計

盡力陪多啲佢

係辛苦架啦

咁我係佢男朋友嚟架嘛

女朋友生日嘅話

辛苦都無咩所謂

最緊要佢可以開心㗎啫

肉麻啲講句

只要可以令佢開心

我咩都得

第六十四章

依家每日都唔得閒

差唔多日日都夜晚先返屋企

跟住每日又要鬼咁早返學校

點解要早番學校？

屌

日撚日都咁夜返歸

撚有時間做功課咩

咁梗係要做啲返去抄架啦

雖然真係好撚想休息

但係Cherry嘅生日越來越近

我都越來越唔可以休息

我而家差唔多每日都係企係門口等學校開門個班人入面

連校工都差唔多認得我

有時啲老師見到我仲喺度問我

老師：睇嚟你終於肯生生性性讀書啦喎

我每次都係笑而不語

如果唔係而家學校捉功課捉得咁緊

我仲唔留係張床訓多半個幾鐘咩

辛苦嘅日子好快就結束

差唔多就到佢嘅生日

我問Cherry

我：你遲啲生日有冇嘢做呀

Cherry : 估唔到你仲記得啫

我 : 女朋友生日啲點可以唔記得呀

Cherry : 果日我daddy mammy都去咗出差 所以我諗應該都無乜嘢做

我 : 咁我陪你啦 你有冇啲咩想做

Cherry : 不如去唱k㗎 我好耐都無唱過k喇

我 : 兩個人唱k好似有啲怪咁啫

Cherry : 咁不如你搵埋班兄弟 我再搵我啲姊妹啦

我 : 咁我問下佢哋先

我 : 咁多位大佬 遲啲小弟女朋友生日有冇興趣一齊去唱K

文哥 : 你諗住女朋友生日同我哋去唱K ?

我 : 屌 佢梗係會嚟埋啦 你是咪on9

傑仔 : 我哋搵知你咩 不過我應該冇問題

鋒哥 : 我嗰日有嘢做 嚟唔到

金仔 : +1

強哥 : 我問一問我大佬先

然之後其他人都話ok

強哥條女都放人

咁我就同Cherry講

我 : 除咗鋒哥同金仔之外所有人都話可以

Cherry : 我班姊妹都可以呀

我 : 咁不如我哋開個gp方便我哋傾

Cherry : ok呀

咁Cherry成日果日嘅活動基本上都搞掂晒

第六十五章

當日我 文哥 強哥 阿朗嗰啲都會去

Cherry都會帶佢自己嘅三個姊妹去

個三個姊妹對成個故事冇乜影響

所以我姑且叫佢哋ABC就算

無耐就到咗Cherry生日嘅大日子

作為男朋友嘅我

緊係要去接我嘅女王陛下啦

我：我到咗你屋企樓下啦 落嚟啦

Cherry：又會咁準時嘅

我：我女神生日嗰 點可以唔準時呀

Cherry：又係度口花花 我而家落嚟啦

Cherry落咗嚟之後

我望到佢個一刻

我呆撚咗

佢今日著咗一件白色長袖衫

然後再加一條米色百褶裙

同埋一對啡色長筒boot

再加埋佢今日冇紮頭髮

成個感覺係清純得嚟又帶點成熟感

我：我要好好多謝個天

Cherry：點解咁講呀

我：佢比咗一個好完美嘅女朋友我

Cherry：你今日做咩呀

我：咩做咩呀 講事實咋嘛

Cherry：你好耐都無試過咁口花花啦嗰 係咪做錯事呀你

我：痴線 讚下自己女朋友都要原因架咩

講完我就好似閃電俠咁快咁錫咗佢塊面一啖

Cherry塊面即刻紅到仆街

Cherry：好衰啊你 成日都偷襲人

我：咁我最多俾你偷襲返囉

Cherry：我唔理你呀

雖然佢講就咁講

但係佢收唔到佢塊面上面嗰個好甜嘅微笑

我行咗過去

拖住佢隻手

我：行啦傻妹

上咗巴士之後

我哋去咗上層嘅前排位置

佢坐窗口位

而我就坐路口位

跟住佢就挨咗係我膊頭休息

兩頰有少少baby fat

再加上嘟起左嘅雙唇

真係好可愛

我微微撥開佢前陰嘅頭髮

同時係心裡面提醒自己一定要好好咁珍惜佢 照顧佢

第六十六章

搭多一陣巴士之後

我哋都差唔多到

咁我就叫醒Cherry

佢起身個陣時

仲係成個人懵吓懵吓咁

仲未訓醒咁欸

Cherry：做咩呀

我：落車啦

Cherry：哦

佢真係好可愛

跟住佢仲要行到搖嚟搖去

過多一陣我哋就到咗約定嘅地點

頂你個肺

一個二個都遲到

下次真係約早一個鐘要佢哋等番我哋轉頭

過多十分鐘之後

除咗文哥之外全部都到晒

強哥：啱啱whatsapp咗文哥 佢好似啱啱先出門口

我好細聲咁屌咗一聲

但係Cherry隻耳仔咁都聽到

Cherry：你講咩話

我都未反應得切

佢隻手已經到咗

我：嘩嘩嘩嘩 痛啊

Cherry：抵死啦 鬼叫妳講粗口

我：對唔住啦 你鬆手先啦好冇

Cherry：哼 你應承過我咩架

我：係係係 我講咗粗口 原諒我啦 有人係我女朋友生日果日遲到嗰 正常人都嬲啦

Cherry：我都未嬲 你洗唔洗咁緊張呀

我：我呢啲叫聲女友之憂而憂 後女友之樂而樂

Cherry：成日都咁口花花

強哥：早知我都遲到啦屌

A：咪係囉 忍耐做到要咁樣眼睛加耳仔受罪

我：咩啫 你哋嚟得就預咗架啦 今日係我BB生...

阿朗：得喇 收到晒 入去啦好嗎

跟住其他人全部都勁快咁：好呀 快啲行啦

頂吖

入到K房之後

Cherry即刻衝咗入去點歌

我：洗唔洗咁心急呀 我哋book咗好耐架

Cherry：唔得呀 呢首歌一定要唱先

我：好好好

跟住Cherry就俾咗其中一支咪我

我：做咩呀

Cherry：陪我唱

跟住我望一望部電視

有點甜

強哥：我哋今日Book左幾耐

B：好似8個鐘

C：一嚟就咁樣

阿朗：不如我哋走先啦好無

強哥：我哋唱番首電燈膽先走啦

我都費事理佢哋

返番去好好享受同Cherry一齊唱情歌嘅時間

「是你讓我看見乾枯沙漠開出花一朵
是你讓我想要每天為你寫一首情歌
用最浪漫的副歌
你也輕輕的附和
眼神堅定著我們的選擇
是你讓我的世界從那刻變成粉紅色
是你讓我的生活從此都只要你配合
愛要精心來雕刻
我是米開朗基羅
用心刻畫最幸福的風格」

.....

「是你讓我的世界從那刻變成粉紅色
是你讓我的生活從此都只要你配合
愛要精心來雕刻
我是米開朗基羅
用心刻畫最幸福的風格
用心刻畫最幸福的風格」

最後我哋仲要嚟番個深情對望

而之後全場都喺度

：嘴佢嘴佢

我：我都係詢眾要求咋

跟住就錫咗佢一啖

: WOOOOOOOOOO

班女仔仲要係度尖叫

跟住係度嗌：好sweet呀

之後嗰兩個男仔就仲誇張

唔知係邊度擺咗兩副太陽鏡望住我哋

第六十七章

我哋唱多一陣

文哥終於到咗

咁遲到嘅人要罰咩

來來去去果幾樣架啦

咁Cherry今日生日

咁就梗係佢話事啦

文哥好彩 今日Cherry心情好

所以就淨係罰咗佢請飲野就算

真係Cherry先會對其他人咁好

俾著我就起碼都要直接磅水加happy corner

呢啲走唔甩架啦

好耐都無試過咁開心

成班人係度唱歌

咁唱K都唔會下下都咁認真唱嘅

咁唱K鳩唱呢啲就正常都會架啦

跟住阿朗無啦啦開咗首千本櫻

但係重點佢唔識日文

然之後多就係到亂咁噏個啲讀音

但係最後都係無人聽得明佢唱乜

最大鑊嘅係

果班姊妹團見到阿朗係到咁做

跟住就係咁開啲泡菜歌

又係到唱讀音

去到最後變咗比班女係度播BTS

然後就喺度尖叫

是但啦

佢哋開心就得

反正其實都預咗無咩可能唱足8粒鐘

咁樣當開下party都唔錯㗎

話咁快就過咗呢8個鐘

開心嘅時間過得快呢句說話真係冇錯

其實中學時期可以咁樣玩嘅時間真係越來越少

下年我哋就要DSE

想玩都玩唔到

鬼叫香港係一個咁睇重學業成績嘅地方

如果你喺香港擺唔倒一個所謂嘅好成績嘅話

基本上無論你嘅人品有幾好 你都只係比社會否定

今日玩完之後都唔知幾時可以再玩

所以高中生活嘅回憶對我嚟講係最重要

亦係我最珍而重之嘅一段時期

當我哋解散咗之後

我就去咗同Cherry一齊食飯

咁食飯嘅情況就唔講咁多

反正都係喺度放閃咁

所以我都費事寫咁多

陣間又俾你哋話我恰單身狗

食完飯之後

我同Cherry一齊返咗去港島

搭緊車果陣時佢全程都訓咗喺我膊頭上面

玩咗咁耐

劫都好正常

其實我都好劫

但係點都要捱多一陣

等今日嘅節目全部完晒先可以放鬆

落咗車之後

我問即刻帶佢返屋企

Cherry：我哋而家去緊邊呀 我

望住佢奸笑咗一下

然後再微微一笑

我：秘密

跟住就繼續拖住佢隻手行

我帶咗佢去佢屋企附近嘅一個公園

我：你係度等我一陣 我10分鐘之內一定返嚟

Cherry：下

我：真係好快

Cherry：你講咗你要去邊先

我：我...我...我急屎啊

Cherry：咁好啦 快啲呀

跟住我就一支箭沖走咗

因為我驚幫我keep住蛋糕嘅果間鋪頭會閃閃

好彩最後都講得切

我攞住個蛋糕返咗個公園

去到公園之後竟然唔見咗Cherry

然後我見到Cherry比幾條仔圍住咗

屌你老味

我條女你都搞

你班仆街應該真係想死

我梗係咩都唔理衝過去 一嘢將Cherry拉埋去我身邊

我：你哋搵佢有咩事

仆街仔1：唔該你唔好掂呢位小姐

仆街仔2：你搵食去第二度啦 我哋同你個靚女傾緊計架

我：我點解唔可以拉住佢

佢係我女朋友

我連個朋字都未講完

呢兩條粉腸已經笑到反艇咁滯

仆街仔2：你照下鏡先啦 咁嘅樣都學人溝女

仆街仔1：毒撚最忌有自信呀蠢鳩仔

第六十八章

突然之間

Cherry攬住咗我

Cherry：佢無講大話 佢係我男朋友

講完之後仲要錫咗我一啖

你話我仲有咩可能唔愛死呢個女朋友

嗰兩個仆街仔見到都知道自己已經收晒皮

跟住就調頭走咗

終於鬆咗一口氣

唔係講笑

其實我好驚

我真係腳都震埋

希望佢見唔到啦

佢應該見唔到嘅

因為佢已經啤住我

Cherry：點解你會去咁耐架！

我：對唔住呀

Cherry：你走咗咁耐搞到我比人聊啊

我：咁我都幫你趕走咗佢咗啦 唔好嬲啦傻豬

Cherry：我唔理呀 我而家好嬲 你要諗方法去氹番我

要我氹姐 簡單啦

我：其實我頭先係去咗準備嘢比你

Cherry：準備乜嘢呀

我拖住佢隻手

我：你跟我嚟咪知

我去返頭先我放低蛋糕個度

Cherry：咩黎架

我將個蛋糕擺出嚟

佢係一個全白色嘅天使蛋糕

上面有少少焦糖脆脆

然之後有一個牌

寫住：傻妹 生日大快樂！

Cherry望住個蛋糕：好靚呀 係邊度買架

我：乜嘢買呀 你男朋友我自己整㗎

Cherry呆咗咁望住我

Cherry：真係架？

我：如果唔係要整蛋糕 我就唔會呢排成日都唔見人啦 整蛋糕好難學架

Cherry即刻衝咗過嚟攞住我

好細聲咁講：多謝你呀

呢個傻妹又喊了

我：我女朋友生日㗎 梗係要幫佢做啲嘢架啦 好小事姐

Cherry攞得我更加實

我：好啦 唔好喊啦 陣間嗰兩個仆街仔返黎以為我蝦你呀

我雙手捧住佢塊面跟住用手指公幫佢抹眼淚

然之後再喺佢額頭錫咗一啖

我：快啲試下個蛋糕啦

我幫佢切咗一楷

Cherry一擺落口已經係咁話好食

都唔知係咪真

可能佢只係氹我

分分鐘難食到仆街

於是我都試咗少少

嘩

我覺得我已經可以直接開舖賣蛋糕

個海綿蛋糕非常之軟熟

完全唔覺得實

然後個cream一啲都唔漏

個甜度啱啱好

配合埋焦糖脆脆嘅小小苦味

成件事非常之成功

睇嚟我真係一個天才

食完個蛋糕之後我哋兩個都好滿足

跟住就慢慢拖住手行番去佢屋企

我：sorry呀 因為我太忙學整蛋糕 所以冇時間買禮物俾你

Cherry：唔緊要呀 你自己整蛋糕已經係一個好大嘅禮物

我：咁最緊要你開心啦

Cherry：當然開心啦 從來都冇人試過整蛋糕比我食架

行咗無耐之後就已經到咗佢屋企樓下

Cherry又一次好實咁攞住我

Cherry：今日真係好多謝你呀 呢個係我人生過得最開心嘅生日呀

我：放心啦 之後好多好多個生日我都會令到你好開心

我講完呢句之後佢震咗一下

佢又喊

我：好啦唔好再喊啦 邊有人生日喊咁多架

Cherry望落去好似有啲嘢想講

但係佢都係冇講到出口

Cherry：知道啦 你返屋企要小心啲呀 返到去同我講啦

我：知道啦

我見住佢入咗去之後就轉身走

我望住阿豪慢慢離開嘅背影

阿豪：放心啦 之後好多好多個生日我都會令到你好開心我都希望之後嘅每一個成日都有你係度

但係唔得

呢個好可能係你陪我嘅第一個亦係最後一個生日

對唔住

第六十九章

然之後其實都冇咩特別事可以講

咪又係間唔中出嚟拍吓拖咁囉

都無嘢可以寫都畀你睇睇

不過所有開心嘅時光都會有完結嘅一日

咁快分手？

痴撚線咩

啱啱慶祝完生日就分手

三色台咩

只係...

Miss Chou：好啦 大家好好珍惜同交換生嘅時間啦 因為今個禮拜係佢哋係度嘅最後一個禮拜啦

等到呢句說話

成班都下咗出聲

原來唔經唔覺已經過咗半年

又係到咗學期尾嘅時候

不過呢個時候可能有好多人會有疑惑

點解可以exchange咁耐

其實佢哋唔係日日都係到

佢哋會定期返自己學校做下類似報告嘅嘢

同埋因為我哋兩間學校算係姊妹校

所以教嘅嘢同埋進度都差唔多

返返嚟先

雖然真係好唔想佢走

但係正所謂天下無不散之筵席

佢始終會有一日返去

同埋就嚟考試

大家都要專注返學業

無辦法啦

鬼叫我哋仲係學生咩

不過唯一擔心嘅係其實兩間學校嘅距離真係比較遠

所以之後可能有啲難見面

不過應該冇事嘅

我哋又唔算住得遠

要見一定見到嘅

-

放咗學之後

我同Cherry都去咗拍拖

但係我哋兩個之間都好似有一種講唔出嘅氣氛

有啲悲傷嘅感覺

因為大家都知道好快就唔會好似依家咁成日見

Cherry：你擔唔擔心呀

我：擔心乜嘢呀

Cherry：我哋下個禮拜之後就唔可以成日都見

我：咁唔係成日見都唔代表我哋唔會聯絡架嘛

Cherry：但係我驚我哋見少咗關係會淡

我：傻豬嚟嘅 又唔係成年冇得見 最多都係隔一兩日姐

Cherry：咁我真係驚嘛

Cherry講到隻眼都開始濕

我拉佢埋嚟 跟住攞住佢

我：人哋long D都係咁啦 我哋唔會有事架

唔知係咪我嘅錯覺

係我講long D嘅時候

佢個身好似震咗一下

我幫Cherry抹咗啲眼淚

我：你咁易喊 我點會唔留係你身邊

Cherry：你真係要成日約我架

我：知啦傻

時間話咁快就過咗一個禮拜

係呢個禮拜裡面

成級都充滿住依依不捨嘅氣氛

始終大家相處咗半年又要分開返

所以全部人都好珍惜淨返嘅時間

每日放學都會留係學校一齊玩

跟住星期六日都會約出嚟

其實唔係淨係我

今次嘅呢個交流活動

大家都識咗一班好重要嘅朋友

而家諗返真係得返中學先可以咁容易識到朋友

去到大學同埋出到嚟社會

好多人都會有心機

會有好多陰謀 好難會再搵到真心嘅朋友

所以大家要好好珍惜身邊果啲好重要嘅朋友

第七十章

放學嘅時候

我同Cherry都好似平時咁拖住手一齊返屋企

但係其實大家都知道對方都好唔捨得

大家都冇講出嚟

因為唔想令到個氣氛咁傷感

只係我哋都希望呢條路可以行耐啲

之後就唔可以每日放學都一齊拍拖

不過路總會有行完嘅一日

送到佢返屋企嘅時候

我哋都知道

係時候了

雖然之後都可以成日約出來

但係唔知點解

今次交流活動完咗

就好似完咗一個段落

之後會有啲嘢唔同

應該係我太擔心姐

送到佢返屋企之後

Cherry：之後無我成日陪你上堂 你要專心啲呀 你無咗我啲筆記 要自己抄架喇 同埋踢波要小心啲 唔好再整親啦

我：得喇 你唔洗咁擔心我啦 我會活得好好的 為晒都係你男朋友啫

Cherry：知你叻啦 記住之後要成日約我呀

我：得啦 長氣 快啲入去啦

你問我 我又點會唔擔心吖

以前日日見

依家可能要一個禮拜得兩三日

關係疏離應該做唔會嘅

只係無得見對方會好心不在焉咁姐

可能係熱戀期掛

每一刻都會好想同對方一齊

不過都係果句啦

要見一定見到嘅

其他人本身已經唔同學校

咪又係咁拍拖

人哋咪一樣好地地

咁你知咪當俾我哋經歷人哋經歷緊嘅嘢囉

無事嘅

跟住落嚟就係考試

所以基本上每日我哋放學都會約埋一齊去自修室溫書

講起自修室就嬬鳩

啲人都唔撚係溫書

條條仔都喺過嚟吸女

周圍望嚟望去

明明我都坐係Cherry隔離

班撚樣仲要成日走過來拗水吹

：靚女你有冇邊到唔識呀

: 你cal機有無入齊program呀 不如我幫你check下

: 呢度咁多人 不如你跟我返屋企溫書吖 我張床好大好舒服架

屌你老母 破壞之王都出埋

張床關溫書咩事

我聽到反撚晒白眼

我都知Cherry靚

但係都唔洗咁嘅

作為Cherry嘅男朋友

我都好盡責咁趕走晒啲狗公

係呀

我係佢男朋友呀

我係要霸住佢架喇

我叫做胖虎

我係小霸王

你班毒撚去溝其他女啦

我同Cherry最後都俾呢班餓狗搞到就去圖書館啲啲讀報紙區度溫書

痴撚線

一分鐘一件咁走過嚟

打車輪戰咁款

我真係怕撚咗佢咗

Cherry : 明明就嚟考試 都唔知啲人點解仲可以咁得閒聊人傾計

我 : 冇辦法啦 鬼叫你咁靚 係我都忍唔住啦

Cherry: 所以我咪陪緊你溫囉

我 : 咁所以我都好盡責咁幫你趕走晒啲狗公

Cherry：咁等我獎勵下你先

一講完佢就錫咗我塊面一下

成日都咁偷襲我

容乜易我會忍唔住架

好彩小弟定力都幾勁

我：又偷錫 咁古惑架

Cherry：你唔鍾意咁咪算囉

跟住佢就扮黝咁蹺埋對手 擰轉頭

我：邊個話唔鍾意啫

然後係佢後面攞住佢

錫咗佢個後腦一啖

Cherry：算你啦 快啲開始溫書啦

差啲唔記得呢度係圖書館

頭先應該閃盲唔少人

呢啲充滿著男女老幼嘅地方都係收斂啲好

第七十一章

不妨再同大家講多一次

其實我同佢都唔係啲咩讀書好叻嘅人

只係我對數字方面比較敏感

所以數學同physics我係比較好

而佢喺中英文呢啲文字上就係比較勁

果然係女神級別

冇返啲文采點得

咁做係基於大家比較好嘅地方都唔同

所以我哋就同時做咗大家嘅老師同學生

Cherry：喂呀 你專心啲做卷啦 唔好再揸手機喇

我：我哋依家先中五 使唔使咁快操卷呀

Cherry：唔快架啦 下年就要考 而家唔開始就冇時間架喇

我：但係我唔想對住啲卷呀

無錯

一直有睇開嘅讀者都知道

我係極度唔鍾意讀書

上堂訓教

起身先再問人抄notes

咩啫

咁上堂真係好悶吖嘛

Cherry：乖啦 你做到架

我：我搞唔掂架

Cherry : 咁法國國家隊有咩球員

我用一秒鐘喻晒11個人名出嚟

Cherry : 睇下 呢啲你又記得咁勁 證明你肯嘅話你一定做到架

我 : 邊度一樣呀 一樣鍾意一樣唔鍾意

Cherry : 咁你當係為咗我啦

我 : 即係點

Cherry : 我哋今次比賽鬥高分

我 : 鬥咩先

Cherry : 贏咗果個可以要求對方幫佢實現一個願望

我 : 咩願望都得 ?

Cherry : 冇錯

拿

我知你班仆街諗咩架

我個願望絕對唔係果啲

本人好純潔的

我淨係諗住要佢考完試之後

日日出嚟周圍去玩咋

就係咁簡單咋

你哋真係唔好亂諗

跟住我地就開始咗呢個漫長嘅溫書日子

雖然話就話係比賽

但係我哋都會幫大家溫書

互相有咩唔識都會問大家

Cherry : 呢題係點做架

我望一望練習上面嘅問題

我：咪同啱啱教你個題一樣囉 你有無聽書架

Cherry：邊度一樣呀

我：你將呢度調過嚟 再簡化呢度 咪就係咁咋嘛

Cherry：係啲 點解我諗唔到嘅

我用筆細細力敲佢個頭

我：蠢

Cherry即刻扮到好痛咁雙手禁住個頭

Cherry：就係你成日敲我個頭所以先搞到我咁

我：好啦好啦 呵返喇 繼續溫書啦

做做下嘅時候

Cherry突然拍咗一下我個膊頭

我一擰過去

佢塊面貼到埋嚟咁滯

Cherry：我唔識呢題呀

太蠢惑了

Cherry：嗯？

我好大力咁錫咗佢塊面一啖

Cherry：喂呀！做乜嘢呀 你口水呀

我：鬼叫你哄到咁埋 錯不在我

Cherry：哄埋嚟唔代表要比你錫架嘛

我：都係果句 只可以怪你太吸引

Cherry：成日都口花花氹我

如果可以嘅話

我真係好想永遠都可以留係呢一段時間裡面

第七十二章

時間過得好快

話咁快就已經去到要考試嘅時候

我同Cherry都keep住每個禮拜都會有起碼4日會一齊出嚟溫書

雖然我都唔係好專心溫書

咁啫

咁鬼叫佢吸引過本書咁多咩

因為咁我都唔知比佢鬧過幾多次

但係我自己返到屋企都有自己溫書

所以佢之後都費事理我

咁我都有認真溫書嘅

始終我都想要贏佢

話晒都係佢男朋友

我都唔想畀人話我差過佢

可能係因為獅子座

我唔鍾意畀人話我廢

我更加唔想俾人話我癩蝦蟆食天鵝肉

雖然我知道Cherry會介意其他人講咩

但係我都唔想有呢啲閒言閒語

同埋我都好想見到佢為我自豪嘅樣

你都見啦

我份人唔鐘意讀書

上堂訓教

又唔交功課

可能我會係一個好男朋友

但係我絕對唔會係一個好學生

雖然兩樣嘢完全唔關事

我想講嘅係

我都好想比Cherry見到佢男朋友都可以好叻

我希望比佢知道我其實唔係一個廢柴

我知道其實佢一直都好緊張我啲成績

而家佢唔再喺我身邊

佢無得再督住我專心上堂

佢應該仲擔心

所以我要做嘅嘢就係我要俾佢知道

其實我做到

咁考試都冇咩好講啦

不過真係要屌下班仆街

唔知大家讀書嘅時候係咪都係會有啲咁嘅仆街

一班裡面實會有幾條撚樣係咁為自己唔記得溫書

每次聽到都好撚攞憎

無溫書好撚威咩

洗唔洗周圍同人講

屌

最撚火滾嘅係

通常呢啲啖冇溫書嘅仆街

就係最高分啲幾個

真係屌晒老母

但係其實都要多謝呢啲人

有時都真係不得不承認

呢啲人會令我哋嘅中學生涯更加特別

之後每次聽到有關考試嘅事

都會諗起佢哋

因為你上到大學

就無人會再同你咁樣玩

屌

又離題

話咁快就考完試

都有咩好講

Cherry：點呀 有冇信心呀

我：自信就點都會有嘅 都溫咗咁多日啦

Cherry：但係你都唔係專心溫書嘅

我：咁我返到屋企都有自己溫書架

Cherry：咁我都有啦

咁由於我同Cherry唔係同一間學校嘅關係

我地用唔到排名比賽

所以我哋決定用咁多科嘅總平均分決勝負

0.01分都會變到好重要

繼續都係無咩可以講

所以我就直接跳到派成績表果日

其實我係幾緊張

自問自己讀書唔勁

但係我起碼盡咗自己最大嘅努力

MissChou：陳子豪

我慢慢咁行出去

攤到份卷之後

我唔敢打開佢

不過諗諗吓

其實我可以做嘅都已經做晒

呢個成績已經係我目前可以做到嘅最好

所以我只可以面對

我打開成績表

我連排名都唔睇

直接望個總平均分

我嘴角失守了

原來我盡全力會咁勁

第七十三章

我同Cherry約好咗放學一齊去一個公園等

冇錯

就係我之前同Cherry慶祝生日果個公園

點解去果度

我都唔知呀

可能我同佢係個度經歷過唔少嘢掛

我到咗之後

我發現原來Cherry一早到咗喺度帶住聽緊歌

我靜靜雞咁行埋去

擺咗佢一邊耳機聽

嗯？

流水很清楚惜花這個責任

真的身份不過送運

這趟旅行若算開心

亦是無負這一生

係醫神嘅落花流水

Cherry嚇到成個人彈起咗

Cherry：痴線架咩 嚇死我呀

我忍住笑咁話

我：睇得出 仲要彈到好高添

Cherry：衰人 嚇完人仲要笑

我：好啦好啦 sorry啦 但係你有冇真係咁鍾意醫神呀

Cherry：你理得我姐 快啲擺份成績表出來啦

我：睇嚟做好咗要輸嘅心理準備喇啎

Cherry : 好有信心㗎 本小姐真係未驚過

我哋兩個各自係自己嘅書包將成績表攤出嚟

我同Cherry : 3 2 1 !

我哋同時將成績表交俾對方

88.34/100

高過我2分

唔係講笑

我真係失望

Cherry : 嘩 你咁勁嘅 又86分㗎 睇嚟返屋企真係有溫書

我其實都唔係好聽清楚佢講咩

因為我成個腦都係我仲未夠高分

Cherry見到我成個人頹晒

佢行埋嚟攞住我

個頭係我心口度望上嚟

Cherry : 唔好咁唔開心啦 真好少咋嘛

我 : 但係我溫咗好耐

Cherry : 咁我平時又有備課返屋企又溫書 比你咁易勁過我 咁我之前咪晒氣

雖然聽到佢咁講我心情都好返啲

但係都有啲沮喪

Cherry : 你平時上堂訓教又唔做功課 都可以咁短時間攤到咁高成績已經好勁嫁啦

我 : 但係我諗住攤好高份比你睇但你開心下嫁嘛

Cherry聽到呢句之後面色沉咗

Cherry : 你係為咗我先努力考試 ?

我：梗係啦 如果唔係我都費事理佢咁多

Cherry：好成績係對你好 唔係對我好 你係為自己

我：但係我都想用好成績去氹你開心

Cherry：你擺到好成績啊梗係會開心啦 但係你要記住你係為自己去擺好成績

我：知道啦

Cherry摸一摸我個頭

Cherry：咁就乖喇

我：咁而家你贏咗嗰 想我呢個燈神幫你實現咩願望

Cherry：嗯 未諗到嗰 遲啲諗到再話你知

我：有得咁架咩

Cherry：而家我贏咗 我話事

我：你說的都是對

Cherry：好肚餓呀 快啲去食嘢啦

跟住我就俾Cherry拉左去篤魚蛋

冇同大家講過

其實Cherry都幾鍾意放學去篤魚蛋食

佢話又平又飽肚嗰

擺明就係佢為食啦

不過唔好比佢知我咁話佢

陣間佢又會打我

第七十四章

【Cherry視覺】

Hello

大家好呀

第一次同你哋見面

我係陳子豪嘅女朋友Cherry呀

大家應該都對我唔陌生

呢個故事其實唔應該有我係度講嘢

但係呢個位我都想同大家交代吓

(其實係作者諗唔到寫咩好 所以叫我出來講下嘢)

(不過你哋唔好俾佢知我同你哋講 :P)

我見到佢咁俾心機去溫書

我真係好開心架

佢仲要擺到咁理想嘅成績嗰

我都無預想過會咁好

我以為最多都係70幾分

以前見到佢上堂完全唔專心

一係訓覺

一係同人吹水

再唔係就喺櫃桶打機

我真係好擔心佢

你哋都知啦

我哋已經中五架喇

仲要已經Final

真係已經踏咗半個人入去DSE

我唔想再見到佢咁

我就諗到不如用一啲野激勵下佢

所以我就話用今次嘅Final比賽

贏咗果個可以實現一個願望

因為我知道佢一定有好多嘢想做

但係又驚我無咩興趣所以一直都無叫我去做

我要激起佢獅子座嘅好勝心

不過我唔可以比佢贏

因為我都有我自己嘅計劃

只係到最後我方諗過佢真係可以考到咁高分

可能我真係太睇少佢

不過

咁亦都證明咗其實如果佢肯去做嘅話一定做得到

同我聽到佢話為咗我所以先考得咁好

其實我好開心

因為佢真係會為咗我去付出好多

同時我都好擔心

佢要我咁樣迫佢先肯去做

推佢一下先行一步

如果有一日我唔再係佢身邊

咁佢係咪會變返以前果個唔嚟唔吊嘅佢

第七十五章

我返咗屋企之後

咁啱咁今日老豆老母都咁啱喺屋企

我就俾咗張成績表畀佢

佢望完之後

佢摸下我個額頭

老母：你係咪發燒呀 竟然考到咁高分

我：你個仔我不知幾健康

老母：你咁大個仔唔好同阿媽講大話 你到底有冇出貓

我：咪癲啦 自己溫番嚟架

老母：睇嚟呢個女朋友搵得唔錯 起碼令你肯讀書先

我：唔比係我自己生性嘅

老母：你會嘅話我加你零用錢又點話

老豆：咁咪即係我又要比多啲家用...

聽完我就返咗入房

我攤住張成績表攤咗係張床上面

講真

我讀咗咁多年書

除咗以前個兩次出貓之外

我都好似冇攤過咁高分

其實呢種感覺到唔錯

大家見到我咁高分都好開心

同埋花咗咁多努力

然之後有一個好成績嘅感覺

好爽

雖然我贏唔到Cherry

但係學佢話齋

佢一直都咁努力溫書

咁容易比我追到嘅話

咁佢咪好慘

但係今次考試我見到原來我都有我嘅可能性

話就話今次係為咗贏

但係最後我好似發現咗其實自己做得到

我好想之後我身邊嘅人都可以好似今次咁

我好想再見到佢哋為我感到自豪嘅樣

考完試

又派埋成績表

咁大家都知道我哋梗係等放假架啦

日日返學都係訓覺或者搵人吹水

MissChou：大家過多兩個月就中六 DSE好快就到架啦 所以今個暑假我哋會開始補課

XX：搵時 我哋識照顧自己架 唔洗麻煩你啦

ZZ：唔嚟得唔得

MissChou：無得傾㗎啦 每年中六都係咁 你哋認命啦

原來已經係呢度經歷咗五年

五年話長唔長話短唔短

但係其實都可以經歷到好多嘢

好似我咁

我用咗五年時間

識咗一班可以Friend一世嘅兄弟

由form1好驚遲到

去到而家中五見到未必趕得切

就直接去茶餐廳食埋個早餐先返學

中一嘅時候

每日都好專心上堂

因為好想有好成績

去到中五

每堂都訓覺

再唔係就喺櫃桶食嘢同打機

中一放學就會好乖咁返屋企

中五放學都未敬禮就即刻衝落操場霸場

齊人就換波鞋除恤衫猜隊開波

打到校工屌鳩我哋學校要門門先肯走

呢啲全部都係呢五年改變到我咁

雖然好似好差

但係我無後悔變成咁

因為咁樣過嘅每一日真係好開心

我想講嘅係

時間點都會過去

我哋可以做嘅就只有好好珍惜每一分每一秒

同喺自己身邊嘅人做更加多事

製造更多回憶

唔係叫你唔好讀書

只係唔好淨係得讀書

你唔會想遲啲大個咗生理仔

你個仔問你中學有咩特別回憶

但係人哋就join咗好多event

又Christmas Ball又聖誕聯歡會

跟住有啲人又會講下自己點樣組學生會內閣燃燒青春

你到時就只會諗到平時點樣努力溫書

放學就走去補習或者去自修室

見到個分別未

點解人哋個個咁充實咁開心

但係自己就淨係得讀書

及時行樂真係好重要

第七十六章

咁雖然我哋全部人都話唔想補課

但係其實我哋都好清楚DSE真係已經殺到埋嚟

所以我哋都係口裏說不心裏卻很誠實

補課啲我哋雖然唔想但係都會死死地氣咁去

不過原先仲諗住考完Final可以到啱一排先

點知氣都未啱完就已經要開始操卷

痴擦線

話喂大佬呀

吊頸都要抖下氣架嘛

一個禮拜

三次小測

四次突擊測驗

操咗三年past paper

我會唔會一個月就溫晒成個DSE範圍架

有一日 我同Cherry一齊出街

我：好叻呀 日日都操卷 放假都要做

Cherry：咁DSE係咁架啦

我：我覺得再係咁做落去我會死

Cherry：加油啦 好快就完架啦

我：你近排學校都喺度操卷？

Cherry：梗係啦 唔通仲得閒去放假咩

我：啱啱考完試梗係去玩下架啦

Cherry：長大啦 已經已經唔做係我哋可以去玩嘅時候架喇

我：點解你唔肯企吓我個邊啫

Cherry：唔係我唔企你果邊啊 係我哋個個都係咁 根本唔到我哋揀

可能其實我本身份人真係唔嘢唔吊

所以我覺得仲有咁耐

要溫一定溫得切

使唔使咁快就溫晒

我唔係唔明Cherry擔心啲咩

但係真係有啲多餘

我平時都係臨考前一個禮拜先溫架啦

咪又係咁

我唔覺得早成年開始會有咩分別

咁早開始到時開考咩都唔記得啦

我知DSE好重要

但係早一個月開始咪得

好似上次考試我早一個月開始溫書

出到嚟個成績咪幾好

完全唔明啲人點解要咁緊張

完全就係多舊魚

都唔知啲人咁杞人憂天做乜鳩

但係題外話

唔知點解覺得Cherry好似成日都會好容易憎憎

可能因為我同佢意見上有分歧？

但係以前佢都唔會咁樣同我嘈交

反而會好好心機咁同我講

解釋佢嘅諗法

不過應該係我諗多咗姐

一對情侶間唔中有幾句拗撬好正常姐

同埋我都好明

我哋已經好接近成年人嘅世界

好快就要踏出社會

唔可以再咁天真

要開始為未來諗多啲 打算多啲

Cherry：我肚餓啦

Cherry呢一句將我拉返嚟現實

我：你想食咩呀

Cherry：我今日想食菠蘿油

我：咁突然？你唔係話唔健康咩

Cherry：咁我哋都好耐冇食啦 間唔中食都得嘅

我：一時一樣架你

Cherry：咁你係咪唔鍾意吖

我：點會呢 我最中意啲人彈出彈入

Cherry：超 又口花花

我哋又去番我同Cherry第一次見面嘅嘅果一間麵包舖

點解又去返果間

其實而家越來越少麵包舖會有菠蘿油

時間慢慢過去

有好多嘢都會改變

環境

事情

人與人之間嘅關係

有好多嘢都最後都唔會敵得過時間嘅洗禮

第七十七章

去到間麵包舖

個店員姐姐都認得我

：毛仔 好耐冇見過你啦喎？

我：係呀

係呢個時候

我感覺都有一股殺氣係背脊傳過來

我嘅求生本領即刻出咗嚟

我拖住Cherry

我：今日我女朋友話想食呀麻 所以咪帶佢過嚟

然之後我對住Cherry講

我：因為我之前成日都食菠蘿油所以連店員都認得我姐

買完之後

我同Cherry一齊慢慢行去附近嘅一個公園

Cherry：咁點解你突然無再食菠蘿油嘅

我：你係咪明知故問啫

Cherry：咩喎 咁我想知吖嘛

我：咪就係因為有人每日都買腿蛋治比我攞到我食唔落囉

Cherry：咁你而家即係怪我啦

我：我都唔係咁嘅意思

Cherry：咁我而家俾一次機會你解釋清楚

我：因為你的腿蛋治實在太好食所以我唔捨得用菠蘿油嘅味𠵼過佢

Cherry：超 又係到亂講嘢

我：點呀 講真話你又唔滿意

Cherry：你而家對我有好多怨言咁喎

我：點會呢 你知我最中意你架啦

我：快啲食啦 陣間凍咗就會好漏嫁喇

一打開個膠袋

個一浸牛油香即刻衝晒出嚟

因為菠蘿包係新鮮焗出嚟嘅關係

佢用餘溫慢慢咁將個一舊牛油溶化

將個菠蘿油放埋口邊已經會被佢嘅溫暖包住

大大啖咁一咬

您會感受到因為牛油溶化咗

所以佢嘅油脂滲晒入去個菠蘿包度

牛油嘅油膩同菠蘿包嘅皮互相中和

個一種和諧嘅感覺越令人一再沉淪

如果而家係動漫世界嘅話

我諗我應該會爆衫

我都唔明點解會有咁多麵包舖會因為嫌麻煩而唔整

其實都係菠蘿包加塊牛油咋嘛

Cherry都食到好陶醉

Cherry捧著塊面：真係好好味喎

我：咁你知我點解之前會日日食啦

Cherry：但係咁樣食咁大舊牛油落肚 好肥呀

我：咁你見我成日做運動 咩都抵銷返啦

Cherry：你而家即係借啲意話我可能唔做運動所以就咁肥啦

.....

點解啲女人成日都會過度翻譯

喺食緊嘢嘅時候

我突然之間諗遲啲中學畢業之後我同Cherry可能會讀唔同嘅嘢

但係其實你問我真係想讀咩嘅話

我又真係答你唔到

因為我冇認真諗過我大個其實想做咩

不過都無所謂啦

而家全部人讀果科出嚟都唔係做果行架啦

咁不如問下Cherry讀咩我跟埋一齊咪得囉

我在努力多啲嘅話應該可以考到同佢差唔多成績嘅

我：你遲啲大學畢業諗住讀咩科啊

Cherry：做咩突然之間咁問我嘅

我：冇呀 因為我諗住同你一齊讀呀嘛

Cherry：梗係唔得啦 你要讀自己鐘意嘅野架

我：我都未諗到自己鍾意啲咩

Cherry：你真係咁想痴住我咩

我：梗係啦你係我女朋友嚟㗎嘛 唔痴你痴邊個㗎

Cherry：咁遲啲點算㗎 我哋點都有可能分開架嘛

我：咁我唔會比你走 再唔係你去邊我跟到你去邊

Cherry聽完之後冇出聲

我仲以為會好Sweet添

點知佢冇反應

過多一陣之後

Cherry就話返去

都係嘅時間都唔早喇

但係唔知點解硬係覺得佢好似有啲奇怪咁

第七十八章

雖然Cherry話唔想我同佢一齊讀

但係佢最後都屈服咗

原來佢諗住讀Computer Science

估唔到係呢科

我仲以為佢會上讀商科添

不過講開又講

其實我對於Programming都有少少興趣

始終我覺得識呢啲可能之後會幾方便

咁而家呢個世界嘅科技越嚟越先進

學呢啲遲啲點都會有用嘅

估唔到我同Cherry又真係幾夾

果然係我女朋友

咁跟住之後其實都有事發生

都係日日咁返學同補課

間唔中有時間嘅話就同Cherry一切出街行下拍下拖

我哋都盡量把拉時間

因為之後準備要DSE

可以一齊出街嘅時間會比變得越來越少

話咁快就已經去到結業禮

講就緊係結業

但係其實之後基本上每個禮拜都會返嚟補課

所以都無咩特別意義

不過諗返起之前幾年都會好愛心

因為結業禮象徵嘅係暑假嘅開始

跟住就會好期待可以日日去玩

不過我哋而家已經準備升中六

所以我都明白唔可以再玩咁多

反正捱多一年

升大學之後大把嘢玩

入宿

Ocamp

上莊

到時分分鐘玩到唔想再玩

反正都係好短時間姐

半年多少少就搞掂

話咁快個暑假就已經過咗一半

個個禮拜都要補課嘅日子已經習慣晒

其實補課嘅環境仲好

因為基本上成間學校都係得我哋呢班中六

好似間學校係我哋咁

唔會有一班低Form係度跑嚟跑去

所以成間學校都好靜

可以令我哋好專心

同埋無人嘅學校又係另一種感覺

好舒服

同埋唔知係咪因為中六知道自己好快就唔會再返嚟嘅關係

所以望到學校嘅每一個位都會有好多回憶湧出黎

話咁快就已經中六喇

唉

老啦老啦

話說我最近發現Cherry同文哥班仆街唔知做咩咁

成日都鬼鬼鼠鼠

一係就有嘢瞞住我

一係就杯緊我

唔會係夫目前犯咁大鑊掛

但係見到佢哋成日都有交集咁

有啲唔開心咁囉

同埋宜家搵佢哋出嚟玩

成日都話唔得閒

咩藉口都出晒

乜嘢好似準備落雨要等收衫

明明個天就曬撚到仆街

再離譜啲嘅

要留喺屋企睇住個細嘅

屌你老母！！

屌你老母！！

你屋企得你一個

無啦啦邊度嚟多個細架

要自己照顧自己所以唔出得街？

唉

算

我當大家都要溫書唔得閒出嚟

咁我咪試下搵Cherry囉

點知佢又話屋企有事

即係到最後都係得返我一個

唔緊要啦都慣咗

其實我以前不嬲都係自己一個

第七十九章

我好細個嘅時候

我老豆因為工作關係

所以成日都會俾人調嚟調去

所以我哋都會跟住搬屋

因為想就返老豆返工嘅地方

咁所以其實我由細到大都無一班固定嘅朋友

淨係小學時期我已經搬過三次屋

同時三次我都轉咗唔同嘅學校

每次轉校之後

我都唔會去主動識新朋友

因為我好清楚

只要我識咗一班新朋友之後

好快我又會搬屋跟住失去佢哋

我唔想每次都要承受同朋友分別嘅痛苦

大家都知道我好重視朋友

所以每次分開我都會好唔開心

於是我就明白到一個道理

沒有得到就不會失去

我唔去識朋友

咁我之後離開咪唔會唔開心囉

由嗰陣時開始我就開始收埋自己

有其他同學覺得我係一個怪人

所以就開始蝦我

放垃圾入我書包或者將我書包所有嘢晒出來

不過我都唔緊要

因為呢個係我嘅選擇

所以我唔會怨恨

同埋我寧願而家捱一陣

我都唔想之後離開嘅時候會咁傷心

而且亦都係因為我成日俾人欺凌

所以我亦都唔會對呢個地方有任何留戀

咁我就可以更加瀟灑咁離開

我當時真係有一刻覺得自己好型

但係我方真正意識過其實我當時係幾咁蠢鳩

直到我上咗中學之後

我老豆老母就開始變成去外國公幹

咁所以屋企就無再打算搬屋

咁即係代表我係中學終於可以去識新朋友

我亦都好好彩

中一已經同文哥一班

我同佢因為踢波同好多嘢嘢所以就成為咗朋友

跟住阿軒佢哋都開始逐個逐個咁出現係我嘅生命入面

雖然我細個冇朋友

亦都冇一個開心童年

但係原來個天係會見到

佢會補償返俾我

但係而家佢哋又係唔知點解係咁疏遠我

可能關係真係會有期限

唔緊要啦

其實我都享受咗好多好開心嘅時光

因為咁

所以我都無再搵佢哋

不過 當然我有繼續同Cherry一齊啦

咁我哋又唔係分手

只係佢呢排有啲忙姐

咁我同佢都會一齊出街拍拖咁啦

Cherry：點解呢排好似見你咁頹咁嘅

我：冇呀 只係唔知點解文哥佢哋好似唔想再理我咁

Cherry：可能佢哋真係有嘢做呢

我：可能掛 但係其實我覺得應該係我唔知做錯啲咩 所以佢哋唔想理我

Cherry細細力敲我個頭一下

Cherry：傻瓜

然之後我都同佢講咗我以前發生咗啲咩事

點解我而家會咁唔開心

佢聽完之後 唔知點解已經眼濕濕咁

Cherry：點解我之前無聽你講過嘅

我：咁我唔想俾人知就梗係唔講架啦

Cherry：咁阿軒佢哋知唔知架

我：我一直以來都無同人提過呢件事 我老豆老母都唔知

Cherry之後就無再出聲 好似喺度諗緊嘢咁

第八十章

唔知過咗幾多日之後

突然之間 有一日

我仲未訓醒覺嘅時候

屋企個門鐘係咁響

唔知嘅真係以為我爭人錢而家俾人追數

一開門就見到Cherry企咗係門口

Cherry：乜你咁耐架

我：咁我咪起身呀嘛 你咁早過嚟做咩

Cherry：你唔記得你今日約咗我出街咩

我心諗：乜真係有啲咁既事咩

咁當然我唔會講出口啦

我先17歲 我唔想咁快死住

我：咁都無理由咁早架嘛

Cherry：咁都早 個太陽做例落山添啦

明明個太陽啱啱先出嚟

睇嚟Cherry已經開始出現做媽媽嘅潛能

好似平時叫老母8點叫醒我

然後6點就會敲我門話已經9點

真係吹搥脹

Cherry：你仲企係度做咩呀 係咪要我幫你換衫呀

我：咁我又唔介意嘅 我驚你怕醜咋

Cherry：快啲去換衫呀

佢個咆哮附帶震懾技能

好彩我平時對得佢多

如果唔係我真係暈低都似

但係乜我本來今日真係有約過佢咩

死啦

近排記憶力可能有啲差

可能要食多啲合桃補吓腦先

嗶嗶聲換完衫之後我哋就好快出咗門口

我：係嗰 咁我哋今日去邊呀

Cherry望一望手機嘅時間之後

Cherry：你想呢

跟住我突然間醒起Cherry好似最近有一套好想睇嘅戲

我：咁不如我哋去食啲嘢先啦 陣間再諗

Cherry：好呀 你想食咩呀

我：點解今日突然咩都問我嘅 你唔係平時會直接講你想食咩架咩

Cherry呆咗一呆

Cherry：咁而家想食你想食嘅嘢得唔得吖

我：對我咁好 咁緊係得啦

但係我最後都係揀咗平時Cherry好鍾意食嘅個間日本嘢

嗌完嘢食之後

我借啲意行開話去廁所

其實我係走咗去買戲飛

頭先咪話有一套Cherry好鍾意嘅戲啱啱出嘅

我喺頭先已經充份利用時間Check咗陣間食完飯個場有無位了

唔係講笑

我真係男友力MAX

呢個世界仲邊都會搵到好似我呢啲咁好嘅男朋友

買完飛之後梗係拿拿聲返去啦

Cherry：乜你去咁耐架

我：無計啦 今日唔知咩事 男廁都要排隊

今日Cherry唔知點解硬係怪怪地咁

成日都好似好忙咁

唔係覆緊手機就係發咩啞

我：你今日係咪有咩事呀 點解好似好多嘢做嘅

Cherry好似比我嚇親咁

Cherry：冇...冇呀

我：冇嘢就快啲食啦 我哋仲有嘢做架

Cherry：下 做咩呀

我：你之前咪話想睇果套新出嘅戲嘅 我買咗飛陣間睇呀

Cherry又呆咗係度

都話我勁架啦

我真係搞驚喜嘅天才

跟住落嚟佢成個人好似有啲心不在焉咁

第八十一章

咁食完飯之後我哋就去咗睇戲

雖然話佢好似好心不在焉咁

但係佢都好專心咁睇

呢套戲係講男女主角一齊咗之後發現完來佢一直都有絕症

佢唔想男主角一直晒時間陪著一個就嚟死嘅人

所以佢喺仲未俾男主角發現自己有病嘅時候

佢同一個青梅竹馬夾埋做咗場戲

令男主角以為佢出軌

跟住分手

但係最後諗住女主角死咗之後

男主角先發現呢件事

男主角好痛恨自己點解會留意唔到女主有病

同埋佢心裡面已經認定咗女主角係佢嘅唯一

好耐都無睇過呢啲咁sad嘅戲

成個戲院都聽到啲人係度開紙巾同擤鼻涕

唔知有無人會好似我咁

冇論睇到啲嘅唔開心嘅嘢都好

全部都喊唔出

我仲要試過因為咁畀人話我冷血

我係啲嘅無論幾唔開心都唔會想喊嘅人

如果有人都係咁嘅話

建議係呢度相認
好啦

咁終於睇完套戲

出到戲院Cherry隻眼已經腫晒

唔知真係以為我整喊佢

不過我都唔好得去邊

我件衫都濕晒

唔係因為我太熱

而係因為Cherry一路喊嘅時候

佢一路擲我件衫抹眼淚

分分鐘擲黎抹埋鼻涕

諗起都有啲打冷震

我而家覺得自己好污糟

我：咁我哋而家去邊好呀

Cherry：跟住落嚟就交比我啦

然後佢就擲部手機喺度揸地圖

我：你諗住去邊呀

Cherry：你跟住嚟咪知囉 唔好問咁多啦

突然之間我有啲唔係幾好嘅預感

行下行下

都過咗半個鐘左右

我哋去到一座工業大廈面前

Cherry：我哋到啦

我望住呢棟大廈

果然我嘅預感係冇錯

唔係嘅

可能係裡面有個啲工廠Cafe 或者係啲賣衫店呢

無事嘅

我：真係呢度？

Cherry望一望我

跟住又望一望個手機

Cherry：啱呀 係呢度架啦

咁既然佢都講到咁肯定

咁我都無得唔信佢啦

跟住Cherry就拉咗我去搭

去到17樓

叮

門慢慢打開

我哋行出去之後

完全同我想像中嘅唔同

呢度冇賣衫嘅舖頭

亦都冇看似係Cafe嘅門口

只有好傳統嘅工業大廈嘅啲鐵閘

配埋工廈啲眨眨下嘅光管

唔知真係會以為我而家拍緊探靈youtube片

Cherry若無其事咁對住每個門派牌係度望

行到去某一個鐵閘面前

Cherry：係呢度啦

講完佢就直接拉起咗果個鐵閘

喂 咁樣直接打開人哋道聞好似唔係咁好啫

敲下門都好吖

Cherry：你仲企起到做咩 快啲過嚟啦

Cherry：快啲開門啦

點解係我...

我：點解你唔開埋佢啫

Cherry：而家係咪叫你開個門到咁多嘢講呀

果一刻問心我覺得Cherry仲恐怖過個環境

我直情覺得自己會有生命危險

所以都住係我都好聽話咁去咗開門

打開門之後

我淨係見到裡面黑到咩都見唔到

砰！